

# حدثش 2 بالفعل

T R U E S T O R I E S



ترجمة و إعداد  
محمد عصمت



## حدث بالفعل

الكتاب: حدث بالفعل 2

الكاتب: محمد عصمت

تصميم الغلاف: كريم آدم

تدقيق لغوي: إسلام عشري

رقم الإيداع: 2018/10788

الترقيم الدولي: 978-977-778-138-1

الطبعة الأولى: 2018

20 عمارات منتصر - الهرم - الجيزة

ت: 011 -27772007 02 35860372

Noon\_publishing@yahoo.com

جميع حقوق الطبع والتوزيع محفوظة للناشر

حدث بالفعل

(2)

قصة رعب حقيقية

بالعامية المصرية

ترجمة وإعداد

محمد عصمت





لتحويلك إلى الجروب أضغط هنا



لتحويلك إلى الموقع أضغط هنا

للمزيد من الروايات والكتب الحصرية  
انضموا لجروب ساحر الكتب

[sa7eralkutub.com](http://sa7eralkutub.com)

او زيارة موقعنا





حدث بالفعل 2 - إهداء هذا العمل مُهدى لروح د/ أحمد خالد توفيق رحمه الله

إهداء

هذا العمل مُهدى لروح

د/ أحمد خالد توفيق رحمه الله

إهداء

إلى المرأة التي أحب

حبيبتي وزوجتي وكلي الحلو

ممكن أكون عصبي ودمي ثقيل.. صحيح مشغول عنك  
طول الوقت وبضايقك دائماً.. يمكن اللاب توب مؤخرًا  
بقي بينافسني فيكي.

بس ربنا عالم إنك قاعدة جوا قلبي ومربعة ومش  
سايبة مكان لحد يقرب.

شكرًا إنك موجودة وشكرًا إنك مستحملاني.

\*\*\*

وهادي الشقي:

مطلع عيني بس بحبك

ربنا يخليك لينا يا اللي مليت حياتنا كلها فرحة وهنا.

اضحك يا هادي عشان ضحكتك هي اللي بتخلي  
لحياتي طعم ومعنى.

بابا بيحبك يا شقي..

## مقدمة

مبدئيًا كده لازم نتفق على حاجة مهمة جدًا، القمص اللي أنا حكيتها لكم في الكتاب ده كلها قصص حقيقية حسب كلام الناس اللي حكوها على الإنترنت في مواقع ومدونات ومنتديات مختلفة.

يعني أنا والله مش بشتغلك خالص، هُما حصل لهم المواقف والقصص المرعبة دي وقرروا يحكوها على الإنترنت، أنا قررت أترجمها لكم وأنقلها لكم بلغة عامية بسيطة عشان نقدر نستمتع بيها سوا.

زي ما إحنا عارفين إن ناقل الكُفر ليس بكافر.

فأنا ماليش ذنب... لو عندك مُشكلة مع تصديق إن القمص دي حقيقية أنا معنديش مانع، تجاهل الحته دي تمامًا واقراها كأنها قصص متألّفة أو مترجمة أو أي حاجة، المهم عندي إنك تستمتع بس، فحاول تستمتع وتمتع نفسك بقراءة سعيدة ومُمتعة.

تمام؟؟؟

صباح الفل

المترجم



## 1- الهالة

أنا بقدر أشوف الهالات المُحيطة بالناس... ودي لعنة!

آه .. أنا بقدر أشوف هالات الناس.

بكره الإعراف بدا بصراحة، عشان أغلبكم هيعتبرني مُتطفل وبستغل القدرة دي في اقتحام خصوصيات الناس، وجزء كبير منكم هيقول إني بكذب وبقول أي كلام عشان بس ألفت الأنظار، ويمكن برضه تفكروا إني هقدر أستغل قدرتي دي على الربح.

لكن بكل ثقة هقولكم... أنا مش مُتطفل، مش كذاب والأكيد إن عُمري ما حققت أي ربح من القدرة دي.

ولحد دلوقتي متكلمتش مع أي شخص على القدرة دي..

بس الحقيقة إني فعلاً بشوف هالات الناس، ومؤخرًا بقيت بعتر القدرة دي نقمة مش نعمة!

عندي سبب مُهم جدًا بيخليني أكتب الكلام دا في التوقيت دا، خليني أحكيلكم حكايتي بس كمان خليني أهدركم... النهاية مش هتكون سعيدة.. أبدًا!

\*\*\*

بالنسبة لي الموضوع بدأ بكل بساطة، بشوف هالة من الضوء الخافت حوالين البشر، حوالين كل البشر، ومن خلال الضوء دا بقدر أحدد أخلاقهم.

كل ما الضوء بيكون لونه فاتح أكثر وشفاف أكثر، كل ما الشخص دا بيكون شخص أفضل.

وعلى العكس.. كل ما الضوء بيكون لونه غامق أكثر ومُظلم أكثر، كل ما الشخص دا بيكون شخص أسوأ.

هبسلكم الموضوع أكثر شوية...

أقدر أقسم لكم اللي بشوفه لثلاث أقسام:

اللون الأسود بيمثل الشر.. اللون الأبيض بيمثل الخير..  
اللون الرمادي بين الاثنين.

والأخير دا في حد ذاته مُحَيَّر، دايماً بعتبر الناس أصحاب الهالات الرمادية دول الأشخاص العاديين زيادة عن اللزوم، الواقفين في المنتصف، المضطرين لإِتخاذ القرارات الصعبة.

\*\*\*

كُنت طفل صُغِير لَمَّا اكتشفت القُدرة بتاعتي لأول مرة، ما احتجتش وقت كتير عشان أفهم إن الألوان الفاتحة بتعني الناس الجيدين.. الطيبين.. اللي بيساعدوا غيرهم، ولحُسن حظي إن والدي ووالدتي كانوا من أصحاب الهالات الفاتحة، هالة والدي كان لونها فاتح أكثر من هالة والدتي، ودا كان أمر طبيعي لأن والدي كان صبور أكثر منها وبيتفهم البشر أكثر.

كمان أقرب أصدقائي وأغلب المُدرسين اللي بحبهم من أصحاب الهالات الفاتحة، بينما أصحاب الهالات الغامقة كانوا من المُتنمرين والفشلة.

كان عُمرِي حوالي ثمان سنوات لَمَّا فهمت طريقة عَمَل الهالات، لَمَّا فهمت إنِي مُتميز بهبة مش موجودة عند

حد غيري.

\*\*\*

قريت مقالات كثير على شبكة الإنترنت وقريت كتب كثير في مجال الطب البديل، مقالات وكتب بتتكلم عن الهالات وكيفية التحكم بيها، وطلعت بنتيجة واحدة لا تقبل النقاش.. كل دا هراء!

لكن برضه استفدت منهم معلومة مهمة، عرفت إن في ناس غيري في العالم بيتمتعوا بالهبة دي، لكن مفيش طريقة واضحة وصريحة عشان أقدر أعرفهم بيها، رغم كدا اكتشفت كمان إنني ممكن أشوف هالة الشخص عن طريق صورته حتى لو منشورة على الإنترنت، وعشان كدا 90 % من كاتبي المقالات ومؤلفي كتب الطب البديل كانت هالاتهم لونها غامق!

زُرت وسطاء نفسيين ودجالين وروحانيين كثير.. وبرضه أغلبهم بيتمتعوا بهالات غامقة!

مش معني كدا إن الروحانيين أو مؤلفي كُتب الطب  
 البديل سيئين.. لكن أغلب المشهورين نصابين، جُزء  
 قَلِيل جدًا من اللي زرتهم كان بيتمتع بهالات فاتحة  
 اللون، صحيح حاولوا يقنعوني إنهم من أصحاب القوى  
 الروحانية الخارقة والقدرات الخاصة لكن فشلوا، على  
 الأقل مش بيأذوا حد. ودا سبب إن هالاتهم لونها  
 فاتح!

استنوا بس...

أغلبكم بيسأل فين الرُعب في قصتي، أكيد أنا مش  
 بكتبلكم عشان أحكيلكم حكاية الهالات اللي بتظهر  
 حول الناس، اصبروا... أوعدكم إن فيه حاجة مُرعبة  
 خلتنني أحكيلكم قصتي هنا.

بس قبل ما أقولها لكم.. فيه شوية حاجات لازم  
 أوضحها وأشرحها.

أكيد أغلبكم بيسأل السؤال الأشهر، إيه هو اللون السائد  
 في الهالات المُحيطة بالبشر؟



وهجاوبكم.. اللون المُسيِّطِر على الهالات هو اللون الفاتح.. ويليه اللون الرمادي.

الهالات السوداء والغامقة قُليَّة جدًا.

أنا طبَّعًا مسافرتش حول العالم، ومعملتش إحصائية دقيقة للهالات اللي في العالم، بس بالتقريب ومن وجهة نظري هقولكم إن الهالات الموجودة في العالم تتقسّم كالتالي:

60% هالات فاتحة اللون.. 25% هالات رمادية اللون..  
15% هالات غامقة اللون.

فمن الإحصائية دي هقولكم وبكل ثقة إن الهالات البيضاء أو الشفافة نسبتها أكثر ودا معناها إن العالم لسه بخير.

الحاجة الثانية اللي عاوز أناقشها معاكم بخصوص الأطفال، أنا بقدر أشوف الهالة المُحيطة بالشخص من أول لحظة في حياته، والهالة دي مش بتتغير أبدًا

طول حياة الشخص، الخَيْر بيتولد خَيْر.. والشرير بيتولد شرير.

بصراحة هي مش قاعدة ثابتة، بس وجهة نظري إن كل من يولد شرير يظل شرير.. وكل من ولد ببذرة خير بتظل جواه مهما حصل.

يعني أنا شُفت طفل بيتولد لأب تاجر مُخدرات وأم تعمل في الدعارة، والإثنين هالاتهم سوداء غامقة، لكن الطفل كان يتمتع بهالة شفافة، أمه كانت بتسرق من الرجال اللي بيعاشروها، والولد طلع شخص جيّد رغم كل القبح و القذارة المُحيطين بيه، وعُمره ما سَرَق أو أذى أي شخص.. على الأقل لحد دلوقتي.

تسمعوا حقيقة تانية مُمتعة؟

النسب اللي قُلتكم عليها، ال 60% - 25% - 15% دي نسب ثابتة في كل مكان، يعني لو زُرت كنيسة أو أي دار عبادة بشوف النسب نفسها في الناس الموجودين..

كذلك نفس النسب موجودة بالظبط في الحفلات الغنائية والملاهي الليلية.

تعرفوا.. مرة زُرت سجن فيدرالي، وفوجئت إن أكثر من 60% من الموجودين هالاتهم بيضاء أو شفافة.

لكن الحاجة اللي كلُّكم هتستغربوها.. إني مبقدرش أشوف الهالة المُحيطة بيا أنا شخصيًا.

أمل وأتمني أن تكون هالتي.. لونها فاتح!

\*\*\*

أكثر شخص هالته شفافة سُفته في حياتي كانت امرأة بتعمل في الأعمال الخيرية، الهالة بتاعتها لونها فاتح ومُضيئة لدرجة إنها تقريبًا قربت تخفي ملامحها من كثر سطوع الضوء، وبصراحة من سيرتها الذاتية وأعمالها الخيرية أعتقد إن أي شخص في العالم لو سمع اسمها هيبجي في باله فورًا إنها تجسيد للخير، كل اللي بيتعاملوا معاها بيحبوها.

كانت بتحب تعمل خير لدرجة إنها تبرعت بكلية من كليتيها لواحد محتاج كلية بدون ما تكون حتى تعرفه بشكل شخصي!

مُتبنية طفل من ذوي الإحتياجات الخاصة، كُُل الفلوس اللي بتجيلها بتتبرع بيها للأعمال الخيرية.

المرأة دي كانت ساطعة لدرجة مُخيفة، مُخيف أوي إنك تعرف إن فيه شخص في العالم بيحمل كُُل هذا القدر من الخير في قلبه!

لكن مهما كانت مُخيفة أكيد مش هتكون مُخيفة أكثر من الشخص اللي بيتمتع بأغلق هالة شفتها في حياتي.

كان عندي وقتها حوالي 20 سنة، خارج من ملهي ليلي سكران الساعة 2 تقريبًا بعد مُنتصف الليل، ولمحت شخص ماشي وحيد في الظلام، في البداية ملاحظتوش لكن لما قُرب مني قدرت أفهم ليه

ملاحظتوش في البداية، كانت هالته مُظلمة لدرجة إنه كان مُختفي وسط الظلام من كُتر اللون الأسود!

وقفت جنب الحائط وبدأت أبص عليه بتركيز، كان بيتأمل الطريق الفارغ المُظلم أمامه وكأنه غير مُهتم بوجودي أو مش ملاحظني، وقف قدامي.. بصلي بنظرة كلها شر وحقْد.. نظرة بتعوم وسط ظلام الشر، غمزلي بعينه وابتسم بسخرية.

كان عارف.. أقسملكُم إنه كان عارف إنني شايف الهالة بتاعته وحاسس بشره، ساعتها لمحت ملامحه.. ملامحه اللي عُمرِي ما هنساها، عُمرِي ما هنساها لأنني شُفته بعدها في الجرائد و نشرات الأخبار، الراجل دا ليلة ما قابلته كان راجع من جريمة قتل بشعة، قتل زوجته وأولاده ومثل بجثتهم بدم بارد.

أعتقد إنكم بدأتوا تفهموا ليه يعتبرها نقمة مش نعمة دلوقتي!



طولت عليكم.. صح ؟

هدخل في الموضوع على طول، حبيتها من سنة تقريبا، هالتها بيضاء وشفافة تمامًا، مش غامقة ومش رمادية.. شفافة تمامًا.

كانت جميلة، دمها خفيف، جسمها رشيق... كانت كاملة!

فتاة أحلامي زي ما بيقولوا، عمري ما حكيت لها على الهبة اللي عندي.. ولحد النهاردة متعرفش حاجة عن الموضوع دا، مُستعد أحكيلكم عنها دفاتر وحكايات بس أنا مش جاي هنا النهاردة عشان أحكيلكم قصة حبي!

باختصار شديد:

حبيتها... اتجوزتها... حملت... كُنا سُعداء.. سُعداء جدًا.

فاكر شعوري لَمَّا صحيت من النوم على رسالة منها،  
كُنْتُ بايت في فُنْدُق في ولاية ثانية لظروف الشُّغْل،  
بعثت تقولي:

(أنا بولد .. حصلني على المُستشفى)

كان عندي حالة إحباط شديدة لأنني في مكان ثاني  
لكن بِمُنْتَهِي السَّرْعَة ركبت عربيتي ومشيت، وصلت  
في نُص الوقت اللي المفروض أوصل فيه تقريبًا،  
دخلت المُستشفى بنهج من التوتر وأنا بصرُخ في  
الممرضات : «مراتي فين؟.. في أي أوضة؟»

دخلت الأوضة بِسَّرْعَة و بدأت أهدى لَمَّا شُفْتها..  
صحتها كويسة وبتبتسم بلُطف، الدكتور كان واقف  
جنبها مُبتسم، هالته شفافة، قالي: «مبروك.. جالك  
ولد»

شاورلي على السرير بتاعه في الجانب الثاني من  
الأوضة.

وساعتها حسيت إن كَل الضوء اللي في الأوضة .. كَل  
الخير اللي في العالم بيختفوا من أدام عينيا. قلت  
للدكتور بإستنكار: «دا مش مُمكن .. مُستحيل!»

الهالة المُحيطة بابني كانت غامقة لدرجة إني مش  
قادر أشوفه! كان مُظلم لدرجة إني حسيت بالخير  
بيتسحب من جوايا ويجل محله شعور شريد، كان  
مُظلم بدرجة أنا عُمرى ما شُفتها قبل كدا.

بدأت أعيط أدام سريده، زوجتي والدكتور فكروني  
بعيط من الفرحة، بس أنا كُنت خايف .. ربنا يعلم أنا  
كُنت خايف أد إيه!

فاكرين القاتل اللي شُفته في الشارع وحكيت لكم  
عنه؟ ساعتها قُلتكم إن عُمرى ما شُفت هالة غامقة  
بالشكل دا، أنا دلوقتي بقولكم إن الهالة المُحيطة بابني  
كانت أغمق ألف مرة، إيه مُمكن يكون أسوأ وأكثر شراً  
من قتل أسرة وأطفال والتمثيل بجثتهم بدم بارد!

إحنا في بيتنا دلوقتي، ابني بقي عنده يومين، والهالة  
المُحيطة بيه بتزداد سوادًا وقتامة، السواد دلوقتي  
مالي عُرفته بالكامل، مبقاش مُحيط بيه هو بس،  
زوجتي بدأت تشك إن فيا حاجة غلط، لكن لحسن  
ظني إنها فكرت إنني خايف وندمان على الولادة  
والمسئولية... آه لو تعرف اللي أنا عارفه..

هتصرف إزاي؟ دا ابني!

من حوالي عشرين دقيقة قبل ما أكتب لكم الكلام دا  
كُنت واقف جنب سريريه، ماسك المخدة وبستعد عشان  
أكتّم أنفاسه، بس مقدرتش.. مقدرتش أعملها!

تفتكروا الأب اللي يخنق ابنه البالغ من العُمر  
يومين.. إيه لون الهالة المُحيطة بيه؟

الفكرة المُسيطرة عليا دلوقت.. تفتكروا لو والد أدولف  
هتلر، جوزيف ستاين أو تيموثي ماكفي، لو آبائهم كانوا  
يعرفوا أولادهم هيكونوا إزاي لَمَّا يكبروا، حد فيهم كان  
هيقتل اينه في المهدي.

حد فيهم كان عنده قوة أو شجاعة يقتل ابنه ويكتّم  
أنفاسه مخدة؟

قادر أشوف باب عُرفته من ورا شاشة اللاب توب وأنا  
بكتبلكم دلوقتي، الهالة بتزداد سوادًا لدرجة إن اللون  
الأسود بدأ يحتل جزء من الممر

طيب.. مُمكن جدًا أكون تجننت، بس أنا بدأت أشوف  
هالتي، فيه هالة خفيفة مُحيطة بإيدي ورجلي لونها  
رمادي فاتح، تفتكروا أنا طول عُمرِي رمادي؟

المخدة جنبي! كل شوية بيصلها، اللون الرمادي  
المُحيط بيّا بيغمق كل ثانية، والأفكار المُسيطرَة عليّا  
بتزيد معاه.

تفتكروا هو دا السبب اللي خلى ربنا يُرزقني بالهبة  
دي؟

عشان أشوف أد إيه ابني شرير وسيء وأقدر أنقذ  
البشرية منه قبل ما يكبر ويفوت الأوان؟



أنا مُقتنع بدأ.

الهالة المُحيطة بيَّا لونها بقى إسود...

دي علامة..

أنا هاخذ المخدة و أروحله .. سلام.

\*\*\*

## 2- غرفة 733

غرفة الانتحار.. دا الاسم المُتعارف عليه لُغرفة رقم (733)، وكأني مش قلقانة كفاية من أول يوم ليّا في الجامعة!

\*\*\*

إدارة الجامعة خصصت لينا الغُرفة رقم (734) عشان نسكن فيها، واللي اتضح إنها بتقع في الجُزء الجنوبي من سَكَن الطُلاب، لكن المُفاجأة اللي محدش فينا كان متوقعها هي إن المبنى الجنوبي دا هو أقدم مبنى في الجامعة، ومش بس كدا، كمان الغُرفة بتاعتنا في الدور السابع من المبنى، بس رغم كل حاجة مش قادرة أتضايق من إدارة الجامعة.

على الأقل استجابوا لطلبي وخلوا صديقتي المُفضلة هي زميلتي في الغُرفة.

أنا وليديا انشغلنا منذ الصباح الباكر في نقل حاجاتنا، وفي مُنتصف اليوم تقريبًا طالبة أقدم منا ومسؤولة

عننا جت وعرفت عن نفسها باسم بيت المُستشار  
 المُقيم في الجناح دا من السَكَن، كُنا مخلصين وبنرتاح،  
 أنا كُنت بعلّق بوستر لفرقتي الغنائية المُفضلة وليديا  
 كانت بتقرأ، كانت شقراء ومُبتسمة وهي واقفة على  
 باب الغُرفة وبتقول: «إزيكُم يا بنات.. أنا بيت.. هكون  
 المُستشار المُقيم معاكم السنة دي»

هزيت رأسي وأنا بحبيها و بقولها: «هاي»

خدت نظرة طويلة على الغُرفة قبل ما تقول بانبهار:  
 «واو.. إنتم اشتغلتم بسرعة وبنشاط»

شاورت على صورة لكاثولو كانت ليديا رسمتها من  
 فترة وهي بتقول باهتمام: «هو دا الكراكين اللي في  
 فيلم قراصنة الكاريبي؟»

ليديا بصت لها بغضب من فوق الكتاب اللي بتقراه من  
 غير ما تزد عليها، بيت حسّت بالإحراج وهي بتسيب  
 اللوحة وبتقول: «على أي حال.. أنا عارفة إن الجناح  
 بتاعنا هو أقدم جناح في السَكَن.. بس عاوزه أقولكم

إن الجناح دا له تاريخ ضخم.. دا عُمره تقريبًا 60  
سنة»

بصيت لتفاصيل الغرفة وأنا بقول لها: «دا حقيقي.. أنا  
كمان ملاحظة إن الغرف هنا صغيرة بشكل ملحوظ»

ضحكت وهي بتقول: «يبدو إن الناس في الخمسينات  
كان حجمهم أقل»

ليديا بصتلنا بدهشة وهي بتقول: «فعلاً؟»

بيت تجاهلتها وسكتت، الصمت المُربك سيطر على  
الغرفة لثواني قبل ما أقول: «الغرفة اللي جنبنا.. غرفة  
رقم (773).. لو هي أكبر من عُرفتنا وفاضية فإحنا  
ممكن....»

بيت قاطعتني بسرعة: «صدقيني إنتم مش عاوزين  
الغرفة دي.. الغرفة دي حصل فيها حالتين انتحار..  
حالة انتحار عن طريق الشنق وحالة تانية عن طريق  
القفز من النافذة.. من يومها وهما قافلين الغرفة ومش  
بيسكنوا فيها أي حد.. على أي حال.. مش محتاجة

أقولكم.. دا جناح سَكَن للطالبات.. ممنوع تواجد الشباب فيه بعد الساعة 11 مساءً»

قبل ما حد فينا يعلق على كلامها قالت بابتسامة لطيفة: «مبسوطة إني شُفتكم وقابلتكم»

خرجت من الغُرفة بسرعة الصاروخ، ليديا سابت الكتاب جنبها على السرير وهي بتقول بغضب واضح: «أنا بكرهها»

قُلتها بدهشة: «سمعتي هي قالت إيه؟!»

«مش مُهتمة بأي شيء هي قالته»

«ليديا.. دي اتكلمت عن حالتين انتحار»

«ريببكا.. اهدي شوية.. كُل سَكَن طلبة في العالم دا بيحصل فيه حالات انتحار»

«ممكن يكون عندك حق.. بس حالتين في نفس الغُرفة؟!»

ليديا انتهت وقالت: «طالما مش في عُرفتنا.. يبقى أنا  
مش مُهتمة»

فتحت النافذة وبصيت منها للأرض، كُنا في الدور  
السابع، قُلت لليديا: «النافذة صُغيرة أوي لإن حد يقدر  
يقفز منها.. تفتكري اللي قفز منها.. قفز ليه وكان بيفكر  
في إيه؟»

ليديا بصت لي بغضب وهي بتقول: «بيكا.. إحنا مالنا..  
اقفلي النافذة دي وادخلي .. أنا عندي خوف من  
المُرتفعات وبيجس بتوثر لَمَّا بشوف النوافذ دي  
مفتوحة»

ضحكت وأنا بقولها: «عُرفة الانتحار جنبنا.. لو تحبي  
نتنقل ليها في أي وقت قولي فورًا»

مسكت الكتاب بتاعها مرة ثانية وهي بتبصلي بغضب.

ليديا طول عُمرها شخصية اجتماعية ولطيفة مع الناس، من أول يوم لينا بدأت وبسرعة البرق تكوّن علاقات و صداقات، واللي ساعدها أكثر على دا هو إن الأسبوع الأول من الدراسة كان فيه حفلات ترحيب كثير، وفي واحدة من الحفلات دي ليديا قابلت شاب و اتعرفت عليه، صديقتي وعارفها من لما كُنَّا أطفال، وكُنْتُ مُتأكدة إنها هتدخُل في علاقة حُب خلال أول أسبوع من الدراسة.

صديقها كان اسمه مايك، شخص عادي جدًا مفيش فيه أي حاجة مُميزة، طالب جامعي زي أي طالب جامعي ثاني.

بعد حوالي شهر من بداية الدراسة بدأت الأمور تتغيّر شوية، الدراسة الجامعية كانت صعبة عشان كدا كُنْتُ أنا وليديا بنقضي عُطلات نهاية الأسبوع في الدراسة والمُذاكرة بدل تقضية الوقت في الحفلات، خلال أسبوعين هيكون فيه أول اختبار، وبصراحة أنا كُنْتُ مُصممة أكون من الأوائل مهما حَصَل.

في ليلة من ليالي شهر أكتوبر الكئيبة، صحيت على صوت عالي، صوت زي صوت الطحن أو التكسير، اتعدلت في السرير وبدأت أركّز عشان أعرف الصوت دا جاي منين بالظبط، ليديا هي كمان كانت صحت بسبب الصوت وقاعدة في سريرها بخوف.

طاخ....

بصتلي بخوف وسألتني: «إيه اللي بيحصل؟»

مش عارفة مصدر الصوت دا جاي منين بالظبط، مُمكن يكون مجموعة شباب سكرانيين غلطوا في عنوان سكنهم وجم الجناح بتاعنا عن طريق الخطأ، بس بعد ثواني عرفت مصدر الصوت... الصوت جاي من... جاي من الغرفة المُجاورة لغُرفتنا.

بوووووووم.....

سألت ليديا وصوتي بيترعش: «هو...؟»



قبل ما أكمل سؤالي قاطعتني وقالت : «آه، هو صوت شباك الأوضة اللي جنبنا»

بسبب خوف ليديا من المرتفعات كُنَّا قافلين شباك أوضتنا طوال الوقت، لكن الصوت دا كان صوت مُميّز، صوت شباك الغرفة (733) وهو بيتفتح وبيتقفل بعنف وبانتظام.

طاخ....

ليديا صرخت بخوف: «مين هناك؟»

سألت بصوت عالي: «إنت مين؟ .. إنت بتهزر معانا؟.. بتعمل مقلب يعني؟»

ليديا سألتني: «وهيعملوا فينا مقلب ليه؟»

قُلْتُ لها: «يمكن دا تقليد هنا... بيعملوا مقلب في الطلبة الجُداد»

بوووووووم.....

قالت بغضب: «مين يعني اللي بيعمل مقلب في الجداد؟»

بلعت ريقى بصعوبة وأنا مش لاقية رد.

طاخ....

بصت لي بغضب وهي بتقول: «بيكا.. إنتي عارفة إني بحبك.. بس سامحيني.. كلامك ساذج أوي»

رميت المخدة عليها و أنا بقول: «طيب.. طالما شايفة كلامي ساذج.. مُمكن تروحي تقوليلهم يبطلوا؟»

بان عليها الخوف و هي بتقول: «أنا؟.. إنتي سامعة صوت الشباك بيتفتح وبيتقفل.. وعارفة إني بخاف من المُرتفعات»

بوووووووم.....

قلتلها بسرعة: «أنا مش هتحرك من مكاني»

بصتلي بدهشة وهي بتقول: «أنا طالبة في فنون جميلة لكن حضرتك في كلية سياسة واقتصاد.. اتفضلي طبقي دروس التفاوض والحكمة عليهم»

قلت ببطء: «أنا.. مش.. هتحرك»

قالت بغضب: «خلاص كلمي بيت المشرفة تيجي تشوف إيه اللي بيحصل»

طاخ....

حسيت بالغضب من سلبيتها وأنا بقولها: «مش هكلم حد»

رفعت حاجبها بغيظ وهي بتقول: «خلاص.. تجاهلي اللي بيحصل ونامي»

بصوت هامس قلت لنفسى: «يا رب أعرف أنا.. محاضرتي الساعة 7:30 صباحًا»

بوووووووم.....

صرخت فيّا: «بيكا.. اتصرفي!»

قُمت من السرير بغضب وفتحت الباب، خرجت من الغرفة ومشيت ناحية باب الغرفة (733)، خبطت على الباب بقبضتي وأنا بقول بغضب: «ممكن تبطلوا شوية.. عندنا مُحاضرات الصُبح بدري!»

طاخ....

صرخت بغضب: «فعلاً؟؟»

كُنت على وشك أتكلّم تاني لما لمحت حاجة خلّتني اترعشت من الخوف وأنا بجري ناحية عُرفتي، عُرفة (733) كانت مقفولة بالقفل.. بالمفتاح!

ليديا شافتني داخلة الأوضة خايقة، سألتني: «إيه اللي حصل؟»

قُلتها بخوف: «أنا مش هقرب من الغرفة اللعينة دي مرة تانية.. الغرفة مقفولة من برا بالقفل ومع ذلك سامعة صوت من جواها»

ضحكت وهي بتقول: «يعني الغرفة مسكونة؟.. فيها شبح؟»

حسيت بالغضب من سُخْرِيَّتْهَا وأنا بزد : «لا مش شبح.. بس فيه شيء مُخِيف بيحصل جواها.. ودا ليه علاقة باسمها.. غُرفة الانتحار!»

من بعدها مسمعناش صوت الشباك وهو بيتفتح أو بيتقفل، لكن بالنهار وإحنا نازلين شُفْنَا وبكُل وضوح شباك غُرفة (733) مفتوح على آخره!

\*\*\*

خلال كُل الأسبوع التالي لليلة المُرعبة دي راقبت الشباك بتاع الغُرفة (733) وكُل مرة كُنْتُ بلاقيه مفتوح على آخره، وكُل ليلة كُنْتُ بسمع أصوات من جوا الأوضة زي صوت الشباك بيتقفل ويتفتح بانتظام أو صوت حاجة بتتدحرج على الأرض رايح جاي، على أي حال ليديا بدأت تتعوّد على الأصوات دي ومبقتش تصحي من النوم، وأنا بدأت أتأقلم مع الموضوع ومبيقاش مُخِيف بالنسبة لي زي الأول.

لحد ما في يوم كُنت لوحدي في الغُرفة بذاكر على اللاب توب بتاعي، كُنت حاظة السماعات في وداني وبسمع موسيقى، لكن صوت الموسيقى مكانش عالي للدرجة الكافية عشان يخفي صوت الطرقات اللي جاي من باب الأوضة.

من غير ما أبص على باب الغُرفة قُلت: «ادخل»

مرت دقيقة صمت تقريبًا قبل ما أسمع صوت الطرقات مرة ثانية، شيلت السماعات من وداني وأنا ببص لباب الأوضة ويقول: «ادخ...»

إيه اللي بيحصل دا؟ باب الأوضة كان مفتوح على آخره، افكرت إني كُنت سايباه عشان واحد من أصدقائي في دُفعة أكبر مني كان المفروض يعدي عليا، سمعت صوت الطرقات مرة ثانية، المرة دي عرفت الصوت جاي منين، مش جاي من باب الأوضة.. لا .. جاي من الدولاب الخشبي المسنود على الحائط اللي بيننا وبين الغُرفة (733)

أول حاجة جت في دماغي هي إن ليديا بتهزر معايا  
ومُختبئة جوا الدولاب، صرخت فيها: «ليديا .. اللي  
بتعملية دا مش حاجة لطيفة؟»

لكن مفيش رد..

صوت الطرقات بيتكرر مرة تانية، صرخت بغضب  
أكثر: «ليديا.. أقسمك بالله هقتك»

صمت تام، قُمت من مكاني ومشيت ناحية الدولاب  
وكُنت على وشك أفتحه وأنا بقول بغضب: «ليديا،  
إنتي إنسانة لعينة عشان...»

سمعت صوتها من ورايا، تحديداً من على باب الغرفة  
بتاعتنا وهي بتسأل بدهشة: «عشان إيه؟»

بصيت لها بخوف، حسيت إن الدم بينشف في عروقي  
وأنا بترعش، مش قادرة أتكلّم، سألتني تاني بغضب:  
«عشان إيه؟»

بلعت ريقى بصعوبة وقتلتها: «كُن .. كُنْت فاكرة إنك  
مُخبئة جوا الدولار»

بدهشة سألتني: «إيه؟.. ليه؟؟»

«لأني .. لأني سمعت صوت حد بيخبط من جوا»

الغضب ظهر على وجهها وهي بتمشي ناحية الدولار،  
فتحته وهي بتقول: «بيكا.. مش معقول»

الدولاب كان مليان هدوم وصناديق قديمة بس،  
حركت إيدها وسط الهدوم عشان تثبتي إن الدولار  
فاضي وهي بتقول: «وبعدين معاكي؟»

قُلتها: «أقسم بالله ...»

«بيكا.. مفيش حد في الدولار»

«أنا مُتأكدة من اللي سمعته»

بصينا لبعض بغرابة للحظات، صمت تام، الحاجة  
الوحيدة اللي قطعته كانت وصول صديقي وصوته هو



بيسأل بمرح: «إزيكم يا فاتنات ؟ .. مالكم؟»

قُلتله وأنا ببص لليديا بغضب: «فيه حاجة غريبة  
بتحصل في الغرفة المُجاورة.. ودي مش أول مرة»

سأل بدهشة: «أي عُرفة ؟.. عُرفة (735) ولا العُرفة  
الفاضية؟»

ليديا قالتله: «العُرفة الفاضية»

تنهد وهو بيقول: «عُرفة الانتحار.. دايمًا بيحصل فيها  
حاجات غريبة!»

قعدت على سريري وأنا بقوله: «إحنا سمعنا عن حالات  
الانتحار اللي حصلت فيها»

قال بدهشة: «حاجة غريبة جدًا.. مين يصدق حدوث  
3 حالات انتحار في عُرفة واحدة»

ليديا رفعت حاجبها بدهشة و هي بتسأله : «3 حالات  
إنتحار.. إحنا قالولنا إنهم 2 بس؟»

قال و هو بيفكر: «لا 3 حالات.. حالتين في السبعينات.. وحالة من حوالي 10 سنين.. طالب قفز من الشباك»

أنا وليديا بصينا لبعض بدهشة، جسمي اترعش من الخوف، ليديا قالت بخوف: «خلوني أعترفلكم.. 3 حالات انتحار في طابق واحد أمر مُرعب.. إنما 3 حالات انتحار في عُرفة واحدة أمر مُخيف بجنون»

صديقي قال بصوت هامس: «أنا سمعت إن فيه حاجات غريبة بتحصل في العُرفة دي»

سألته: «زي إيه؟»

فكر شوية ورد: «مش فاكر بالظبط .. بس واحد من الطلاب كان كاتب مقال عن نظرية بتفسر اللي بيحصل في العُرفة دي وعشان أكون صريح معاكم.. كان أمر مُخيف»

ليديا سألته: «هل فيه أي حالات انتحار تانية حصلت في أي مكان ثاني في الجامعة؟»

قال بسرعة: «لا .. كل حالات الانتحار حصلت في الأوضة دي»

قبل ما حد يعلق كمل كلامه: «الحقيقة كان أمر غريب أوي لما سمعنا إنهم فتحوا الجناح دا مرة ثانية!»

ليديا قالت: «هَمَّا قالولنا إنهم اضطروا يفتحوه لأن عدد الطلاب المُستجدين كان كبير السنة دي»

قال بهدوء: «على فكرة.. تقدرؤا تطلبوا من إدارة الجامعة يغيروا لكم الغرفة»

قُلتله: «حاولنا لكن قالولنا إنهم مش هينقلونا سوا لغرفة واحدة.. وأنا وليديا أصدقاء من 15 سنة تقريبًا.. مش هينفع كل واحدة فينا تفضل في أوضة مع حد غريب»

ليديا بصت على الدولاب المفتوح وهي بتقول: «وبعدين.. هنفضل هنا.. جنب الغرفة الشيطانية؟!»

بلعت ريقى وأنا بقولها: «مفيش أدامنا حلول ثانية»

\*\*\*

بعد مرور عدة أيام بدأت ليديا تصدق قصة الدولار  
اللي حصلت لي.

صحيت من النوم على صوت حد بيهمس، بصيت  
تلقائيًا ناحية سرير ليديا، لقيتها باصة ناحيتي وعينيها  
مفتوحة من كتر الخوف، بتشاورلي بصابعها على  
شفايفها عشان أسكت.

سمعت بجرص، بحاول أفهم الصوت الهامس دا  
بيحاول يقول إيه، وبحاول أفهم هو جاي منين؟ بس  
للأسف مش فاهمة ولا كلمة، ليديا شاورتلي أقرب  
منها، بخطوات بطيئة مليانة خوف قُمت ومشيت  
ناحية سريرها، الصوت هنا أوضح شوية، الصوت جاي  
من الغرفة (733)، حطيت ودني على الحائط وأنصت  
السمع.

لا... تأخذوا... الحكمة... من... الحمقى..

إيه؟ ليديا هي كمان حطت ودنها على الحائط وبدأت تسمع، الهمسات فجأة توقفت تمامًا، قربنا من الحائط أكثر، فجأة... سمعنا صوت خبطة قوية على الناحية الثانية من الحائط، ليديا شهقت بخوف وهي بتبعد عن الحائط.

فيه حد في الغرفة!

فجأة الموضوع خلاني غاضبة أكثر ما كنت خائفة، مشيت ناحية الباب، بخطوات مليانة غضب، فتحت الباب بقوة، ومشيت ناحية باب الغرفة (733)، خبّطت على الباب بقبضة أيدي بقوة، مكنتش مُهتمة بمين هيصحى أو مين هيقول عليا إيه!

صرخت ناحية الباب المقفول: «إنت مفكر إن كدا دمك خفيف؟... دا مش شيء لطيف ولا مُضحك.. اخرج من الغرفة اللعينة دي ووريني نفسك»

صمت تام لمدة لحظات طويلة.

بعدها مقبض الباب بيتحرك بعنف وبيجنون.

قلبي كان هَيِّقِف من الخوف، توقعت أي حاجة إلا رد الفعل دا، شهقت ورجعت لورا لحد ما خبطت في الحائط المُقابل للباب، فجأة مقبض الباب توقف عن الحركة وسمعت حد بيحاول يفتح الباب بقوة وغضب، الباب كان على وشك ينهار.. الخشب صوته بيعلى.. لكن لحسن حظي قدر يتماسك!

فضلت كاتمة نفسي وبترعش من الخوف لحد ما الصوت توقّف، وفجأة حسيت بالباب بيرتاح والثقل اللي كان ضاغط عليه بيبعد، بصيت بطرف عيني على باب عُرفتي ولمحت ليديا واقفة تبص على الباب ووجهها شاحب، بلعت ريقها وحاولت تتماسك وهي بتسألني: «إيه اللي حصل دا؟»

قُلتها بصوت غاضب: «حد مُختبئ جوا ومفكر دمه خفيف»

عينيها كانت مليانة خوف وهي بتدخّل الغرفة بتاعتنا بدون ولا كلمة، قعدت على ركبتي، بصيت من تحت

عقب الباب، ودي كانت أول مرة أشوف العُرفة (733)  
من جوا!

يبدو إنهم حولوا العُرفة لِعُرفة إمدادات ومخزن، كان فيه مجموعة مقاعد مرصوفة على طول واحد من الحوائط، مجموعة من المراتب والملايات مرصوفة على الأرضية وتحديداً تحت الشباك، العُبار مغطي كل حاجة في العُرفة، الشباك اللي في العُرفة دي كبير.. أكبر من شباكنا، ودي حاجة غريبة جداً لأنك لو بصيت على الشباك دا وعلى شباكنا من برا المبنى هتكتشف إنهم نفس الحجم!

الشباك كان مفتوح ودا كان طبيعي لأنني بشوفه كل يوم مفتوح على آخره، من النظرة السريعة دي هقدر أقول إن دي عُرفة مدخلهاش أي مخلوق من أكثر من عشرين سنة.

نور القمر منور العُرفة، ودا كان مخليني لحد ما شايفة العُرفة بشكل كويس، فجأة مبقيتش شايفة أي حاجة... ظلام تام سيطر على كل حاجة، قربت من



الباب أكثر وحاولت أستعيد الرؤية، فجأة لمحت عين صفراء قبيحة بتبصلي من تحت الباب، عين قبيحة مليانة شر على بُعد سنتيمترات قليلة مني، بيني وبينها خشب الباب بس!

مقدرتش أتحمّل أكثر من كدا... صرخت صرخة صحت الجناح كله!

\*\*\*

مش هنكمل في الغرفة دي أكثر من كدا، في الصباح التالي أنا وليديا قدمنا طلبات عشان نتنقل من الغرفة دي، المسؤولة عن الغرف قالتلنا إنها هتبذل كل اللي في وسعها، وفي نفس الوقت نصحتنا محدش فينا يكون لوحده في الغرفة، يا إما نكون إحنا الإثنين مع بعض أو الغرفة تكون فاضية، وعشان كدا بدأنا نقضي الوقت في غرف أصدقائنا.

قولت لإيان صديقي كل حاجة حصلت، ونصحتني أتكلم مع الأسرة المهمة بالماورائيات في الجامعة، وفعلاً حددنا معاهم ميعاد ورحت أنا وليديا، قابلنا



شاب لابس لبس أنيق وقالنا إن اسمه كريج ومعه  
أربعة كمان من زمايله.

حكينا لهم كل حاجة حصلت بالتفصيل، كل التفاصيل  
مهما كانت صغيرة أو تافهة، فضل يسمعنا باهتمام  
ويسجل ملحوظات، ولحد ما انتهينا تمامًا محدش  
منهم نطق بحرف.

بمجرد ما خلصنا كريج سألني: «دي كل حاجة حصلت  
؟»

بيطء قتلته: «آه»

قال بهدوء: «ممكن تستنوني هنا لحظات.. هتكلم  
شوية مع زمايلي وأرجعلكم»

ليديا قالت وهي بتقف: «طبعا.. خدوا وقتكم»

مشي هو وأصدقائه لحد باب صغير واختفوا وراه،  
ليديا بصتلي وهمست: «يلا بينا»

سألتهما بدهشة: «يلا بينا فين؟»

«بتتكلمي بجد؟»

«ليديا.. إحنا محتاجين مُساعدة.. إحنا خايفين.. منمناش في عُرفتنا بقالنا أسبوع.. ودول شكلهم مش هيقدرُوا يساعدونا»

قُلتها بيأس: «طيب خلينا نسمع حتى هيقولوا إيه، وبعدها هنروح للمسؤولة عن الانتقالات عشان نشوف وصلنا لإيه؟»

انتظرناهم لمدة 15 دقيقة تقريبًا، كريج خَرَج من العُرفة الثانية وشكرنا على الانتظار، وصلنا ثواني، قبل ما يقول بهدوء وغموض: «طيب.. اللي إنتم بتتعاملوا معاه يا بنات هو شبح. شبح غاضب»

ليديا قالتله بغضب: «إنت بتتكلم بجد؟.. هو دا الرأي اللي توصلتوا ليه؟»

ارتبك من رد فعلها الهجومي وهو يقول: «آ.. آه..  
شبح غاضب يبحث عن الانتقام»

ليديا قالت بغضب للمرة الثانية: «إنت برضه مُصمم  
إنك بتتكلم بجد؟»

كريبج تجاهلها وحاول يكمل كلامه: «مش عاوزكم  
تخافوا.. إحنا هنهتم بالموضوع.. الأرواح دي ممكن  
تكون شيء مُرعب ومُخيف لو مقدرتوش تتخلصوا  
منها وتتعاملوا معاها بشكل مُناسب.. حظكم حلو إنكم  
لجأتوا لينا.. الشبح دا غاضب وبيسعى للانتقام»

سألته بخوف: «الانتقام من مين؟»

«من الطلبة الآخرين.. دي أكيد روح طالب من اللي  
انتحروا في الغرفة دي.. ودلوقت بتدور على اللي  
كانوا سبب في انتحاره»

«طيب هقولك على حاج...»

«اسمعيني .. إحنا هنهتم بيكم بدايةً من دلوقتي.. كل اللي مطلوب منكم بس هو إنكم تبرعوا تبرع صغير للأسرة.. وإحنا هنشوف وهنتعامل مع كل الأنشطة المخيفة اللي بتحصل في الغرفة دي»

ليديا مسكت إيدي وهي ماشية وبتقوله: «مُتشكرين على وقتك»

سألنا بسذاجة: «تحبوا نجهز نفسنا إمتي؟»

ليديا قالتله: «هنبقي نبلغك قبلها»

ليديا خرجت من الغرفة بسرعة وهي بتقولي: «ضيعنا وقتنا على الفاضي»

قُلتها: «أنا شبه مُتفقة معاكي... لكن...»

قالتلي بغضب: «بيكا... اوعي تقوليلي إنك مصدقة اللي سمعناه دا»

بخوف سألتها: «يعني إنتي مش شايفة إن دا...»

مش قادرة أنطق الكلمة، حاولت أستجمع شجاعتي  
وأقولها: «ش... شبح»

بتوتر ردت: «مش عارفة.. معرفش.. بس مش مُقتنعة  
بأي كلمة المخبول دا قالها»

سكت وأنا ماشية معاها ناحية مكتب المسؤولة عن  
نقل الغرف، ليديا كملت كلامها: «خليني أبسط عليك  
الأمور... هُمّا بيستغلوا خوفنا.. عشان ياخدوا منا  
فلوس»

سألتها بتوتر: «يعني المفروض نعمل إيه؟.. نفضل ننام  
عند أصدقائنا ونسيب عُرفتنا فاضية؟!»

قالت بغضب: «أنا بس عاوزة كُـل دا ينتهي»

بصراحة أنا كمان كُنت عاوزة دا ينتهي، المعيشة بجوار  
الغرفة اللعينة دي مش حاجة لطيفة، بالعكس دي  
حاجة مُخيفة و مُرعبة.

فكرت شوية قبل ما تقول: «طيب .. إحنا نقضي النهار في أوضتنا عادي حتى لو لوحدنا لكن الليل مُستحيل»  
 قبل ما أرد عليها قالت: «اللعنة... الساعة بقت 2...  
 عندي مُحاضرة حالاً»

كُنا وصلنا لمكتب المسؤولة عن الغُرف، شاورت لينا من بعيد لكن ملامحها كان فيها شك وغموض، ليديا اضطرت تمشي عشان كدا رُحت لها لوحدي، قربت منها و قُلتها: «ها .. أنا ال ...»

قاطعتني: «إنتي البنت اللي عاوزه تنتقل من غُرقة  
 (734) .. صح؟»

قُلتها: «مضبوط»

سألتنِي: «ممكن أعرف ليه عاوزه تسيبي الغُرقة؟»

كُنت مُرهقة.. كُنت مُنهارَة نفسيًا.. كُنت أضعف من إنِي  
 أختلق كذبة.

قُلتها بدون تفكير: «عشان الغرفة المجاورة لينا،  
والمفترض إنها فارغة.. بيصدر منها أصوات، ضوضاء،  
همسات وطرقات، دا غير إني شفت حد في الغ...»

قاطعتني وهي بتسأل بذهول: «شفتي حد؟»

«آه»

«في الغرفة (733)؟»

«آه، كنت بيص من تحت عقب الباب، وشفت حد جوا  
الغرفة.. أنا متأكدة»

بصتلي للحظات طويلة وفي عينيها بتلمع نظرة غريبة،  
هزت رأسها في النهاية بإشارة مُبهمة مالهاش معنى،  
قالت بصوت واطي: «على أي حال عُرفكم الجديدة  
لسه مش جاهزة لكن إحنا حاطين طلبكم في المقدمة،  
لحد ما العُرف تجهز إنتم في عُرفتكم ومش هنقدر  
ننقلكم أي مكان ثاني»

تنهدت بإحباط .. مفيش بإيدي حاجة ثانية أعملها.

قبل ما أمشي قالتلي: «اسمي آليس.. وعاوزة بس أقولك إني عملت أبحاث كتير جدًا عن حالات الانتحار اللي حصلت في الغرفة دي وأعتقد إني مُمكن.. مُمكن أساعدك.. أو على الأقل أفهمك شوية حاجات»

سألتها بشك: «بجد؟»

قالت وهي بتبتسم: «طبعا، أنا مُقيمة في غرفة (310) في الجناح (تايلور).. هخلص شغلي وأكون في الغرفة الساعة 4 تقريبًا»

قُلتها بتردد: «هحاول أجيلك.. لأننا كان لينا تجربة سيئة مع الأسرة المُهتمة بالماورائيات»

الغضب ظهر على ملامحها وهي بتقول: «فاهمة طبعا.. مجموعة مُحتملين»

ابتسمت وأنا بقولها: «هشوفك الساعة 4»

ابتسمت وهي بتقول: «عظيم.. هستناكي»



وصلت بدري وانتظرتها، لما وصلت حكيت لها كل اللي حصل بالتفصيل للمرة الثانية النهاردة، المرة دي آليس كانت بتقاطعني بمُنتهى الحرية وبتسأل على حاجات مُعينة.

لما خلصت كلامي رجعت بظهرها على الكرسي وتهدت بعمق، هزت رأسها وهي بتقول: «مش قادرة أصدق.. دايمًا بسمع إشاعات عن الغرفة دي وبصراحة مكنتش بصدق»

قُلتها بصدق: «أنا مُستعدة أقسم لك إن كل اللي قلتهولك صحيح»

سألت باهتمام: «ودلوقتي؟.. لسه كل حاجة زي ما هي؟»

قُلتها: «من يوم ما دا حَصَل وإحنا مش بنقضي الليل هناك.. لكن أثناء النهار بنسمع صوت خريشات من ورا الحوائط، وساعات همسات خافتة، وأغلب الوقت بنسمع صوت الشباك بيتفتح و بيتقفل كثير، لكن لو

بصينا على الشباك من برا أثناء النهار بنلاقي الشباك  
مفتوح طول الوقت»

هزت رأسها وهي بتقول: «على أي حال أنا هقدر  
أقولك إنكم مش في خطر، الموضوع مُخيف فعلاً لكنه  
مش خطير، ونصيحة مني.. لازم تبعدوا عن الغرفة  
(733) بسرعة»

ضحكت بشخرية وأنا بقولها: «أنا شخصيًا مش هقرب  
من الغرفة دي تاني»

الجديّة ظهرت على ملامحها وهي بتقول: «بس لازم  
تعرفي حاجة مهمة.. أيّا كان الشيء الموجود في  
الغرفة دي فهو خطير.. مُتلاعب.. مُحتمل وأذكى منك  
بكتير»

سألتهما بخوف: «تفتكري إيه اللي جوا؟»

قالت بدون تردّد: «كيان قديم.. وبكل تأكيد.. شرير  
جدًا!»

بصيتها بشك وعدم تصديق، بدأت أتفرج على عُرفتها،  
 أول مرة من ساعة ما دخلت ألاحظ ديكور الغرفة،  
 ومن نظرة سريعة هقدر أقول إن آليس مُهتمة بالسحر  
 بشكل كبير، صوتها خرجني من تركيزي وهي بتقول:  
 «متدخليش الغرفة مهما حَصَل»

قُلتها بسرعة: «مُستحيل أدخل الغرفة دي تحت أي  
 ظرف من الظروف»

هزت رأسها وهي بتقول: «عارفة، بس لازم أحذرك لأن  
 هبيجي وقت وهتحسي إنك مُضطرة تدخلي الغرفة،  
 ساعتها متعمليش كدا، لأنك مش عارفة إنتي  
 هتتعامل مع إيه جوا.. الشيء دا قتل خمس أشخاص  
 فعلاً لحد دلوقتي»

«خمسة!.. كُنت فاكراهم 3!»

«هو الشائع إنهم 3، لكن أنا زي ما قُلتك عملت أبحاث  
 كتير عن حالات الانتحار دي، شوفي.. هقولك، إلين  
 بيرنهام سنة (1961) و دي انتحرت قفزاً من النافذة..

تيد كولينوورث سنة (1968) وبرزه انتحر قفزًا من  
النافذة.. ماريسا جريج سنة (1975) ودي شنقت  
نفسها.. إرين ميرفي سنة (1979) ودي قفزت من  
النافذة.. إريك دوستين سنة (1992) و دا شنق  
نفسه»

«وبعد خمس حالات انتحار.. إزاي إدارة الجامعة  
بتسمح للناس يعيشوا جنب الغرفة دي»

«عادةً مبيسمحوش بدا.. ودا السبب في تحويلها  
لمخزن»

« و طول السنين دي؟»

«كُل كام سنة طالب أو إثنين بيوصلوا متأخر ومش  
بيلاقوا عُرف فاضية فبتضطر الجامعة تفتح الغرفة  
الملعونة دي، ودا طبعًا زي ما إنتي شفتي كان قبل  
عصر الإنترنت، والطالب اللي جاي دا مالوش أي وسيلة  
يعرف بيها تاريخ الغرفة المشؤوم، بس بعد آخر مُنتحر

اللي هو إريك دوستين قررّوا يقفلوا الجناح دا بالكامل  
ويبنوا جناح تاني وهو الجناح الجنوبي الجديد»

«طب من وجهة نظرك.. الكيان الشرير دا عايز إيه؟»

سكتت وهي بتفكر قبل ما تقول: «فوضى.. قتل..  
أرواح مُعذبة.. مين عارف؟ محدش يقدر يعرف هو  
عايز إيه!»

«عندك حق.. طب قوليلي تعرفي إيه تاني؟»

«أعرف إن مالوش تأثير غير جوا الغرفة دي بس  
وتأثيره على الموجودين خارجها ضعيف جدًا، أعرف  
كمان إن كل اللي ماتوا جواها كانوا لوحدهم، وأعرف  
إن الكيان دا ذكي ومُحتال.. دا كل اللي أعرفه»

«تفتكري بيعملوا كدا ليه؟»

«شوفي.. كل الضحايا سابوا وراهم صور و أوراق  
مكتوب فيها حاجات لا توصف من كُتر بشاعتها، الورق

دا كان بيحتوي على حاجات رهيبة.. مُخيفة.. شريرة،  
لو بس قريتها أو شفتيها هتحسي بتأثير نفسي قوي»

«هَمَّا اللي رسموا وكتبوا الحاجات دي؟»

«آه.. أيًا كان الكيان الشرير دا فهو قدر يتمك منهم  
ويقودهم للجنون»

«دا شيء مُخيف جدًا»

«مفكرتوش تجيبوا حد يظهر الغرفة؟»

«لا»

«ليه؟»

«الموضوع صعب.. إنتي بتتكلمي عن إقناع إدارة  
الجامعة بدخول قس عشان يعمل عملية طرد أرواح  
شريرة»

سكتت ثواني قبل ما تقول: «تعرفي.. فيه إشاعة  
ظهرت في السبعينات إن الموضوع دا كله بدأ بسبب

مجموعة شباب كانوا يلعبوا ويجا جوا الغُرفة سنة  
«(1961)»

«وجهة نظري إنها مُجرد إشاعة سخيفة»

«في السبعينات كان لها صدي قوي، على أي حال  
الشخص الوحيد اللي عارف إيه اللي حصل بالتفصيل  
هو عضو مجلس إدارة الجامعة توم موان، حاولت  
أتكلم معاه أكثر من مرة لكنه كان بيرفض»

«كان طالب في الجامعة سنة (1961)؟»

«مش بس كدا.. كمان كان سكن في الجناح الملعون»

«لازم نتكلم معاه.. لازم نفهم إيه اللي بيحصل»

«لو عاوزه تتكلم معاه يبقى لازم نطارده في الحرم  
الجامعي»

«تفتكري نقدر نعمل دا بُكرة؟»

«هنجرب»

\*\*\*

السيد موان رَفَضَ يقابلنا ثاني يوم أوحى اليوم اللي بعده، حاولنا نتكلم معاه ساعة الغداء لكن كان بينجح في الهروب منا كل مرة، وفي النهاية وصلنا لقناعة تامة إن موان العجوز بيتفادانا.

أنا وليديا استمرينا في النوم عند أصدقائنا، كنت بروح لغرفتنا مرتين كل يوم، مرة صباحًا ومرة بعد الظهر، ورغم إن الأصوات الجاية من الغرفة (733) توقفت إلا إني كنت لسه خايفة منها، دايمًا كنت بحس بالخوف من الكيان المتواجد في الغرفة المجاورة، حاسة إنه بيراقبني.

الهدوء دا مكانش طبيعي.. الهدوء دا كان الهدوء الذي يسبق العاصفة!

كان يوم خميس..

كنت راجعة الغرفة عشان آخد شاور قبل حفلة الهالووين، الوقت كان متأخر وليديا مع صديقها، يعني



## هكون لوحدي في الغُرفة!

أخذت شور في الحمام العمومي الخاص بالجنّاح لكن كان لازم أُغَيّر هدومي في الغُرفة، إيان هيستنائي أمام الجنّاح كمان نُص ساعة عشان نروح الحفلة سوا، هدخل أُغَيّر هدومي وأخرُج في أسرع وقت مُمكن.

الصمت بيوترني عشان كدا شغلت أغاني على اللاب توب بتاعي ورميته على السرير.

لبست هدومي ووقفت أدام المراية عشان أسرّح شعري، نزلت رأسي وقلبت شعري لأدام عشان يغطي وشي وأقدر أنشفه من ورا، لكن لما رفعت وشي ورجعت شعري لمكانه الطبيعي لاحظت الصمت التام المسيطر على الغُرفة.

بس دا مكانش الحاجة الوحيدة اللي لاحظتها.

أنا مُكنتش في عُرفتي! المراية الصدئة المليانة تُراب عكست انعكاس سرير قديم مكسّر ومرتّب ونافذة ضخمة مفتوحة، أنا كُنت في غُرفة (733)، لفيت

بخوف وبصيت ورايا، لقيت نفسي واقفة في عُرفتي  
 زي ما أنا، لكن الانعكاس اللي في المراية انعكاس  
 الغرفة الثانية، قبل ما افهم إيه اللي بيحصل لفت  
 نظري حاجة مُخيفة!

لفت نظري حركة خافتة ورايا..

وجريت..

أخذت شنطتي وتليفوني وخرجت من الغرفة بجري  
 زي المجنونة، الباب اتقفل ورايا بقوة زي ما يكونوا  
 بيطرّدوني منها، جريت لحد الدور السفلي واتصلت  
 بآليس وقُلتها بخوف: «مش قادرة أتحمّل أكثر من  
 كدا.. مش هقدر أرجع الغرفة دي مرة ثانية.. مش  
 هقدر أرجع مرة ثانية أبدًا»

سألتنى: «إيه اللي حصل؟»

حكيت لها كل حاجة.

لما خلصت سألتني: «يا الله... وهتعلمي إيه دلوقتي؟»

«لازم أتكلّم مع حد يكون فاهم إيه اللي بيحصل.. توم موان هو الشخص الوحيد اللي عاش بداية الأحداث في الستينات.. صح؟»

«الشخص الوحيد على حد علمي.. هحاول نتكلّم معاه بكرة الصُبح.. هتحاصره فجأة ونرفض نسيبه يمشي إلا ما نفهم اللي بيحصل.. هو بيوصل الجامعة الساعة 6:30 صباحًا.. تحبي نتقابل الصُبح في الكافيه اللي أدام الجامعة؟»

«طبعا.. المفروض عندي مُحاضرة الساعة 7:30 صباحًا بس مش هروحها»

«يبقى اتفقنا»

\*\*\*

رغم إني مش شخص مُحب للحفلات إلا إني كُنت سعيدة جدًا إني رايحة حفلة النهاردة، وبمجرد وصولي وأول ما لمحت ايان طلبت منه يجييلي حاجة أشربها، عادةً أنا مش بشرب عشان كده هو استغرب في

البداية لكن لما حكيتله اللي مریت بيه راح بسرعة  
عشان يعملی حاجة أشربها، جابلي كاس سكوتش ودا  
كان أول حاجة أشربها الليلة دي لكن مكانش آخر  
حاجة.

في مُنتصف الليل تقريبًا قررت أبص على تليفوني،  
ولقيت بريد صوتي من ليديا بعتهولي الساعة 11:04  
قبل مُنتصف الليل.

كانت بتقول:

(بيكا.. اسمعيني.. أنا.. إممم.. أنا اتخانقت مع مايك..  
عشان هو قرر يسبني وحيدة ويقضي الهالووين في  
حفلة مع أصدقائه.. لما قُلتله إنني خايفة أقضي الليلة  
في الغُرفة لوحدي ضحك وسخر مني وقال إنه  
هيروح هو وأصحابه يدخلوا الغُرفة عشان يثبتلي إنني  
مجنونة.. قال لي إنني مجنونة لو بصدق في الخرافات  
دي.. بس أنا مش مجنونة.. أنا خايفة ومش فاهمة إيه  
اللي بيحصل لنا في الغُرفة اللعينة دي)

انتهت الرسالة، رجعت تليفوني لشنطتي مرة ثانية، أنا مقدره جدًا غضب ليديا، بس اللي بيحصل دا مش هينتهي نهاية جيدة، مش هينتهي نهاية جيدة أبدًا!

دورت على إيان لحد ما لقيته وطلبت منه يرجعني الغرفة بتاعته، كنت مضغوطة جدًا، متوترة جدًا، تعبانة جدًا وسكرانة جدًا.

\*\*\*

صحيت الصبح الساعة 6 بالظبط على صوت المنبه، بذلت مجهود غير طبيعي عشان أقدر أخرج من السرير، لبست هدومي ورحت ناحية الكافيه، هناك لقيت آليس في انتظاري وأدامها كوبين من القهوة، ابتسمت لما شافتنى وقالت بلطف: «توقعت إنك بعد الحفلة هتحتاجي كوب قهوة كبير»

سألته بدهشة: «عرفتي مين إنني كنت في حفلة؟»

«من رسايك»

«أنا بعثتك رسايل الليلة اللي فاتت؟»

«آه.. تقريبًا الساعة 1 بعد مُنتصف الليل.. قُلتيلي عن أصحاب مايك»

حسيت بالإحراج وأنا بقولها: «يا إلهي!»

كملت كلامها: «الناس دول أغبياء جدًّا.. عارفة هُما كدا بيعملوا إيه؟ .. هيدخلوا الغُرفة (733) عشان كُّل حاجة بدأت من جواها.. لكن إنتي مُتخيلة الغُرفة بقالها أد إيه مقفولة؟.. مُتخيلة مدى جوع الكيان الشرير اللي جواها؟»

«تفتكري هُما في خطر؟»

«أعتقد آه.. لأن كُّل ضحايا الغُرفة دي كانوا جواها لوحدهم»

«يعني لو هُما مجموعة من الشباب سوا تأثير الكيان هيكون ضعيف عليهم؟»

«نظريًا آه لكن متنسيش إننا منعرفش حاجات كتير عن الكيان دا، منقدرش نعرف مصيرهم لو دخلوا جوا هيكون إيه.. عشان كذا إحنا محتاجين نتكلم مع موان»

«هو المفروض يوصل الساعة كام؟»

بصت في ساعتها قبل ما تقول بغضب: «المفروض إنه وصل من حوالي عشرين دقيقة!»

مشينا بسرعة ناحية باب مكتبه واترجينا السكرتيرة تسمح لنا نقابله ولو لدقايق، لكنها رفضت بمُنتهى البرود وهي بتقول: «للأسف السيد توم مش هيكون مُتاح النهاردة.. ولا أي يوم ثاني.. يبدو إن السيد توم أخيرًا تخلص من مضايقاتكم»

قُلتها بغضب: «إحنا مكناش بنضايقه.. إحنا بس كُنا عاوزين نتكلم معاه»

أليس عدلت عليًا: «ولسّه عاوزين نتكلم معاه»

قالت وهي بتنهي المُقابلة: «على أي حال مش هقدر  
أديكم أي معلومات شخصية عن السيد توم»

خرجنا من المكتب، سألت آليس: «هنعمل إيه  
دلوقتي؟»

قالت بيأس: «بدون السيد توم موان مفيش بإيدنا  
حاجة نعملها»

بخوف قلت: «آليس.. أنا مش هقدر أرجع الغرفة  
اللعينة دي مرة ثانية»

ابتسمت وهي بتقول: «النهاردة خصصوك غرفة  
جديدة»

«بجد؟»

«عرفت قبل ما أقابلك بس كُنت سايبهاك مُفاجأة..  
هتروحي جناح مورتون.. وليديا هتروح جناح  
تينسلي»



«الحمد لله»

«عندي كمان خبر كويس.. قدرت أقنع إدارة الجامعة  
يقفلوا الغرفة (734) ويقفلوا الجناح بالكامل»

«شكرًا جدًّا»

«الخبر السيء الوحيد هو إنك مش هتقدري تسببي  
الغرفة لحد يوم الإثنين القادم»

« هقدر أفضل مع إيان الأسبوع دا.. دي مش مُشكلة..  
لازم أبلغ ليديا»

طلعت تليفوني عشان أبلغ ليديا بالخبر دا، لفت نظري  
إن فيه رسالة جديدة في البريد الصوتي، شغلتها  
وفوجئت إنها تكلمة لرسالة ليديا اللي سمعتها إمبراح.

كانت بتقول:

(مش قادرة أتعامل معاه ثاني.. أنا راجعة الغرفة  
بتاعتنا وهقضي الليلة هناك.. متقلقيش عليّا.. هكون

بخير.. أنا سكرانة غاضبة بشكل كافي لاني أنام في  
الغرفة دي بدون ما أحس بالخوف.. هكلمك بكرة..  
(سلام)

انتهت الرسالة وقلت بغضب: «اللعنة»

ليديا بصتلي بدهشة، ففسرت ليها على طول: «ليديا  
نامت في الغرفة بمفردها!»

سألته بقلق: «هتكون بخير؟»

«طالما مدخلتش غرفة (733) أعتقد إنها هتكون  
بخير»

اتطمنت شوية وأنا بفتكر شباك الغرفة (733) المفتوح  
طوال الوقت وخوف ليديا من المرتفعات، آليس قالت:  
«ادعي إنها تكون بخير لأن مفيش بإيدينا حاجة تاني  
نقدر نعملها.. تحبي نشوف قسم الغرائب في  
المكتبة؟.. دي الحاجة الوحيدة اللي هنقدر نعملها  
دلوقت»

قُلتها بحماس: «يا ريت»

\*\*\*

أمينة المكتبة كانت ست عجوزة عندها تقريبًا ألف سنة، اسمها السيدة ستابلي، عينيها لونها رمادي، ضيقة وصغيرة، بشرتها مُجعدة، لكن رغم كل حاجة كانت لطيفة ومثقفة، لما سألتها على كتب بتتكلّم عن الشياطين والكيانات الشريرة دلّتنا على القسم الصحيح قبل ما تبصنا بنظرة غريبة.

الحقيقة رغم كبر المكتبة إلا إن الكتب اللي بتتكلّم عن الشياطين كانت قليلة جدًا، لكن أغلبها كان إما مالوش علاقة بموضوعنا أو مكتوب بلغة غير الإنجليزية، وفي أقل من نصف ساعة كُنّا واقفين أدام مكتبها مرة ثانية، سألتها: «عندكم أي كتب بتتكلّم عن السحر؟»

بصت لي بدهشة وهي بتقول: «السحر؟ .. آه.. هتلاقوه في القسم الخلفي ناحية الشمال»

آليس همستلي وإحنا ماشيين: «على فكرة هي  
مبتحبناش»

«مبتحبناش إحنا ولا مبتحبش الموضوع اللي بندور  
عليه؟»

«غالبًا الاتنين»

وفي أقل من ساعة كُنا أدام مكتبها للمرة الثالثة، المرة  
دي ما أخفتش ضيقها منا، سألتها: «عندكم أي كتب  
بتتكلّم عن ألواح الويجا؟»

وقفت وهي بتضيّ عينيها بغضب وبتقول: «شوفوا يا  
بنات.. أتمني تكونوا بتعملوا بحث خاص بدراستكم»

قُلتها: «آه. فعلاً»

آليس ببرود صلحت كلامي: «لا مش فعلاً.. مش بنعمل  
بحث خاص بالدراسة.. إحنا بنعمل بحث خاص بينا»

سألنا بفضول: «بحث خاص بيكم بخصوص إيه؟»

قُلتها: «متقلقيش.. مش هنلعب بلوح ويجا ولا هنأذي  
نفسنا»

قعدت مكانها تاني وهي بتقول: «تمام.. عشان أنا مش  
هسمح لدا يحصل مرة تانية»

آليس سألتها بسرعة: «مرة تانية؟!»

بان عليها الضيق والغضب ورجعت تاني ترتب  
مجموعة كُتب على مكتبها وهي بتقول: «أعتقد عندنا  
كُتب بتتكلّم عن ألواح الويجا»

آليس قاطعتها: «سيدة ستابلي.. إحنا بندور ورا اللي  
حَصَل في الجناح رايلي سنة 1961»

كملت كلام آليس: «واللي بيحصل من يومها لحد  
النهاردة»

قالت بغير اهتمام: «محصلش حاجة غريبة.. طالب  
انتحر في عُرفته.. بتحَصَل في كل الجامعات»

صلحتها كلامها: «مش طالب واحد.. خمس طلاب»

آليس سألتها بشك: «بس إنتي عارفة اللي حصل كويس.. أرجوكي قوليلنا إيه اللي حصل والموضوع بدأ إزاي عشان نقدر ننهيه»

بصت لآليس بغضب وهي بتقول باستنكار: «تنهيه؟! .. بلاش الغرور دا يا صغيرتي.. مش هتقدري تنهيه.. الناس بتنتحر في الغرفة دي.. وهيفضلوا ينتحروا للأبد.. اللي بيحصل مالوش نهاية.. اللي تقدرُوا تعملوه هو إنكم تبعدوا عن الغرفة اللعينة دي»

آليس قالتها: «طب يمكن لو عرفنا الموضوع بدأ إزاي هنقدر...»

قاطعتها بغنف وهي بتقول: «بدأ زي ما إنتي سمعتي.. بس كل اللي بدأوا الموضوع إما موتى أو عواجيز.. ابعدى عن الغرفة.. ركزي في دراستك»

قربت منها وعلى وشي نظرة غضب، قُلتها: «كان نفسي أبعد عن الموضوع بس في الحقيقة إدارة

الجامعة قررت تخصص ليّا أنا وصديقي الغُرفة  
المجاورة لغُرفة الانتحار.. إنتي مُمكن تنسي الموضوع  
بس إحنا مش هنقدر ننساه»

بان عليها الهدوء وهي بتقول: «عُمري ما أقدر أنسي  
الموضوع.. أعز أصدقائي إيلين كانت ضحية الغُرفة  
الأولى.. مش قادرة أنسي شكلها وهي بتجري على  
الشباك الضيق وبثقف على حافته وسط الرياح  
الباردة.. قبل ما تقفز من الطابق السابع»

آيس قالت وهي مُحرجة: «أنا آسفة.. مكنتش أعرف»

ابتسمت بخُزن وهي بتقول: «إنتي فتحتي جراح  
قديمة.. على أي حال نصيحتي ليكم تطلبوا تغيير  
الغُرف.. الطابق السابع بالكامل لازم يتقفل.. دا كُل اللي  
هقدر أقولهولكم»

وبرغم إننا ما استفدناش أي حاجة منها إلا إننا ابتسمنا  
في وجهها وخرجنا من المكتبة، على الأقل عرفنا شوية  
معلومات قُليلة.

قبل ما نبعد عن المكتبة حسيت إني مش عايزة أمشي،  
فيه حاجة مضايقاني في الموضوع، رجعت ليها ببطء  
وقُلتها: «سيدة ستابلي .. هو إنتي ليه قُلتني على  
شباك الغرفة (733) ضيق.. أنا شُفت الشباك وعارفة  
هو ضخم أد إيه»

ابتسمت وهي بتقول: «الغرفة اللي تُقصديها واللي  
شباكها كبير هي عُرفة المخزن.. الغرفة (733) هي  
الغرفة المجاورة ليها!»

قُلتها: «لا .. لا .. اللي جنبها عُرفة (734)»

قالت بخوف: «لا هُما أعادوا ترقيم العُرف بالكامل من  
فترة.. يعني العُرفة اللي إنتي بتقولي عليها عُرفة  
(734) هي العُرفة (733)»

يا إلهي!.. حسيت بخوف مش قادرة أوصفه.

آيس شهقت وهي بتقول بخوف: «ليديا!»



خرجنا من المكتبة بنجري زي المجانين، الطلاب  
يبيصوا لنا بدهشة وهُما مش فاهمين إيه اللي  
بيحصل، بمُجرد ما اقتربنا من المبني حسيت الدم  
نشف في عروقي، للمرة الأولى من يوم ما انتقلنا هنا  
الشباك بتاع عُرفة المُعدات يبقى مقفول وشباك عُرفتنا  
هو اللي.. هو اللي مفتوح!

جرينا لحد ما دخلنا المبني، بنبعد الطلبة عن طريقنا  
بجنون، وصلنا للمصعد وضعطنا رقم 7، وقفت أراقب  
باب المصعد وهو بيتقفل ببطء، سندات ضهري على  
جدار المصعد وأنا بسأل آليس: «إيه اللي بيحصل؟»

قالت بتوتر: «مش عارفة.. مش عارفة»

بخوف قلت: «هي نامت طول الليل.. لوحدها.. في  
عُرفة الانتحار»

هزت رأسها وهي مش عارفة تقول إيه!

وصلنا في النهاية للدور السابع، جريت بشرعة في  
الممر ناحية باب العُرفة، آليس بتجري ورايا، مسكت

مقبض الباب وأنا بدعي ربنا إن الباب ميكونش مقفول،  
وكان مفتوح!

ليديا بصت لي وأنا واقفة على الباب، ملامحها مليانة  
خوف ورعب، بمُجرد ما بصت في عينيها لمحة من  
الارتياح ظهرت على وجهها.

لكن للأسف.. إتأخرت!

جرت ناحية الشباك وقبل ما أتصرف.. قفزت.

صرخت وهي بتقع من الشباك.

وقفت مكاني مش قادرة أتحرك، سامعة صراخ الطلاب  
من تحت، آليس جرت لحد الشباك وبصت لتحت..  
على جثة ليديا.

ملامح آليس كانت كافية.. شحوب وجهها كان كفاية..  
الخوف اللي في عينيها كان كفاية.

سندت ضهري على الحائط وأنا بنهار.. ليديا .. أنا عارف ليديا كويس .. ليديا مُستحيل تنتحر.

الأرض كانت مليانة صور وأوراق، مسكت صورة منهم، صورة والدة ليديا.. كانت ميتة من فترة طويلة، صور كتير مالية الأرض، كلها لأم ليديا الميتة، يبدو إن ليديا كانت مشغولة جدًا الليلة الماضية.

لقيت لوحة على الأرض ليديا هي اللي راسماها، مش هقدر أقولكم هي إيه.. بس هي أشبع حاجة مُمكن تشوفوها وأكثر حاجة كئيبية مُمكن تمر عليكم.

آليس كانت بتصرّخ وبتقول حاجة، مش قادرة أسمعها، حاسّة إن الغُرفة كلها بتلف بيّا ومش سامعة أي حاجة، فجأة قطعة ورق اتحركت من تحت باب الخزانة، اتحركت ناحيتي، مسكتها وبدأت أفحصها.

كانت لوحة مرسومة، ليديا اللي رسمتها، بس دي مكانتش زي الرسمة الثانية، الرسم دا كان للخزانة بس

من وجهة نظر أخرى، الرسم كان للخزانة وهي مفتوحة وجواها وسط الظلام في كيان موجود.

حطيت الورقة على الأرض وقربت من الخزانة، فتحت الباب بالظبط زي الرسم، حاولت أبص جواها رغم الظلام، فجأة لمحت وجه شرير يبئصلي من وسط الظلام، قلبي كان هيقف من الخوف، حسيت بآليس بتشدني من إيدي وهي بتقول بخوف: «لازم نمشي من هنا»

\*\*\*

سبت الجامعة كلها، أهلي نقلوني من الجامعة دي لجامعة تانية، سبت كل هدومي وحاجتي هناك، مش عايزاهم، واتخرجت من الجامعة الجديدة.

كل ليلة من يومها بحلم بليديا، بتحاول تقفز من الشباك الضيق، الرياح باردة وجسمها بيترعش، بشوف نظرة الخوف في عينيها وهي بتبص على الأرض من ارتفاع سبع طوابق قبل ما تقفز، عينيها مليانة خوف.. رافضة اللي بيحصل.. بتحاول تتحدى قدرها، سامعة

صوت دقات قلبها و حاسّة بخوفها ورعبها، بحاول  
أكلمها.. أحذرها.. أمنعها بس بدون فايدة.

بعيش نفس الحلم كل ليلة.

بتبصلي بخوف.. ببيان على وشها الارتياح ..بتلف  
وشها و بتقفز بدون تردد.

أنا بحكيلكم الحكاية دي بعد ما حصلت بتسع سنين  
لسبب مهم.. إدارة الجامعة فتحت الطابق السابع مرة  
تانية.. إدارة الجامعة سمحت لاتنين طلاب يسكنوا  
في الغرفة (734) مرة تانية.

أرجوكم انشروا القصة عشان توصلهم.

يمكن نقدر ننقذ حياتهم!

\*\*\*

## 3- الحَمَام

مش عارف أخرج من الحَمَام!

من حوالي نصف ساعة دخلت الحَمَام عشان آخذ شاور، لما خلصت نشفت جسمي ولبست هدومي وفتحت الباب وخرجت، لقيت نفسي لسه جوا حَمَامي.. واقف أدام الباب المقفول وبيصله بدهشة.

وقفت مكاني حاسس بالحيرة وبحاول أفهم إيه اللي بيحصل، بعد لحظات من التفكير قدرت أقنع نفسي إني وبكل بساطة تخيلت اللي حصل مش أكثر، عشان كدا تجاهلت اللي حصل وقررت أجرب مرة ثانية.

مسكت مقبض الباب، فتحته، خرجت، ولتاني مرة ألقى نفسي لسه جوا حَمَامي.. واقف أدام الباب المقفول!

اللي حكيتة لكم دا بيحصل في كل مرة بحاول أخرج من الحَمَام فيها، أنا باخد تليفوني معايا وأنا باخد

شاور، أنا عايش لوحدي وبخاف يحصل ظرف طارئ  
 وحد يحاول يوصلني أو أنا أحاول أوصل لحد.. باخده  
 معايا تحسبًا لأي ظرف، عشان كذا أول حاجة فكرت  
 فيها هي إني أتصل بأهلي، والدي مردش عليا.. والدتي  
 ردت.

حاولت أشرح لها الموقف بس هي مش قادرة تفهم  
 اللي بقوله، كل اللي فهمته إني محبوس جوا الحمام  
 والباب مش عاوز يتفتح، أو إن حصل حاجة فالقفل  
 اتكسر وحبسني جوا، حاولت أفهمها فقاطعتني  
 وقالتلي إنها هتكون في البيت عندي في أسرع وقت  
 ممكن، هي ساكنة على بُعد 15 دقيقة من عندي، على  
 أي حال أنا قاعد في انتظارها.

قعدت على طرف حوض الإستحمام ببص على باب  
 الحمام المفتوح، كل حاجة شكلها طبيعي.. المقر..  
 اللوحة المتعلقة أدام باب الحمام.. باب غرفة نومي  
 مقفول زي ما سبته.. السلم واضح في نهاية الممر.. كل  
 شيء شكله طبيعي.

خرجت من الباب بخطوات بطيئة عشان ألاقى نفسي  
جوا الحَمَام وبئص للباب المقفول، أول حاجة عملتها  
إني رجعت قرّيت آخر فقرة كتبتها، الباب مفتوح وكل  
حاجة طبيعية.. أنا مش مجنون.. أنا مش بيتهيا لي!

سمعت صوت رسالة، كانت والدتي بتسألني إذا كنت  
في البيت أو لا، قُلتها إني موجود ولسه محبوس في  
الحَمَام، ودا باقي الرسايل اللي بيني وبينها عشان  
تقروه بنفسكم.

والدتي: هو إنت ليه مبتردش عليا؟

أنا: يعني إيه؟

والدتي: إنت في الحَمَام أصلاً؟

أنا: آه.. محبوس جوا زي ما قُلتك.. إنتي فين؟

والدتي: أنا على باب الحَمَام بنده عليك.. وإنت  
مبتردش عليا.



أنا: أنا مش سامعك.. استني.. هحاول أفتح الباب..

فتحت الباب، شايف الممر والأبواب والسلم، بس والدتي مش موجودة، حاولت أخرج من الباب لكن كالعادة وزى كل مرة لقيت نفسي جوا الحَمَام بيُص للباب المُغلق.

والدتي بعتتلي إنها بتحاول تفتح الباب من ناحيتها لكن يبدو إنه مُغلق من الداخل، حاولت تبص من تحت عقب الباب لكنها مش شايفة حاجة غير الحَمَام الفاضي تمامًا.

فاضي!!

أنا مش فاهم إيه اللي بيحصل ومش عارف هخرج إزاي، بحاول بكل جُهدني أقنع والدتي إني فعلاً جوا الحَمَام وإنه مش فاضي ولا حاجة، قالت إنها اتصلت بنجار هبيجي يفك الباب، بس أنا خايف.. خايف يفتحوا الباب يلاقوه فاضي زي ما والدتي قالت، ولو دا حصل أنا هفضل محبوس هنا للأبد.

مفيش هنا ولا فيشة، ولو فيه فالشاحن بتاع التليفون مش معايا على أي حال، تليفوني هيفصل شحن قُريب، هو دلوقتي 24%، لو دا حَصَل أنا هفقد أي وسيلة للإتصال مع العالم الخارجي .. للأبد.

مش عارف أعمل إيه؟!

والدتي سابت البيت عشان تجيب النجار، مش عارف المفروض دلوقتي أعمل إيه أو أتصرف إزاي، حاولت أكسر الباب بنفسي، أنا عارف إني مش هنجح بس قررت أحاول، قرريت مرة في واحد من المواقع إن الطريقة الأقوي لكسر باب هو استخدام رجلك مش استخدام كتفك، لكن الباب كان أقوى مني ورفض يستجيب لركلاتي.

شباك الحمام صُغِير.. مش عارف هقدر أمر من خلاله و  
لا لأ..!

هحاول.

الشِّبَاك رافض يتفتح هو كمان، مش عارف إيه السبب  
لكنه مقفول بقوة، الحقيقة أنا من يوم ما سكنت هنا  
مبحاولش أفتحه، مهما حاولت أفتحه.. بكل الطُّرق..  
مش هيتفتح.

لا.. لا.. اتفتح أهو.

أول مرة ألاحظ الظلام الدامس اللي مسيطر على  
الدنيا برا، بس الظلام لسه بدري عليه.. إحنا في  
مُنتَصَف اليوم.

بيُص في كل مكان بيأس، بدور على أي حد، بس  
مفيش حد.. مفيش غير الظلام.. الصمت.. الصمت  
كمان مسيطر على كل حاجة بطريقة غريبة، حاسس  
بإحساس غريب جدًا مش قادر أوصفه ليكم، أنا هخرج  
من الشبّاك واللي يحصّل يحصّل.

الشبّاك مقفول.. واقف جوا حمّامي بيُص للشبّاك  
المقفول بدهشة، إيه اللي بيحصل!!

أنا قاعد على الأرض دلوقتي.. بعيد عن الباب والشباك  
على أد ما أقدر.

والدتي رجعت ومعها النجار، كسر المفصلات وفك  
الباب من مكانه، و الحَمَام كان فاضي.. أنا مش جوا..  
مش قادرين يشوفوني، والدتي بعتتلي صورة لحَمَامي  
الفاضي عشان تثبتلي كلامها، غاضبة مني وبتتهمني  
إني بهزر هزار سخيف، ومن ساعتها مش بتزد على  
رسايلي أو مُكالماتي.

تليفوني دلوقتي وَصَل 14%، مش عارف هقدر أخرج  
من هنا ولا لا، دي آخر فرصة أودع أهلي طالما هُما  
قررُوا ميردوش على رسايلي أو مُكالماتي.

سامع صوت زئير وحشي مُخيف من ورا الشباك، مش  
هفتح الشباك دا مهما حَصَل.

ملحوظة: تليفوني دلوقتي 1%.. لو قدرت أخرج  
هعدّل البوست.. لو مخرجتش.. مش عارف..

توضيح :

اللي بيحصله هو ظاهرة روحانية آسيوية شهيرة اسمها (Gui Da) Qiang وبكل بساطة بيقولوا إن اللي بيتعرض للتجارب دي الأرواح الهائمة في الأرض بتنجح في حبسه في بُعد مُختلف خاص بيهم و بيتلاعبوا بيه.

من أشهر القصص اللي بتتكلم عن الظاهرة دي هي قصة السائق اللي قرر يقود الشاحنة بتاعته عشان يقضي العيد وسط أهله، بدأ بعد ساعة تقريبًا من القيادة يلاحظ إن الصمت والظلام مسيطرين على الطريق تمامًا ورغم إنه ماشي على طريق عام مشهور بالزحام طول الوقت إلا إنه فجأة لقي نفسه لوحده على الطريق.

ورغم الظلام قدر بعد شوية يلاحظ ملامح الحي بتاع أهله، بعد شوية بدأ يلاحظ تكرار ظهور الحي.. تكرار ظهور علامات الطريق.. كل حاجة بتفرد عليه تاني كأنه بيسوق في دايرة مالهاش نهاية.

بعد شوية بدأ يلّمح ظلال رقيقة بتتحرك وسط الظلام، في البداية أقنع نفسه إنهم أشخاص عاديين، بعد شوية زهق من القيادة بشكل دائري فقرر يوقف شاحنته ويشوف إيه اللي بيحصل، بس قبل ما ينزل من عربيته لَمَح حاجة لونها رمادي بتتحرك بسرعة وسط الظلام بشكل مُخيف.

ساعتها قرر يرجع يسوق تاني وإنه طول ما هو جوا شاحنته حاسس بالأمان، بعد شوية بدأ يلّمح حركاتهم المُخيفة في كُل مكان حواليه في الظلام، سمع أصوات زي الزئير الوحشي لكن لَمَّا ركز سمع مجموعة أصوات بتقول بزئير مُخيف: «تعالى.. تعالى.. تعالى»

وزيه زي اللي حكالنا القصة بتاعة الحَمَام.. اختفي بدون أي أثر ومازالوا الاتنين حتى الآن في عداد المفقودين.

بس خلينا نرجع مرة تانية للظاهرة الشهيرة ب (gui da qiang) و اللي بيفسروها بالأشباح التي تبني

الجدران، وبكل بساطة بتعني وجود شخص مش قادر يغادر مكان ما بسبب الأشباح أو الأرواح الهائمة.

من أشهر الأماكن اللي بتحصل فيها الظاهرة دي هو مستشفى شانغي الشهير بسنغافورة.

الشخص اللي بتحصله الظاهرة الروحانية دي في البداية مبيكونش فاهم إيه اللي بيحصل، كل اللي بيكون مُدرکه هو إن فيه حاجة غلط بتحصل، خصوصًا لو المكان اللي هو مُحاصر فيه بيتكرر سواء كان مكان ثابت (زي الحَمَام اللي في قصتنا) أو مُتحرك (زي الطريق في القصة المُختصرة اللي في بداية التوضيح)

المدة الزمنية للظاهرة بيتحكم فيها الكائن المُحاصر للشخص، مُمكن يتلاعب بيه لساعات وبعدين يسببه يرجع مرة ثانية لبيئته الطبيعية ومُمكن الموضوع يستمر لأيام وشهور وسنوات!

شوية معلومات عن الظاهرة دي:



1- الظاهرة دي غالبًا بتحصل في الأماكن اللي بتسكنها أو بترتاها الأرواح والأشباح والكيانات الخارقة.

2- وجود علامات ودلالات مُحددة على إمكانية حدوث الظاهرة دي.

3- الدقائق الأولى لحدوث الظاهرة قد لا تكون واضحة عشان كذا لازم التدقيق في البيئة المُحيطة بك.

4- الصمت التام من العلامات الأساسية لحدوث الظاهرة.

5- عند تعرضك للظاهرة دي التزم بالمكان اللي لقيت نفسك فيه ومتحاولش تبعد.

6- لا داعي للخوف ولا تحاول الهرب ولا تصنع أي ضوضاء.

7- مهما حَصَل.. متبُصش وراك!



8- اقلع كل هدومك والبسها بالمقلوب.

9- بُص من بين رجلك.

10- لَمَّا ترجع البُعد بتاعك تاني وتتخلص من حصار الأرواح.. اترك المكان دا فورًا.

\*\*\*

## 4 - حقيقتان

فيه حقيقتين لازم تكون عارفهم كويس جدًا..

الحقيقة الأولى: لما بتحاصر إنسان في ركن، بيحس باليأس، لازم متقللش من ردود فعله وهو في حالة اليأس والضعف دي، ولازم تبقي عارف إنه مُستعد يعمل أي حاجة عشان يهرب.

الحقيقة الثانية: لو عرض جالك ومُغري جدًا لدرجة خوفتك.. خاف.

في الحقيقة أنا مش الشخص اللي بيسدي لغيره نصائح، لو هكتب مذكراتي هسميها (مذكرات أبله)، لكن بعد الموقف اللي حصلني بقي عندي خبرة مُعينة نتيجة مروري بتجربة مُعينة.

الموضوع بدأ بمجموعة أخطاء بسيطة وشوية سوء حظ.

من حوالي عشر سنين تقريبًا، كُنت يدوب لسه متخرج من الجامعة وبحاول أبدأ حياتي زي أي شاب في سني، كُنت شاب أعزب.. مثقف.. واعي، فيا كل المقومات اللازمة عشان أنجح في حياتي، هو صحيح موضوع إني أعزب مالوش علاقة بالنجاح من عدمه بس يعني أغلبكم هيفهم قصدي، بس زي ما أوسكار وايلد قال مرة: «أنا أقدر أقاوم أي حاجة .. إلا الإغراء»

آه.. أنا قُلتكم إني مُثقف.

وأدمنت...

ما أدمنتش المُخدرات.. ولا الجنس.. ولا أي حاجة من اللي في دماغكم، أدمنت القمار، القمار اللي كان بيمدني بأروع تجربة في حياتي، وللأسف مبقيتش قادر أبطل أروح الكازينوهات وصلات القمار ليلة بعد ليلة، لما بفتكر دلوقت بشوف أد إيه كُنت ساذج وأبله، أعمى بيجري ورا لذة فوز مش هيحققها، أحمق مش مُدرك إن القاعدة الوحيدة في صالات القمار هي إن الصالة هي اللي بتكسب.. دايماً.

عشان أختصر لكم القصة ومتازها قوش مني، كان عندي 24 سنة وكنت مديون لمجموعة كبيرة من أصحاب صالات القمار، مجموعة وحوش زي ما كنت بسميهم، وحوش مش قادرين يصبروا عليًا لحد ما أكسب وأرد لهم كل فلوسهم، ساعتها كنت مضطر أشتغل وظائف أخجل عن ذكرها بس عشان أجمع بضع مئات من الدولارات عشان أكمل لعب، دا جزء بسيط أوي من المُستنقع اللي سمحت لنفسي بالوقوع فيه.

وفي الوقت دا كل ما كنت بجمع فلوس كنت بشوف إن الأفضل لو أروح أقامر بيهم في غرفة خلفية قذرة من حانة رديئة المستوى أكثر من إني أحسن حياتي، ودا بالضبط اللي كنت بعمله، وفي أبدأ حانة ممكن تتخيلها.. وبمساعدة أردئ نوع خمور ممكن تتوقعوه حصلتلي التجربة دي، شربت لحد ما خلاص مبقيتش فاكرا أو مركز في أي حاجة.

الحاجة اللي فاكرها بعد كدا هي إني بصحي ألاقي نفسي مرمي في بركة مياه راكدة قذرة في شارع خلفي مجاور للحانة، كنت متعود إني بهين نفسي كل

ما بسكر، اللمة اللي منورة الشارع بتعمل صوت أزيز  
مزعج، بس الماء البارد القذر تحت وشي مزعج أكثر  
منه، والاتنين اتجمعوا عشان بفوقوني شوية.

وقتها.. وفي واحدة من أسوأ لحظات حياتي.. قابلته

«أهلاً يا صديقي»

صوته كان مليان استمتاع و فرحة وهو بيكمل:  
«شكلك محتاج مُساعدة ولحُسن حظك أنا هنا»

حسيت بقبضة قوية بتمسكني من أكتافي، بيشدني  
عشان أتعدل وأقف على رجلياً، سندنني على الحائط  
ولأول مرة قدرت أشوفه وأشوف تفاصيله.

أول حاجة جت في دماغي إني بهلوس خصوصاً إن  
شكله كان غريب وغير مُناسب للموقف أو للمكان.

طويل، نحيف بشكل غريب، جسمه هزيل، البدلة  
البيضاء تماماً اللي لابسها ساهمت بشكل كبير في إن

شكله يبقي غريب، رأسه مش كبيرة وشعره أسود  
كثيف ومفروق من النص.

عشان أكون صريح معاكم أول فكرة جت في دماغها  
ساعتها كانت: اللعنة.. أنا مُت.. دا ملاك الموت جاي  
يُقبض روعي.

لكن للأسف كُنت مُخطئ تمامًا.. للأسف كُنت لسه حي.

بصلي في عينيا وهو بيقول بابتسامه: «متقلقش يا  
صديقي.. هتبقي أحسن.. هتحس بإحساس مالوش  
مثيل خلال لحظات.. متقلقش»

لحد دلوقتي كُنت مُقتنع إنه نصاب أو بيحاول  
يخدعني خصوصًا بعد ما شُفت اللمعة المُخيفة اللي  
بتسري في عينيه، عينيه فيها نظرة غريبة أوي.

قال بصوت عالي، رغم إنني مُعتقد إنه كان بيكلّم نفسه:  
«حاجة مُخرجة جدًا إن حد يشوف حد في الحالة  
دي.. بس على الرغم من كدا.. مُساعدة الأشخاص  
بتخليك تجس بشعور جميل»

سألته بخوف وأنا لله حاسس بدوار: «إنت مين؟»

ابتسم وهو يبصلي في عينيا بإصرار ويقول: «إنت بتسأل الشخص الغلط يا صديقي.. هقولك أنا مين لو أعرف أنا مين.. صدقني»

سكت شوية و قبل ما أعلق سألني: «إنت مين؟»

الدوار مسيطر على راسي ومش عاطيني فرصة أفكر، قُلتله: «نيت .. نيت ويلسون»

قال بحماس: «يا إلهي.. اسمك رائع»

ضحك جدًا كأنني قُلتله أسعد خبر سمعه في حياته وكمل: «نيت ويلسون.. اسم له نعمة مميزة.. اسمك رائع جدًا.. إنت محظوظ يا نيت.. محظوظ لأنك بتمتلك اسم رائع زي دا»

قُلتله باستغراب: «شكرًا»

فترة صمت طويلة، مش عارف المفروض أقول إيه في موقف زي دا، وهو واقف بيُصلي بابتسامة غريبة بدون كلام، بيبتسم ابتسامة مُخيفة، بيستني بصبر كأن أنا اللي لازم أتكلّم.

قُلتله: «بُص .. أنا مقدر جدًّا مُساعدتك ليّا يا صديقي»

قاطعني بفرحة وهو بيسأل: «استنى.. إنت بتعتبرني صديقك؟»

«إنت أنقذتني من إني أنام وسط بركة مياه قذرة طول الليل.. فأعتقد آه .. إحنا أصدقاء»

اللي هقوله دا مُمكن بيان غريب جدًّا لأن أنا نفسي استغربت لما حَصَل، لكن لما قُلتله كدا قفز في الهواء ببهجة وهو بيصفق بفرح مش طبيعي، تخيلوا المشهد.. رجل بالغ في زقاق قذر خلف حانة رديئة بيتنطط من الفرحة، حاجة مش مُمكن تكون طبيعية أبدًا.



قال بفرحة: «دي حاجة رائعة جدًا.. أمر رائع إنك تقدر تتعرف على أصدقاء جُداد»

مد إيدِه أدامه وهو بيضحك ويقول: «سَلِّم عليَّ يا صديقي»

ولأن الليلة كانت غريبة بشكل كافي قررت أكمل غرابتها وسلمت عليه، ضحك وهو يقول: «أيوا كدا.. تعرف.. أنا مؤمن إن بقوة الصداقة كل شيء مُمكن»

بيتكلم زي الشخصيات الكارتونية، بس شكله برئ ومفيش منه خطر، صحيح هو غريب الأطوار لكن مفيش فيه حاجة تخوِّف، ولأني كُنت سكران كفاية ما أخذتش بالي إني المفروض أقلق لأنه لحد دلوقت مقاليش اسمه، قبل ما أكمل تفكير قالي: «أنا هكون صريح معاك جدًا يا نيت.. أنا مقابلتكش بالصدفة.. أنا متابعك لسبب»

قلبي كان هيقف، كُنت حاسس إن فيه حاجة غلط، دلوقتي هيطلع سكين ويطعنني أو يدبحني، كُنت

عارف إن الأمر مش طبيعي، قُلتله بخوف: «بما إنك قررت تكون صريح معايا.. هل السبب اللي مخليك تتابعني هو إنك تقتلني؟»

في البداية علامات الصدمة ظهرت على وجهه.. لكن بعد كدا ضحك بجنون.

قال من وسط ضحكاته: «وهحتاجك تبقي صديقي ليه لو هقتلك؟»

«يمكن كنت عاوز تطممني»

«نيت.. مُستحيل.. هاهاها.. إنت طيب جدًا يا صديقي.. متفهمنيش غلط.. بس أنا مش قاتل ولو أنا قاتل فإنت مش نوع الضحايا المُفضل بالنسبة لي»

«أمال واحد زيك هيعوز إيه من واحد زيي؟»

«هممممم»

سكت فجأة، كأنه بيدور على الكلام المناسب، و بعدين  
قال فجأة: «الحانة.. إنت فاكر حاجة من اللي حصل  
جوا؟»

قُلتله وأنا بحاول أفكر: «لا .. أنا حاسس إن فيه  
حاجة مهمة حصلت بس مش فاكرها»

قال وهو باصص في الأرض: «إنت كُنت بتكلم النادل  
بصوت عالي.. أنا مكنتش بتصنت عليك على فكرة..  
إنت اللي كان صوتك عالي.. كُنت بتحكيله عن حاجة  
لها علاقة بمشاكلك المادية»

كُنت ناسي كل حاجة بس بمُجرد ما بدأ يحكي بدأت  
أفكر تفاصيل بسيطة، كُنت بتكلم مع لنادل عن  
ديوني وانفعلت وبدأت أشتم وأسب، فطردوني من  
الحانة، قُلتله وأنا حاسس بالإحراج: «متقلقش عليا..  
دي مُشكلة أنا هعرف أحلها»

«بس متزعلش مني.. طريقة كلامك وانفعالك جوا  
بيقولوا إنك متعرفش تحلها»

قُلتله بغضب: «دي مش مُشكلتك»

سكت تمامًا، حط إيده في جيبه، حسيت إنه هيطلع سلاحه عشان أغضبته. قال بهدوء: «إنت أعز أصدقائي يا نيت.. والأصدقاء بيساعدوا بعض.. صح؟»

خرج إيده من جيبه وهو ماسك رزمة دولارات كبيرة وبيسألني: «دول كفاية؟»

في اللحظة دي كُنت بدأت أعتاد على الجنون اللي الأمر ماشي بيه، شخص أول مرة أشوفه بيقول إنه صديقي المفضل وبيعرض عليًا مبلغ ضخّم، قال بهدوء وبابتسامة: «عشرين ألف دولار»

قُلتله بدهشة: «أنا.. أنا مقدرش أقبل مبلغ زي دا»

ابتسامته بقت أوسع وهو بيقول: «من فضلك خدهم.. إنت محتاجهم أكثر مني»

كُنت يائس.. يائس والحياة محاصراني في ركن.

الحقيقة الأولى: لَمَّا بتحاصر إنسان في ركن، بيحس باليأس، لازم متقلش من ردود فعله وهو في حالة اليأس والضعف دي، ولازم تبقي عارف إنه مُستعد يعمل أي حاجة عشان يهرب.

سألته السؤال الوحيد المنطقي اللي مُمكن حد يسأله:  
«بس ليه؟»

ابتسم وقال بهدوء: «عشان أنا حبيتك.. وعشان أنا بحب أساعد الناس»

«بس إنت يدوب لسه مقابلي حالاً»

«وايه يعني؟.. الصديق صديق في كل المواقف.. إنت ليه عاطي للموضوع أكبر من حجمه»

لزقت ضهري في الحائط وأنا بيص للفلوس، الموضوع أكبر من إني أقدر أرفضه، أخذت الفلوس وإيدي بتترعش، وقُلتله: «هرجعهم.. هرجع كل بنس منهم.. أقسملك»

ضحك من قلبه وهو يقول: «مش مُهم ترجعهم.. أنا مش محتاجهم نهائياً.. خدهم وصلح حياتك.. بس اوعدني تبطل قمار»

كُنت بيكي، بيكي بخُزن غريب، كرمه كان أكبر من إني أحتمله، قُلتله بصدق: «أوعدك مش هلعب قمار في حياتي أبداً»

حضنته وأنا بترعش، حُضن طويل وصادق جداً، همستله: «شكراً.. شكراً بجد»

ضحك وهو يقول: «إحنا أصدقاء.. مفيش بيننا كدا»

قالي: «قبل ما تمشي عاوز أديك ورقة.. حاجة كتبتها في الحانة.. حاجة مُمكن تساعدك»

كان ماسك في إيده قطعة ورق صُغيرة، مطوية على نفسها، مفكرتش أفتحها وقتها، حطيتها في جيبى مع الفلوس وأنا بشكره مرة تانية، ربنا وحده يعلم أنا أد إيه كُنت محتاج الفلوس دي، بس مكنتش هقدر أخذها من غير ما أديله حاجة في المُقابل.

قُلتله: «إنت أكيد عاوز مني حاجة بالمُقابل.. أؤمرني يا صديقي.. قول أي حاجة وأنا هعملهالك»

ابتسم ابتسامة عريضة كأنه كان مستني كلامي، قال: «دا عرض كُله كرم بصراحة.. عمومًا سيب الموضوع ليّا.. هفكّر وأقولك»

خلص كلامه ومشى وهو بيغني أغنية شهيرة أوي: «Sunshine, Lollipops and Rainbows»

بضحك وأنا بكتبلكم دلوقت.. بضحك على غبائي.. للدرجة دي كنت مغفل.

سألته وهو على أول الشارع: «هقدر أدي إيه لشخص بيملك كل حاجة»

بصلي وهو بيصلح الجملة: «بيملك كل حاجة تقريبًا.. تقريبًا»

وبمُنْتَهَى البساطة اختفي فجأة زي ما ظَهَر فجأة،  
حاجة غريبة.. مش كدا؟

إزاي شخص غريب يقدر يؤثر في حياتك كُلها بالشكل  
دا، يظهر فجأة و إنت يائس مُهدَّم ويختفي فجأة  
وإنت مُنتعش بالأمل، لحظة نور وسط ظلام دامس  
لكنها كانت كافية.

بواسطة الفلوس اللي هو إدهالي، دفعت الديون اللي  
كانت عليا لكازينوهات وصالات القمار، وتبقى مبلغ  
كبير، أقسمت إنني مش هقامر مرة ثانية في حياتي لو  
مكانش عشان حياتي فعشان الوعد اللي وعدتهوله.  
ومن يوم ما قابلته لحد النهاردة وطوال العشر سنين  
دول مقامرتش بولا سنت.

بمُجرد ما فضيت وبالي بقي رايق قررت أشوف الورقة  
اللي إدهالي، كانت قطعة ورق بيضاء مفيش فيها أي  
حاجة مُميزة بالنسبة لي، مُجرد مجموعة تواريخ من  
2007 لحد 2017، كل تاريخ مكتوب أدامه جُملة  
قصيرة، لكن بمُجرد ما ركزت شوية وبدأت أقرأ



التواريخ والجمل المُقابلة ليها عرفت حقيقة واحدة  
بس.

الغريب دا مكانش إنسان.

لا.. كان حاجة تانية.

اللي كان في الورقة كان مجموعة أوامر وتعليمات، كل واحد من التواريخ مكتوب بالتفصيل المُمل.. اليوم.. الساعة.. الدقيقة وحتى الثواني، مكتوب مكان مُعيّن لازم تتواجد فيه في التوقيت دا عشان تحقق أكبر قدر مُمكن من النجاح في الأمر المطلوب منك، بعض التواريخ أدامها نصائح خاصة بأسهم شركات في البورصة، بالطبع دا دلوقتي مالوش أي معني لكن في الوقت المُحدد اللي مكتوب دا هيكون مُهم جدًا، سايبلي عنوان بيت مُعيّن لازم أشتريه في وقت مُحدد، كاتب كمان السعر اللي لازم أدفعه، محددلي نوع الملابس اللي لازم ألبسها.. الوظائف اللي لازم أقبل بيها وحتى الأصدقاء اللي هصاحبهم.

خمسة أكتوبر 2009... مقهي ستارباكس اللي في وسط المدينة... الساعة 3:51:17 مساءً.. قابل جيسي أوبراين.

التاريخ دا كان بعد سنتين، جيسي أوبراين بعد وقت قليل اتجوزتها وبقت جيسي ويلسون، الشخص الغريب دا كان مخطط لي إني أقابل حبيبتي وزوجتي وفتاة أحلامي، محددلي المكان والزمان، الموضوع ما أخذش مني أكثر من ابتسامة لطيفة بس لما عينيا جت في عينها.

استثمرت في الأسهم اللي هو مختارها، قدرت أتفادي مفاجآت البورصة، بعدت عن الأسهم الخاسرة، وقبل ما أعرف كانت ثروتي بتتضخم وبتكبر.

الثامن من يونيو 2011... اشتري البيت الموجود في 10 شارع أسبر... شراء مش إيجار... الساعة 6:14:43 مساءً.

وسمعت كلامه، وانتقلنا أنا وجيسي من بيتنا المتواضع لبيتنا الجديد الضخم، بيت مش مُمْكِن كُنْتُ في يوم أحلَم أمشي من جنبه حتى، كُنَّا أغنياء.. صحتنا كويسة.. بنحب بعض وحياتنا مُستقرة، بس رغم كذا كُنْتُ حاسس إن فيه حاجة ناقصة.

السابع عشر من أغسطس 2012 ... هتخلف إنت وجيسي.. الساعة 8:31:19 مساءً.

بنتنا الجميلة أبريل نورت الدنيا وملت حياتنا بهجة، اسمها مش أنا اللي اخترته، الغريب هو اللي إختاره، في اللحظة اللي بكتبلكم فيها بقى عندها أربع سنين، وأبريل هي أكثر حاجة حبيتها طول حياتي.

الغريب، الشخص اللي شُفته لَمُدَّة أقل من ساعة في حياتي كان بينظم وبيخطط لحياتي بالكامل بأفضل شكل مُمْكِن، بدون أي دافع يجبره على فعل دا غير طبيته وحبّه لمُساعدة الآخرين، أنقذ حياتي وخلاها تتجه للأحسن، ورغم إنني لَمَّا شُفته كُنْتُ سكران و خايف إلا إنني فاكر كل حاجة فيه.. وبالتفصيل.

عشان كدا لَمَّا كُنْتُ خارج من السوبر ماركت شايل طلبات البيت، سمعت صوت حد بيغني أغنية شهيرة أوي: «Sunshine, Lollipops and Rainbows». كان ماشي ورايا وقریب مني، وعلى طول افكرت الصوت دا.

«أشعة الشمس، المصاصات وقوس قزح، كل ما هو رائع أشعر به عندما نكون معاً!... أكثر إشراقاً من بنس محظوظ، عندما تكوني بالقرب مني يختفي المطر، عزيزتي أشعر أنني بخيراً!»

بدون أي تردّد لفيت عشان أواجهه، ورغم مرور عشر سنوات إلا إنه كان زي ما هو، الزمن مقدرش يسبب علامات عليه، نفس البدلة البيضاء اللي محاوطة جسمه النحيف، زي ما هو من يوم ما تقابلنا.

قال آخر كوبليه في الأغنية بابتسامه: «فقط لكي تعرف أنك ملكي!»

قُلتله وابتسامة سعادة ضخمة بتظهر على وجهي: «يا الله .. إنت»

فتح إيديه وهو يقول بضحكة: «صديقك الوحيد المخلص.. طمني جيسي عاملة إيه؟»

فتحت فمي واستعديت عشان أجاوب، لكن قبل ما أنطق بكلمة رفع إيده بأدب و شاورلي أسكت تمامًا، كمل كلامه: «أنا مش مصدق إني عدى عشر سنين.. العُمر بيجري.. على أي حال أنا جيت عشان عرفت أنا عاوز منك إيه»

قُلتله بدهشة: «مش فاهم!»

قال بصوت هادي: «من عشر سنين إنت قُلتلي قول أي حاجة وأنا هعملهاك.. وأنا قُلتك هفكر في العرض.. أنا دلوقتي عرفت أنا عاوز منك إيه»

قُلتله وأنا حاسس بإستغراب: «آه طبعًا.. مبسوط إنك هتطلب مني حاجة أعملهاك.. ها.. قولي.. تؤمرني بإيه؟»

ابتسم ابتسامة واسعة شبه اللي ابتسمها أول مرة  
 إتقابلنا بالظبط، كَمَل كلامه: «رغم مرور وقت طويل يا  
 صديقي إلا إني فكرت كويس في اللي أنا محتاجه  
 منك يا نيت»

سكت ثواني وبعدين قَرَب مني وهو بيقول بنبرة  
 غريبة: «نيت .. أنا عاوز منك اسمك»

كُنت على وشك أضْحَك بس فجأة حسيت إنه مش  
 بيهزر، دا بيتكلم جد، بجد جدًا، سألته بدهشة:  
 «اسمي؟»

قال وهو بيبتسم: «نيت .. إنت عارف إني بحب اسمك  
 من زمان .. اسمك رائع .. تعرف .. أنا عُمرِي ما كان ليَّا  
 إسم خاص بيَّا .. دا كان دايماً بيحسني إني أقل من  
 الكل .. طول عُمرِي عاوز اسم .. ومؤخرًا قررت إني  
 عاوز اسمك .. أنا هاخذ اسمك»

الشخص دا هو السبب في كُل حاجة أنا وصلت لها، هو  
 السبب في إني بطلت قمار وهو السبب في إني قابلت

حُب حياتي، كُل حاجة حصلتلي أنا مدين بيها ليه،  
وبصراحة بعد كُل دا صعب أرفض له طلب بسيط زي  
دا

قُلتله بابتسامه: «طبعًا يا صديقي.. من النهاردة إنت  
نيت ويلسون»

حضني بقوة وهو يقول: «إنت مش مُتخيّل إنت  
فرحتني إزاي دلوقتي»

قُلتله بارتياح: «دي أقل حاجة أقدر أعملهاك»

مد إيده وهو يقول بابتسامه: «سَلِّم عليّا عشان  
اتفاقنا يبقي رسمي»

وسلمت عليه.

كُل واحد فينا راح لطريقه، أنا مشيت ناحية بيتي وهو  
مشي ناحية المدينة، كان بيغني وهو سعيد، كُنت  
مرتاح وسعيد إنني أخيرًا قدرت أسد الدين، دلوقت  
أقدر أنام وأنا مرتاح.



\*\*\*

لما رجعت البيت شُفت آبريل بتلعب في الحديقة  
 الأمامية للبيت، ابتسمت وناديت عليها لكنها بصت لي  
 بدهشة وركعت كملت لعب ثاني، دخلت على المطبخ  
 وأنا شايل طلبات البيت، جيسي كانت واقفة وعطيانني  
 ضهرها، كانت بتقّطع جزر عشان الغدا، كانت بتسمع  
 أغنية: «Sunshine, Lollipops and Rainbows»  
 الموضوع غريب أوي النهاردة، الأغنية دي زي ما تكون  
 بتطاردني.

ناديت عليها وأنا بحط المُشترريات على التراييزة لكن  
 جسمها اتنفض فجأة وبان عليها الخوف، قُلتها  
 بابتسامة عشان أمتص خوفها: «حزري فرزي أنا قابلت  
 مين النهاردة؟»

عينيها كانت مليانة خوف، رجعت لورا ورفعت السكين  
 لفوق، سألتها بدهشة وأنا بحاول أقرب منها:  
 «حبيبتي.. فيه إيه؟»



رجعت لورا وهي بتحاول تصرخ بخوف، السكين بيتهز في إيدها وهي بتبصلي بخوف، الأمور بتتحول بسرعة عشان تبقي غريبة و مُخيفة، حاولت أقرب منها لكنها لوحِت بالسكين في الهواء، وقفت مكاني وأنا حاسس بالخوف من تصرفها، عينيها مفتوحة بخوف وهي بتأتأ و بتحاول تتكلم، إيه اللي بيحصل؟

فجأة سمعت صوت مألوف يقول بفرح: «حببتي.. أنا في البيت»

شهقت وهي بتجري بعيد عني عشان تروح ناحية صاحب الصوت، جرت ناحية الغريب اللي قابلني في الشارع واختبئت وراه وهي بتمسك هدومه وبتعيط بخوف، بانث عليه الدهشة وهو بيسألها: «إيه اللي حصل؟»

قبل ما هي ترد عليه لاحظ وجودي، ابتسم و هو بيقولها: «متقلقيش يا حببتي.. دا صديق قديم قابلته في المدينة النهاردة»

جیسی وجھہا کان شاحب وہی بتقول بصوت مهزوز:  
«اق .. اقتحم علينا البيت»

ضحك وهو بيضطرب عليها وبيقولها: «متقلقيش منه...  
هو أكيد مكانش يقصد كدا»

حسيت إن العالم كله اتجنن، راسي هتنفجر، جرت هي  
على أبريل عشان تتطمئن عليها، هو كان لسه محافظ  
على ابتسامته وهو بيقولها: «خدي أبريل واطلعوا  
أوضتكم فوق ومنتزلوش إلا ما أنده عليكم»

جیسی خرجت وسابت المطبخ، لما إتطمئن إننا بقينا  
لوحدا قزب مني، قُلتله بغضب: «إيه اللي بيحصل يا  
لعين إنت»

ضحك وهو بيقول: «اسمي نيت ويلسون يا عديم  
الإسم.. متندهليش غير باسمي»

الغضب كان بيخلي جسمي كله يغلي، زقيته بكل قوتي  
بعيد عني، لكنه كان قوي زي الجبل، متحركش خطوة  
من مكانه، قُلتله بغضب: «بتقول إيه؟.. دا اسمي.. دا

بيتي.. دي زوجتي.. اخرج من هنا.. اخرج من حياتي..  
حالا»

الغريب ضحك بقوة.

قال بقسوة: «شوف.. كل حاجة إنت قُلتها غلط..  
البيت دا بيت نيت ويلسون.. جيسي دي زوجة نيت  
ويلسون.. دي كلها حياة نيت ويلسون.. وإنت .. إنت  
بناءً على إتفاقنا اللي قبل كدا مش نيت ويلسون.. إنت  
وافقت تعطيني اسمك.. فاهم؟.. أنا بقيت نيت  
ويلسون.. أما إنت.. إنت عديم الاسم.. إنت متسواش  
حاجة»

صرخت فيه بقوة وأنا بحاول أزقه تاني: «أنا مش  
موافق.. أنا مش راضي»

مسكني من إيدي بقوة غريبة، جسمي كله كان بيتألم  
من قبضته، دي مش قوة بشرية، مُستحيل تكون دي  
قوة بشرية وهو بيقول: «خلاص.. مش من حَقك تقبل  
أو ترفض.. كل حاجة كانت ملكك.. أو بمعنى أصح كل

حاجة إنت تخيلت إنها ملكك بقت ملكي أنا.. إنت مشيت على توجيهاتي.. إنت حققت كل دا بتعليماتي.. إنت من غيري ولا حاجة.. متسواش.. كل حاجة ملكي دلوقت.. فاهم؟»

زقني بعيد، وقعت على الأرض وبصيته بدهشة وخوف: «امشي.. اطلع برا.. سيب بيتي.. سيب زوجتي.. سيب بنتي.. مش عاوز أشوفك تاني.. فاهم يا عديم الاسم؟»

عيطت أنا حاسس باليأس، حاولت أتماسك وأنا بقوله: «طب.. طب تسمحي أشوفهم مرة أخيرة؟»

ضحك بشخرية وهو بيقول: «ابقا شوفهم من بعيد لبعيد.. لو حسوا بيك ولو غصب عنك.. هيكون عقابك قاسي أوي»

عيطت وأنا بدفن وجهي في إيديا وبسأله: «ليه؟.. ليه عملت فيا كدا؟»

قهقهه في شر وهو يقول: «عشانك كنت غبي .. بس متلومش نفسك.. أنا بستني بقالي قرون عشان الأقي الشخص الغبي اللي هيقبل بالعرض بتاعي.. مش هتتخيّل كام واحد رفض وكام واحد مرضاش»

قُلتله: «بس دي حياتي»

«كانت حياتك قبل ما تضيعها بغبائك.. إنت كنت نيت ويلسون بس خلاص.. أنا أخذت منك كل حاجة.. بس لسالك فرصة أخيرة»

بصيتله و عينيًا كلها أمل وسألته: «إيه؟»

«تعمل اللي أنا عملته.. دور في كل مكان واستغل كل الظروف واقتنص كل الفرص، لازم تلاقي شخص غبي تسرق منه اسمه وحياته.. مُمكن النهاردة بالليل يقالك حياة جديدة.. مُمكن كمان 10 سنين.. مُمكن بعد 1000 سنة... أنا بقالي قرن كامل»

رددت بدهشة: «قرن كامل؟.. مش هقدر أعيش الفترة دي كلها بلا هوية»

« هتتعوّد.. هتتعلم.. مش هيكون أدامك غير كدا.. كل ما الوقت يعدي هتتعلم حاجات أكثر»

الحقيقة الثانية: لو عرض جالك ومُغري جدًا لدرجة خوفتك.. خاف.

سألته بيأس: «مفيش حل ثاني؟»

هز راسه بالرفض وهو يقول: «للأسف مفيش أدامك غير كدا.. بس إنت ذكي وهتقدر تتعامل مع الموقف»

خرجت من المكان، اللي عاوز أقولها لكم بما إني بكتب لكم اللي حصل إني قدرت أسرق هوية شخص مُغفل واسمه وحياته، صحيح حياته مش بجودة حياتي السابقة لكنها أحسن بكتير أوي من إني أعيش بدون هوية وبدون وجود.

بكتب عشان أقولكم لو حد عرض عليك مُساعدة ضخمة بدون مُقابل.

متوافقش.. اهرب.. اهرب بشرعة..

حدث بالفعل 4 - 2 - حقيقتان

\*\*\*

## 5- المُخْلِص

لَمَّا النَّاسُ بَتَتَكَلَّمُ عَنْ زَوَاجِ الْقَاصِرَاتِ، أَغْلِبَ الْوَقْتَ  
بِيفْكَرُوا فِي دَوْلِ كَثِيرٍ جَدًّا لَكِنْ مَشْ مِنْ ضَمْنِهَا أَمْرِيكَ،  
كُلُّ النَّاسِ فَافْكَرَةُ أَمْرِيكَ دَوْلَةُ فَافْضَلَةُ وَمَفِيْشْ حَاجَةُ  
غَلَطَ بَتَحْضَلُ فِيهَا. عَلَى أَيِّ حَالٍ.. دَا مَشْ صَحْ.

زَوَاجِ الْقَاصِرَاتِ أَمْرٌ مَشْ شَائِعٌ فِي أَمْرِيكَ لَكِنَّهُ  
بِيَحْضَلُ، وَهَقُولُكَ حَاجَةُ غَرِيبَةٍ مُمَكَّنْ تَكُونُ مُفَاجِئَةً  
لَأَغْلِبِكُمْ، عَشْرَ وَلايَاتِ أَمْرِيكِيَّةِ بَسْ هِيَ الَّتِي فِيهَا  
قَوَانِينُ بَتُجْرِمُ زَوَاجِ الْقَاصِرَاتِ.

أَقُولُكُمْ سِرٌّ؟ أَنَا مَتَوْلِدْتَشْ فِي وَاحِدَةٍ مِنَ الْوَلايَاتِ  
الْعَشْرَةِ دِي.

أَقُولُكُمْ سِرٌّ تَانِيٌّ؟ أَنَا إِتَوْلِدْتِ وَتَرَبَيْتِ فِي طَائِفَةِ دِينِيَّةِ.

قَائِدُ الطَّائِفَةِ شَخْصٌ مُؤْمِنٌ بِالزَّوْجَةِ الْعِذْرَاءِ جَدًّا، وَأَنَا  
صُغَيْرَةٌ كُنْتُ فَافْكَرَةُ إِنْ الزَّوْجَةُ الْعِذْرَاءُ دِي هَتَكُونُ شَابَةً  
بِالْغَةِ.



لكن اتضح إن مُصطلح شابة بالغة دا عند الطائفة مش معناه إنها تعدت عشرين سنة، لا.. يكفي إن البنت يكون عندها سبع أو ثمان سنوات ودا هيخليها جاهزة للزواج.

تم بيعي بغرض الزواج لَمَّا كان عندي 14 سنة.

بطريقة أو بأخري أنا كُنت واحدة من الأكثر حظًا، هقولكم ليه.. البنت عندنا بيتم عرضها للبيع بمُجرد ما الدورة الشهرية بتجيلها، أختي الكبيرة جتلها أول دورة شهرية وهي عندها بس تسع سنين، أنا فاكرة اليوم كويس جدًا لأن والدتي مفهمتناش أي حاجة عن الموضوع ولَمَّا أختي صحت وشافت المنظر بدأت تصرُخ بخوف مش طبيعي، شافت الدم فكرت إنها بتموت و صرخت.

وبعد كذا شهر إتجوزت، زوجها كان شاب قوي في مُنتصف العشرينات من عُمره، من أول يوم اتعرضت للبيع وهي بتعيّط طول اليوم لحد ما التعب والحُزن

يغلبوها وتنام وفضلت كدا لحد ما تزوجت.  
ومشفتهاش ثاني من يومها.

وبمجرد ما بقى عندي تسع سنوات وأنا عايشة في  
رعب إن مصيري يكون زي أختي، بدعي ربنا كل يوم  
عُمري ما يزيدش، مش عاوزة أبلغ، الموضوع كان  
بيطاردني في كوابيسي، مش عاوزة أقابل نفس  
المصير اللي هي قابلته، ويبدو إن ربنا إستجاب  
لدعواتي لأن السنين بدأت تفر والدورة الشهرية  
بتتأخر، الموضوع بدأ يضايق أهلي، بمجرد وصولي  
لسن ال 12 بدأ والدي يفحص ملابسي الداخلية كل  
يوم، كان عاوز يتأكد إنني مش بخبي عليه حاجة.

وأنا في مُنتصف السنة الرابعة عشر، وصلت.. وصلت  
خلال الليل ولما صحيت لقيت الدم مالي ملاية السرير،  
مكانش في أي وسيلة هقدر أخبي بيها.

أهلي ساعتها شعروا بسعادة و ارتياح، كُنت بعيش  
أسوأ أيام حياتي وأنا بشوف إن دعواتي مبقتش

تجيب نتيجة. الشخص اللي باعوني ليه كان سنه 43 سنة.

مُتخيلين؟ حد فيكم يقدر يتخيل إن أهله يبيعه بالشكل دا؟ لكن أنا كُنت عارفة إن دا هيحصل في يوم من الأيام، ورغم كدا كُنت بنهار نفسيًا، الموضوع مؤلم ومسبب مرارة مش قادرة أتغلب عليها.

الزواج كان سريع جدًا، يبدو إن زوجي المُستقبلي كان مستعجل جدًا لأن الفترة اللي بين البيع و الزواج معدتش شهر.

أول مرة قابلت زوجي كانت في (بيتي) الجديد، رموني في سيارة وصلتني لحد البيت، كُنت بصرخ وهما بيضربوني عشان أروح معاهم وهناك... كل حاجة إتغيرت في البلكونة!

\*\*\*

بمجرد وصولي لبيتي الجديد، زوجي وصلتني لغرفة النوم الرئيسية و لحسن حظي قالي إنه هيسيبني

أرتاح شوية، بابتسامة قالي إنه مش عاوز مني أي حاجة غير إني أكون زوجة كويسة.. طبعًا عارفين هو كان يقصد إيه؟

قالي إنه وراه شوية شغل هيخلصهم الأول، قبل ما يخرج من الغرفة بصلي بلطف وطلب مني ألبس الهدوم اللي هو سايبهالي على السرير، بصيت للقميص باشمئزاز قبل ما أرميه على الأرض بغضب، مشيت ناحية البلكونة عشان أكتشفها، البيت كان مُمتاز وأهلي أكيد خدوا مبلغ ضخم مُقابل بيعي.

الجو كان برد جدًا، الثلوج بتتساقط بنعومة عشان تغطي الأرض، فكرت أنتحر وأرمي نفسي من البلكونة، لكن كان فيه فرصة إني أعيش وساعتها أكيد إنتم تقدرُوا تتخيلوا كان هيعمل إيه فيا.

قررت أرجع العُرفة تاني، كُنت على وشك أقفل باب البلكونة ورايا لَمَّا سمعت صوت خافت من ورايا، وبفضول مليان خوف لفيت وشي.

الشيء اللي كان قاعد على سور البلكونة كان أكثر حاجة مُخيفة شُفتها في حياتي.

كان قاعد على رجليه الخلفيتين زي الحيوان، إيديه طويلة لدرجة إنها لامسة الأرض رغم إنه قاعد فوق السور، إيديه مُنتهية بمخالب شكلها حاد لدرجة إنها مُمكن تقطع الحديد، جسمه مليون جلد أملس، نحيف لدرجة إني سألت نفسي إزاي الهوا مش بيطيّره!

جلد جسمه مُجعد ومُترهل، زي ما يكون عُمره مئات السنوات، مومياء بشعة، فمه مُجرد شق وسط لحم الوجه بيتفتح بس لما بيحرك فكه، لونه أبيض رمادي، وفجأة أدركت إن بقالنا دقايق بنتأمل بعض بدون ما حد فينا يتحرّك!

آخر حاجة لاحظتها كان رقبتة، مقدرتش ملاحظش الشق الطولي الضخم اللي في رقبتة، بيتفتح و يتقفل في كل مرة بيتنفس فيها.

فتح فمه لثواني شُفت فيهم أسنانه الحادة المُرعبة،  
ثواني عَدَّت قبل ما يقول: «بتعيطي ليه؟»

كان بيعوِّج راسه بطريقة مُخيفة، رفعت إيدي لوجهي  
وتحسست خدي، ما أخذتش بالي إني بعيط غير لَمَّا  
قالِّي، صوتي كان بيترعش و أنا بجاوبه: «عشان أهلي  
أجبروني أتجوز واحد معرفوش.. وأنا خايفة.. و.. أنا  
عاوزة أرجع البيت»

بصراحة مش عارفة هقدّر أرجع البيت مرة تانية ولا لأ،  
بس اللي أعرفه كويس إني مش عايزة أكون هنا، في  
بيت معرفوش مع شخص معرفوش ناويلي نوايا  
معرفهاش!

الكائن بصلي بدهشة وهو بيقول: «زواج؟.. إنتي لسه  
طفلة!.. إزاي؟»

دفت وجهي بين إيديّا وبدأت أعيط أكثر، سماع  
الكلام دا من حد ثاني كان أسوأ من إني أقوله لنفسي،  
فجأة الموضوع بقي مؤلم و مُذل أكثر.

سمعت صوت خربشة ولما بصيت شفت الكائن دا نزل من على السور ووقف أدامي، كان أطول مني بكثير، رفع إيده وبواحد من مخالبه مشي بإيده على وجهي بلطف وحنان وهو يقول: «أرجوكي متعيطيش يا صغيرتي»

بطلت عياط فورًا، كنت مصدومة وخائفة، بس الغريب إنني مكنتش خائفة منه، كنت خائفة من مصيري في الزواج أكثر، سألني بلطف: «اسمك إيه؟»

قُلتله بصوت بيترعش: «اس .. اسمي ماري»

شال إيده من على خدي وهو بيتأمل جرح بسيط في وجهي بسبب مخالبه، مخلبه كان مُلَطَّخ بالدم، محسيتش بأي ألم إطلاقًا وهو يقول: «ماري .. مُمكن متعيطيش تاني .. أنا هساعدك»

حسيت بموجة كبيرة من الفرحة بتلمي قلبي وأنا بسأله بسرعة: «هتساعدني؟»



هز راسه قبل ما يلف ويطلع على سور البلكونة، جريت وراه وأنا بقوله بدهشة: «استنى.. رايح فين؟.. مش قلت هتساعدني؟»

بصلي وعينيه مليانة حُزن غير مفهوم وهو بيقول: «هساعدك في الوقت المُناسب.. ولحد ما يبجي الوقت المُناسب.. أنا عاوز منك حاجة»

رديت بشرعة و أنا خايفة أفقد فرصتي الوحيدة في الخروج من المكان دا: «محتاج مني إيه؟.. أنا مُستعدة أعمل أي حاجة!.. أرجوك متسينيش»

قالي بهدوء: «محتاج غضبك.. لَمَا يكون غضبك كفاية هساعدك»

حسيت بقلبي بيقف من الخوف، أنا حاسّة بالغضب، حاسّة بالغضب جدًّا، أنا بكره أهلي.. بكره الشخص اللي هيتجوزني.. بكره كل واحد كان قادر يمنع الزواج دا وممنعوش.. حاسّة بغضب مهول، ورغم كدا الكائن شايف إنه مش كفاية.



هز راسه قبل ما يلف ويطلع على سور البلكونة، جريت وراه وأنا بقوله بدهشة: «استنى.. رايح فين؟.. مش قلت هتساعدني؟»

بصلي وعينيه مليانة حُزن غير مفهوم وهو بيقول: «هساعدك في الوقت المُناسب.. ولحد ما يبجي الوقت المُناسب.. أنا عاوز منك حاجة»

رديت بشرعة و أنا خايفة أفقد فرصتي الوحيدة في الخروج من المكان دا: «محتاج مني إيه؟.. أنا مُستعدة أعمل أي حاجة!.. أرجوك متسينيش»

قالي بهدوء: «محتاج غضبك.. لَمَا يكون غضبك كفاية هساعدك»

حسيت بقلبي بيقف من الخوف، أنا حاسّة بالغضب، حاسّة بالغضب جدًّا، أنا بكره أهلي.. بكره الشخص اللي هيتجوزني.. بكره كل واحد كان قادر يمنع الزواج دا وممنعوش.. حاسّة بغضب مهول، ورغم كدا الكائن شايف إنه مش كفاية.

مش عارفة إذا كنت هقدر أغضب وأكره أكثر من كدا.

سألته: «اسمك إيه؟»

سكت شوية كأنه بيفكر قبل ما يقول: «المُخْلِص.. لأنني هكون مُخْلِص ليكي دايمًا»

وقف على سور البلكونة وقفز. اختفي وسط الظلام والثلوج المُتساقطة، وفجأة الهدوء سيطر على كل حاجة.

وسابني لوحدي مرة ثانية!

قعدت في أرضية البلكونة، بعيط وثلوج مالية جسمي، زوجي دَخَلَ الأوضة ولما شافني ملبستش الهدوم اللي قاللي عليها شدني من إيدي بغضب لحد جوا الأوضة، ضربني بقسوة، قطع هدومي من عليا، أجبرني على إني ألبس الهدوم اللي هو جهزها بالعافية.

طَبَعًا كَلُّكُمْ عَارِفِينَ إِيَّهِ الَّذِي حَصَلَ بَعْدَ كَدِّ، فِي نِسَاءٍ  
كَثِيرٍ بِمُخْتَلَفِ الْأَعْمَارِ وَالْجِنْسِيَّاتِ يَقْدِرُونَ يَحْكُوا عَلَى  
الْإِغْتِصَابِ تَحْتَ مُسَمَى الزَّوْجِ أَحْسَنَ مِنِّي، سَامِحُونِي  
أَنَا مَشْرَهْقَدَرٌ أَحْكِي.

صَحِيحٌ تَانِي يَوْمَ الصُّبْحِ جَسْمِي مِلْيَانِ جُرُوحٍ  
وَكِدْمَاتٍ وَدِمَاءٍ جَافَةٍ، طَرَدْنِي مِنَ السَّرِيرِ وَأَمْرُنِي أَنْزَلَ  
الْمَطْبِخَ أَحْضَرْلَهُ فُطَارًا، كُنْتُ بِمَشْيِي بِالْعَافِيَةِ بَعْدَ ضَرْبِ  
إِمْبَارِحٍ، أَنَا بِكَرْهِهِ.

بَسْ أَعْتَقِدُ إِنْ الْكُرْهَ وَالْغَضَبَ الَّذِي حَاسَّةٌ بَيْنَهُمْ مَشْرَه  
كَفَايَةً، لِأَنَّ الْفُخْلِيصَ مَرَجَعَشَ مَرَّةً تَانِيَةً لِسَّهِ.

مَرَجَعَشٌ تَانِيٌ غَيْرٌ بَعْدَ شَهْرٍ كَامِلٍ، زَوْجِي كَانَ  
بِيَعَامَلْنِي زِي الْعَبْدَةِ، طَوَّلَ النَّهَارَ بِنُضْفِ الْبَيْتِ وَبَطْبُخِ  
الْأَكْلِ الَّذِي يَطْلُبُهُ، وَلَمَّا يَرْجِعُ يَضْرِبُنِي وَيَقْطَعُ هَدُومِي  
وَيَغْتَصِبُنِي، لِدَرَجَةٍ إِنْ كَانَ فِيهِ دَمٌ مَعَ الْبَوْلِ.

فِي يَوْمٍ مِنَ الْأَيَّامِ الْفُطَارِ اتَّحَرَّقَ مِنِّي شَوِيَّةٌ، حَاجَةٌ  
بَسِيطةٌ جَدًّا تَكَادُ تَكُونُ مَشْرَه مَلْحُوظَةً، مُجْرَدٌ ثَوَانِي

## زيادة فوق النار.

ضربني لحد ما تقيأت من الإعياء، وبعدين أجبرني أنضف مكان القيء، أجبرني أخرج للبلكونة بملابسي الداخلية وسط الصقيع والثلوج وقفل عليًا طول الليل، نمت في الأرض والثلوج بدأت تتراكم فوقني.

بكرهه.. بكرهه بشكل مش هتتصوروه.

المُخْلِص جالي يومها، لولاه كُنت هموت من شدة البرد، حضني وسابني أتدفي من دفا جسمه، همس لي بكلام مُطمئن لحد ما نمت بهدوء وسلام

صحيت لقيته اختفي، شهور طويلة مرت ببطء وهو مش موجود، تقريبًا ست شهور كاملين مروا، لكن فجأة جالي إحساس مالوش تفسير إن فيه حاجة غَلَط.

\*\*\*

في يوم زوجي اقتحم الغرفة وسألني بغضب: «إمتي آخر مرة جتلك الدورة الشهرية بتاعتك؟»

فجأة أدركت مرور شهرين كاملين على آخر دورة شهرية، قُلتله دا، كُنت غبية بشكل كافي لدرجة إنني ملاحظتتش دا.

ضيق عينيه بحماس وهو يقول: «كُنت مُتأكد»

مشي لحد ما بقى ورايا وحضن بطني برفق، قالي بهمس في ودني: «إنتي حامل.. إنتي حامل في ابني»

\*\*\*

كان فرحان ومُبتهج جدًا، بس أنا.. أنا كُنت بترعِش من الخوف، طفل؟.. أنا نفسي لسه طفلة.. هقدر أشيل مسؤولية طفل إزاي؟ الحَمَل مكانش لطيف.. كُنت تعبانة وحاسّة بالغثيان طول الوقت، لازم آخذ بالي من صحتي ومن تصرفاتي طول الوقت.

كُل يوم مُجرد ما يخرج من البيت عشان يروح شُغله كُنت بترمي على الأرض وأعيّط بألم وحُزن، في يوم عيَظت لمدّة ساعة كاملة بدون توقف. في الليلة دي استنيت المُخْلِص في البلكونة.

ويومها... ظَهَرَ!

كان واقف على سور البلكوثة بيئصلي وهو ساكت،  
قُلتله وأنا بحاول أتماسك: «بكرهه.. أنا بكرهه جدًا»

بصلي بشك وهو بيقول: «فعلاً؟»

هزيت راسي بالإيجاب، نزل من على السور وهو  
بيقولي: «تعالى.. قربي»

جريت عليه، حضني ومشي بمخالبه على وجهي  
بهدوء، باصص في عينيا كويس جدًا، مرت دقيقة  
صمت تقريبًا قبل ما يبعدني عنه بسرعة وهو بيقول:  
«لا.. لا.. مش كفاية»

صرخت فيه بالم: «وهيبقى كفاية إمتى؟.. مفيش كُره  
أكثر من كدا.. أنا بكرهه.. بكره نفسي.. بكره أهلي..  
بكره كل حاجة.. المفروض أعمل إيه تاني؟»

قرب مني وحضني تاني بقوة وهو بيقول: «استني  
الوقت المناسب»

سابني قاعدة لوحدي وسط البلكونة في الظلام  
ومشى.

خلال شهور كانت بطني بتكبر وبتنتفخ، وقلقي بيكبر  
معاها بنفس السرعة.

زوجي قرر إنه ميودنيش لدكتور، وقرر كمان إنني هولد  
في البيت، مش هاخذ أي أدوية خلال فترة الحمل،  
بس أنا مكنتش أعرف المفروض أعمل إيه ومعملش  
إيه عشان أحافظ على حملي وعلى طفلي.

لكن الأمور كانت بتزداد سوءًا، معنديش أي فكرة  
هعتني بالطفل إزاي بعد الولادة، طب إيه اللي هيحصل  
لو كانت بنت؟

أصل هو لو ولد فمش هقلق ولا هخاف عليه، الولد  
هيعيش حياته بشكل طبيعي، هيروح مدرسته  
وهيختار الزوجة اللي يحبها.

بس البنات لا..



لو خلفت بنت معرفش زوجي هيعمل فيها إيه، هيراعيها ويهتّم بيها ولا هيضربها ويتحرّش بيها، هيجوزها لراجل سنه ضعف سنها، هتحرّم منها وهي طفلة ومش هشوفها بتكبر أدام عيني.

فكرت في أفكار كتير فظيعة.

وأخيرًا حظي قرر بيتسلي مرة على الأقل.

زوجي رجع مرة من برا سكران، غاضب وشكله كان بيتشاجر مع حد، فيه حاجة غلط حصلت، ساعات بيرجع من شغله بالشكل دا لما بيكون عنده مشاكل في الشغل، غبية.. غبائي صورلي إنه هيسيبني في حالي، أنا حامل وفي الشهور الأخيرة، حاسة بحركة الطفل جوا بشكل واضح، بقاله شهور مش بيقرب مني، يبدو إنه بيهتم بصحة الطفل.

بس إتضح إنه مبيهتمش بحاجة.

ضربني بقسوة، توصلت ليه عشان يرحمني، قُلتله إنه كدا بيؤذي الطفل، ويبدو إن دا أغضبه أكثر، بدأ



يضربني بقوة في بطني، ومن نظرتة كُنت عارفة إن الموضوع مش فارق معاه.

وقعت على الأرض، ماسكة بطني وبتألم، بصرُخ بألم، وهو كان بيصرُخ فيًا بغضب، بيلومني.. بيلومني إن الحمل هينزل، لأن بعد كمية الدم اللي نزفتها تحت رجليه كان عارف ومُتأكد إن الحمل نزل والجنين مات.

النزيف كان مُستمر على فترات، أنا مكُنتش عاوزه الحمل يكمل على أي حال لكن رغم كدا كُنت بعيط بخرقة، مهما كان دا كان بقي جزء مني.. جزء من حياتي، كُنت بعيط وهو واقف على باب الحمام يصرُخ فيا ويلومني.

بمجرد ما أنهى صراخه، راح شرب زجاجة بيرة ونام بهدوء كأن مفيش حاجة حصلت، إنتظرت لحد ما تأكدت إنه نام تمامًا وخرجت من الحمام، زحفت بضعف لحد البلكونة، خط دم مرسوم على الأرض ورايا، انهرت على أرضية البلكونة وأنا بيص للقمر بخزن، قعدت على ركبتي وصرخت بجنون، صرخت

عشان أطلع الغضب والكُره اللي جوايا، لكن بدل ما أتخلص من غضبي كان بيزيد.. وبيزيد.. وبيزيد..

المُخْلِص ظهر على سور البلكونة كعادته، المرة دي كان فيه حاجة مُختلفة، نزل من على السور وقعد جنبي على الأرض، سَرَّح شعري بمخالبه بهدوء عشان يهديني.

حاولت أهدي وأستجمع شجاعتي، هو كان مُنتظر إني أتكلّم.. وتكلمت

قُلتله بهدوء: «بكرهه»

صوتي كان واطي وهادي، مكنتش بعيط، كُنت بقول الكلام من قلبي:

«بكرهه بسبب اللي بيعمله فيّا.. بسبب اللي عمله في الجنين.. بكره أهلي عشان باعوني ليه.. بكره الناس عشان شافوه بيشتريني ومتحركوش.. بكرهم كلهم.. وعاوزاهم يعانوا»

المرّة دي نظرتّه لِيّا كانت مُختلفة.. كانت نظرة كُلهَا  
عطف، حنان وطيبة

تنهد وهو بيقول: «هو دا الوقت المُناسب»

صوته كان صدئ.. قاسي.. أجش.. صوت شيطان جاي  
من الجحيم، بصلي وهو بيقول بنفس الصوت المُخيف:  
«لازم تعرفي إني لَمّا هتصرف.. جُزء منك هيضيع..  
للأبد.. فاهمة؟»

هزيت راسي بالموافقة، مش فاهمة هو يقصد إيه بس  
موافقة على أي حاجة مُقابل الإنتقام، وقف أدامي  
ومسك إيدي، مشيت وراه لحد العُرفة اللي زوجي نايم  
فيها، عينيه اتملت شر وحقْد وهو بيقول بصوته  
المُخيف: «تفرجي»

مشي على إيديه ورجليه زي الحيوان، حركته كانت  
مُخيفة وبطيئة، عينيه مليانة شر وحقْد، قرّب من  
سرير زوجي ببطء ومد إيدَه ومسك رقبته بهدوء،  
الإيد الثانية مسك بيها رجلية.

وشدهم بعيد عن بعض.

جسم زوجي بدأ يتقسم بنصفين، صحن من نومه وبدأ يصرخ بألم، جسمه بيتقطع وأمعائه بتطلع من بطنه، صرخاته بتخفت والدم بيملى المكان، المُخْلِص بدأ يقطع جسمه لأجزاء صغيرة بعد ما إتأكد من موته، بدأ ياكل القطع دي بوحشية، مخالبه ووجهه بيتملوا دم بطريقة مُخيفة، بمجرد ما خَلَصَ أكل جسمه انتفخ بطريقة ظاهرة، أتمنى يكون زوجي إتعذب بشكل كفاية قبل ما يموت.

زحف ناحيتي على إيديه ورجليه وقعد جنبي، سألته بخوف وصوتي بيترعش: «إيه اللي هيحصل بعد كذا؟»

قال بهدوء: «أنا المُخْلِص ليكي.. إنتي إختاري وأنا هنفذ»

\*\*\*

بعد ساعة كُنت واقفة على جانب طريق مُظلم بحاول  
أوقف أي عربية، لكن مين مجنون هيُقف لواحدة  
جسمها وهدومها مليانين دم، في النهاية راجل عجوز  
طيب وقفلي وطلبت منه يوديني أقرب مُستشفى.

مُكنتش خايفة لأني عارفة إن ملاكي الحارس المُخْلِص  
معايا.

في المُستشفى اتصلوا بالشرطة اللي وصلوا خلال  
دقايق، حكيتلهم كل حاجة حصلت بالتفصيل، في  
البداية وجوههم كانت مليانة قلق و غضب وفي  
مُنتصف الحكاية ملامحهم ابتدت تتملى حيرة ولما  
خلصت كلامي كانوا مُتأكدين تمامًا إني مجنونة.

لكن لما شافوا الدم وبقايا الجسم بدأوا يصدقوا  
قصتي.

كُنت مُعتقدة إنهم هيسجنوني وهيعدموني لكن  
محصلش أي حاجة من دي، لكنهم في قسم الشرطة  
قالولي إن زوجي كان راجل ذو قوة و نفوذ وإن زواجي

بيه تم في السر وبدون أي أوراق رسمية تثبته عشان  
 كدا مفيش أي دليل مادي أو اتهام رسمي يقدرنا  
 يتهموني بيه، وعلى أي حال هو كان مكروه وله أعداء  
 كتير.

في الجرايد ونشرات الأخبار قالوا إنه مات بسكتة  
 قلبية، الشرطة مُصممين إني مقتلتوش وإني بقول كدا  
 عشان خايفة من القاتل، بيقولوا إن صحتي وقوتي  
 الجسدية ميسمحوش ليّا إني أرتكب جريمة بالوحشية  
 والقسوة، خصوصًا إن حجمه ضعف حجمي ووزنه  
 ضعف وزني، على أي حال هُما حُرِين.

كانوا عاوزين يدخلوني مصحة نفسية، رفضت  
 الموضوع تمامًا، و بمُجرد ما حسيت إني بقيت كويسة  
 سبت المُستشفى وهربت ، وهُما مكانوش مُهتمين بيّا  
 فمدوروش عليّا.

\*\*\*

الزيارة اللي بعد كدا كان لازم تكون لأهلي، كانوا  
 متفاجئين لَمَّا شافوني، بتسائل كل دقيقة لو كانوا في

يوم من الأيام حسوا بالذنب والندم بسبب اللي عملوه فيا، على أي حال دا مش هيغيّر من إحساسي ناحيتهم، سألتهم عن مكان أختي وقالولي إنهم ميعرفوش عنها حاجة، بس أنا مُتأكدة إنهم كذابين.

المُخْلِص تعامل معاها بشكل يليق بيهم، ربطهم وعذبهم لساعات طويلة قبل ما يموتهم وياكلهم، توسلوا ليّا وهُمّا بيعييطوا عشان أرحمهم، في النهاية أجبرهم يقولولي الحقيقة: أختي زوجها قتلها بعد شهر من زواجهم وهُمّا ساعدوه يتستر على الأمر مُقابل مبلغ مالي كبير.

المُخْلِص كان بيقتلهم وبياكلهم، كُنت سامعة صراخهم وأنا بدور على الفلوس والذهب اللي في البيت.

المبلغ اللي لقيته كان ضخّم، قدرت أعيش بيه لفدة سنوات طويلة، بس مكنتش عايشة لوحدي، المُخْلِص كان دايمًا موجود عشان محسش بالوحدة.



ورغم كل دا معلوماتي عن المُخْلِص كانت قُليَّة جدًا، معرفش هو إيه أو جاي منين، بس أعتقد إنه شيطان.. مش عارفة دا حقيقي و لا لأ، بس لا.. المُخْلِص مُستحيل يكون شيطان.. هو أكيد مخلوق غريب، بس مخلوق بيرعاني وبيهتم بيّا.

بس بعد السنين فهمت كان يُقصد إيه بجملة جزء مني هيختفي، مع كل جريمة كانت بتحصل جزء من إنسانيتي كان بيختفي، في البداية مكنتش حاسّة، بس بعد شوية بدأت أحس إن فيّا حاجة بتتغير، جزء صُغير كل مرة لكن الناتج النهائي كان ملموس.

مش حابة اللي وصلت ليه بس مكانش أدامي أي طريق تاني.

كل يوم بيُص في المراية، بشوف إنني بتحول لحاجة تانية غير إنني أكون إنسان، بس أنا مش مُهتمة.

مؤخرًا بدأت أفكر في البنات اللي بتتعرض لنفس اللي اتعرضت ليه في صغري، البنات اللي أهلهم بيبيعوهم



ويسيبوهم لوحدهم وهما لسه أطفال، البنات اللي مستنية مخلص خاص بيهم ينقذهم، لأنهم ميقدروش ينقذوا نفسهم.

بس أنا أقدر.. أقدر أنقذهم، معرفش لسالي أد إيه قبل ما أفقد إنسانيتي بالكامل بس الموضوع يستحق، الموضوع يستحق تمامًا.

أنا أخذت قراري ومش هرجع فيه مهما حصل، مش هندم عليه، هضحى بإنسانيتي عشان أنقذ البنات دي.

يمكن لما تنتهي أتحوّل زي المخلص وأقدر أساعدهم بشكل أفضل، معرفش.. بس أنا هساعدهم.

إنتم لو مكاني.. مش هتساعدهم؟

\*\*\*

## 6- الغلية

جدي مش شخص اجتماعي على الإطلاق، بالعكس تمامًا.. نادرًا لَمَّا بيتكلم، وأغلب وقته بيقتضيه وهو نايم أو أدام التليفزيون بيتابع حاجة بصمت، ماما بتقول إنه مش إنطوائي؛ لكنه إنسان بيحرص على إنه ميتكلمش على الفاضي.

طول عُمره صامت، حتى وأنا طفل رضيع بتعلم الكلام والمشي حواليه كان بيتجاهلني، على طول قاعد في كُرسية بيقرأ الجريدة أو بيتفرج على التليفزيون، حتى لَمَّا كُنت بلاعبه أو بضحكه أو حتى برقص أدامه عشان ألفت نظره كان بيعاملني كأني مش موجود.

كُنت بخبّط على رجله وأنا بقوله: «جدو.. جدو.. بُص»

كان بيبُص بقلة اهتمام من فوق الجريدة لثواني قبل ما يرفعها تاني ويتجاهل وجودي.

وعلى عكسه تمامًا كانت جدتي مُهتمة بيًا جدًّا، عاشت معايا كل لحظات طفولتي، شافتني وأنا بطلع سناني وعلمتني المشي والكلام، كانت بتخبزلي الكوكيز اللي بحبها وبتفرح لَمَّا بعمل أي إنجاز حتى لو تافه، عشان كدا لَمَّا ماتت السنة اللي فاتت، حسيت بالوحدة وحسيت إن قلبي مكسور، ويبدو إن دا نفس الشعور اللي جدي حاسس بيه.

ويبدو إن دا السبب في إن والدتي طلبت مني أعيش مع جدي لوحدنا عشان يحصل تقارب بينا ونخرج بعض من الحالة النفسية السيئة اللي وقعنا فيها بعد وفاة جدتي، قررت تسافر مع بابا يقضوا شهر غسل جديد وأنا هقضي أسبوعين عند جدي.. لوحدنا.

وقفت بالعربية أدام بيت جدي وقالتلي بابتسامة:  
«هتتبسط مع جدك أوي»

قُلتها بإحباط: «إزاي و هو أصلًا مبيتكلمش!»

قالت بنفاز صبر: «لا بيتكلم.. إنت اللي مش بتسمعه  
بس»

ونزلت من العربية متوجه لبيت جدي. أول أسبوع مر  
زي ما كنت متوقع تمامًا، بنتجاهل بعض بشكل تام،  
صمت غير مُبرر، كل واحد فينا بياكل في غرفة لوحده،  
هو بياكل في كُرسية أدام التليفزيون، و أنا باكل في  
غُرفتي وعلى سريرى، لكن دا تغيّر في ليلة من الليالي  
لما قمت من النوم تقريبًا في مُنتصف الليل عشان  
أدخُل الحمام، لمحت نور غُرفته منور على غير العادة.

فضولي كان أقوى منى، مشيت بهدوء و بطء لحد باب  
غرفته، فتحت الباب بالراحة وبصيت عليه، كان قاعد  
على كُرسية كعادته، ماسك في إيده كاس سكوتش  
وعينه مليانة دموع، كان باصص ل فوق ناحية فتحة  
تهوية في سقف الغرفة.

كان بيهمس بصوت حزين: «كان نفسي تكوني هنا»

كُنت سامعه بالعافية، سألته بفضول: «كان نفسك مين يكون هنا؟»

بصلي ببطء وهو بيشاورلي أدخل الغرفة، قعدت أدامه على طرف سريره. كُنت متوتر وأنا بقرب منه لأول مرة من سنين طويلة، قعد جنبي لأول مرة في حياتي.

أعطاني كاس السكوتش بصمت، شربت بحذر، طعمه كان لاذع و فيه شوية مرارة، محببتش الطعم وأعطيته الكاس مرة ثانية، قالي بهدوء و من غير ما يبصلي: «أعتقد إن الوقت جه عشان تعرف حقيقة أختي»

اللي جاي دا هي القصة كاملة من على لسانه.

\*\*\*

أنا عارف إنك فاكرنى جد شرير أو مُعقّد، بس أنا زمان مكنتش كدا، حاجات كتير أوي فيا اتغيرت مع الزمن، إنت لسه صُغِير ويمكن تفهم اللي هحكيهولك دا في يوم من الأيام.

أنا وأهلي عايشين في البيت دا من يوم ما أنا اتولدت، زمان وبعد الحرب الأهلية، المكان دا كان ضخم ومُحصّن زي القلاع التاريخية، والغرفة اللي إنت شايفها دي هي عُرفتي من يوم ما اتولدت، كل حاجة بدأت في المكان دا لما كان عندي 8 سنين.

كُنت وحيد وكُنت عشان أسلي نفسي بتظاهر إن البيت دا عبارة عن مملكة قديمة وإن والدي ووالدتي هُما الملك والملكة وأنا كُنت ولي العهد، أما عامة الشعب فكانوا اللعب بتاعتي، وأهلي كانوا بيشجعوني على اللعبة دي عشان أنمي خيالي.

والدتي كانت ربة منزل زي أغلب النساء في الوقت دا، عشان كذا كانت متواجدة عشانني طول الوقت، بتطبخ وبتغسل وبتهتم بأمور بيتها كُلها، ولما بتخلص بتلعب معايا لعبة المملكة، أما والدي فكان مُختلف تمامًا، كان قاسي لما بيكون موجود في البيت ودا كان شيء نادرًا ما بيحصل، والدي كان طيب.

لَمَّا بتكون طفل صُغِير بتثق في أهلك جدًا، بتسمع كلامهم، بتصدق أي حاجة بيقولوها، ومعندكش أي حاجة تخليك تفكر أو تعمل غير كدا، وبما إننا أسرة متدينة كُنَّا بنروح الكنيسة 3 مرات في الأسبوع، كُنت طفل مُطيع وبسمع الكلام والناس كانت بتحبني، كانوا بيقولوا علينا الأسرة الكاملة، والدي كان راجل طيب ومُتدِين ومحبوب، الناس بتثق فيه وبتقدره، عشان كدا لَمَّا والدي طلب مني أتجاهل الصوت اللي بيكلمني من الغلية.. قررت أتجاهله.

من أول يوم ليَّا وأنا بسمعه، أنا فاكر اليوم دا، كان عندي 8 سنين زي ما قُلتك، كُنت نايم وصحيت على صوت بُكاء مكتوم جاي من الغلية، الصوت كان واصلني عن طريق فتحة التهوية دي، اتعدلت على السرير عشان أسمع كويس لكن الصوت اختفي تمامًا بعد صوت خبطة قوية، رجعت تاني كملت نوم.

وخلال الأسابيع التالية بدأت أصحي على أصوات مُختلفة جاية من الغلية، صوت خطوات ثقيلة.. صوت بُكاء مكتوم.. صوت ضرب قوي، لَمَّا سألت بابا قَالِي دا



صوت الفيران اللي ساكنة في الغلية، وبدأت أتعوّد على الأصوات دي ومبقيتش أقلق من النوم بسببهم.

لكن في ليلة من الليالي كُنت بلعب في أوضتي في وقت النوم، المفروض إني نايم دلوقتي، كُنت ماسك سيفي الوهمي وكُنت بتكلم مع عامة الشعب، كُنت مُندمج في اللعب لما فجأة سمعت صوت بيهمس: «هاي؟»

الصوت كان مكتوم وضعيف، بالكاد وصلّي وسمعته، كان صوت بنت صُغيرة، ودا خلاني أنتبه جدًا وأركز، مفيش بنات صُغيرة عايشين قريب منا.

الصوت سأل مرة ثانية: «إنت سامعني؟»

في الوقت دا قدرت أحدد إن الصوت جاي من فتحة التهوية اللي جنب سريري، جريت بسرعة ناحية السرير، وقفت عليه وأنا بيص لفتحة التهوية و بسأل: «مين؟»

الصوت جاوبني على طول: «أنا اسمي بولي»



سكت وأنا بحاول أحلل الموقف، الصوت سألني مرة  
تانية بنبرة طفولية: «هو إنت أخويا؟»

حسيت بالدهشة وأنا بسأل: «مش عارف.. إنتي  
أختي؟»

قالت بحيرة: «معرفش.. بابا بيقول إن ليّا أخ.. بس  
مش بيسمحي أشوفه»

«ليه؟»

«معرفش.. بابا بيقول إن أنا فيّا حاجة غَلَطَ»

«وإنتي فعلاً فيكي حاجة غَلَطَ؟»

«معرفش.. بابا بيقول كدا»

سألته بفضول: «مين والدك؟»

«مايكل لارسون»

صرخت بحماس: «دا والدي أنا كمان، دا معناه إنك  
أختي وأنا أخوكي»

«بجد؟»

«أعتقد آه.. بس بصراحة مش عارف»

«أنا كمان مش عارفة»

الصمت ساد لدقايق طويلة، قررت أقطع الصمت  
بسؤال فضولي: «هو إنتي ليه عايشة في الغلية؟»

«معرفةش.. بابا بيقول إنني مينفعش أخرج من هنا لأن  
محدث بيحبني»

«يعني إنتي عُمرِك ما خرجتني من الغلية؟»

قالت بعصبية: «لا مخرجتش قبل كدا.. ومش  
مسموخلي حتى أتكلم مع حد»

قعدت على السرير وأنا حاسس بالحيرة، صوتها كان  
مكتوم ومليان حُزم وهي بتقول الجملة الأخيرة كأنها

على وشك البكاء، قُتلها بهدوء عشان أطمئنها:  
«متخافيش أنا هفضل أكلمك»

«بجد؟»

قُتلها بفخر: «طبعا أنا أخوكي»

قالت بفرحة: «وأنا أختك»

\*\*\*

في اليوم التالي صحيت مُتحمس، النهاردة مش بس  
يوم جديد، لا النهاردة أول يوم ليّا وأنا ليّا أخت، نزلت  
أجري على السليم بحماس، كالعادة كانت ماما بتجهز  
الفطار ليّنا بنشاط، ماما حطت الأكل أدامي، كُنت باكل  
بسرعة وحماس، بابا ضحك وهو بيقول: «بالراحة يا  
ابني.. مستعجل كدا ليه؟»

ضحكت وأنا بقوله: «عاوز أخلص أكل بسرعة عشان  
أرجع أَلعب مع أختي»

فجأة الصمت سيطر على المكان، الدم هرب من وجه والدتي لدرجة إن وجهها بقى شاحب جدًا، كانت كأنها شافت شبح، والدي كان بيئصلي بغضب وهو يقول: «جاكسون.. إنت معندكش إخوات»

بصيته وأنا حاسس بالحيرة ويقول: «لا عندي أخت.. وعاشة في ال....»

قاطعني وهو بيضرب التراييزة بإيده ويصرخ بغضب: «كفاية»

بصيت لوالدتي بخوف، كانت باصة في الأرض وهي ساكتة، عينيها مليانة دموع وبتعيط، وصلها وبصلي وقال بغضب: «شايف ضايقت والدتك إزاي؟»

حاولت أدافع عن نفسي: «لكن.. لكن..»

للمرة الثانية بيقاطعني بغضب وهو يقول: «روح أوضتك حالاً.. ولو كذبت مرة ثانية هعاقبك»

جريت ناحية أوضتي وأنا حاسس بالظلم، بعيط،  
رميت نفسي على السرير، بعد دقايق سمعتها بتهمس:  
«إنت كويس؟»

قُلتها بغضب: «لا.. أنا في مُشكلة بسببك»

قالت بقلق: «إيه اللي حصل؟»

قُلتها من بين دموعي: «قُلت لبابا إن لييا أخت.. غضب  
مني وعاقبني!»

قالت بخوف مش طبيعي: «إنت قُلت لبابا إننا  
تكلمنا؟»

«تقريبًا»

«مكانش لازم تعمل كدا.. مكانش لازم تعمل كدا.. إنت  
سببتلي مُشكلة ضخمة.. هيقتلني»

قُلتها بغضب: «أحسن.. تستاهلي.. إنتي بوظتي  
يومي.. كل حاجة كانت تمام قبل ما تظهرني في

## «حياتي»

كُنت سامع بولي بتعيّط من خلال فتحة التهوية،  
دموعها وبكائها وحُزنها خففوا من حدة غضبي شوية،  
لكن برضه حسسوني بالذنب ناحيتها، حطيت مخدة  
فوق راسي وكَمّلت عياط.

ويبدو إني نمت وأنا بعيّط لأني لَمّا صحيت كُنت نايم  
على طرف السرير والمخدة واقعة على الأرض، وكُنت  
لسّه سامع بُكاء بولي، بس المرة دي مكانتش لوحدها  
في الغلية.

كانت بتصرُخ: «لا.. لا»

صوت كان بيكلمها بغضب: «إزاي إتكلمتي معاه؟»

قعدت على السرير بانتباه وخوف، أنا عارف الصوت دا  
كويس، بولي كانت بتتكلّم من بين دموعها: «لا.. لا..  
هبقى مؤدبة.. هبقى مؤدبة»

سامع صوت ضرب وخبط وبكاء بولي بيزيد مع صوت الضرب، صرخت بصوت عالي: «مش هكلم حد ثاني»  
الصوت كان واصلني بصعوبة جدًا وكنت سامعه بالعافية، صوت والدي بيصرخ فيها مرة ثانية: «إنتي بتكذبي»

صوت ضربة ثانية قوية وبعدين صوت بولي بتقول بألم و خوف: «لا مش بكذب.. هبقي مؤدبة»

جسمي كله كان بيترعش وأنا بسمع كل حاجة بتحصل في الغلية، صوت والدي قال بتحذير: «أحسنك تكوني بنت مؤدبة.. إنتي عارفة إيه اللي بيحصل لقا بتكوني مش مؤدبة»

«لا.. لا.. أرجوك.. هكون مؤدبة.. هكون مؤدبة جدًا»

«اقلعي هدومك»

صوت ضربة قوية وبكاء بولي بيزيد وهي بتقول: «لا.. لا مش هكذب ثاني»

حطيت يدي على فمي عشان مصرخش وأنا سامع صوت والدي بيقول بغضب: «سمعتي أنا قلت إيه؟.. اقلعي هدومك»

مقدرتش أتحمّل أكثر من كدا، خرجت من عُرفتي بسرعة وجريت على السليم، كان نفسي أكون مُخطئ وأشوف والدي قاعد في الصلاة برا، دعيت ربنا ألاقيه في الصلاة، دعيت ربنا أكون بتخيّل.. أكون بحلم، لكن بمُجرد ما دخلت عُرفة المعيشة لقيت والدتي قاعده لوحدها، سألتها وأنا بعيط من كُتر الخوف: «ماما.. ماما.. بابا فين؟»

كُنت بترعش من الخوف وأنا مُنتظر إجابتها، بصتلي قبل ما تبتسم بهدوء وهي بتقول: «بابا بيصلي في أوضته يا حبيبي»

سألتها بشك: «بجد يا ماما؟»

قالت بابتسامة: «طبعا يا حبيبي... تعالي هنا هقولك حاجة»



حضنتني وهي بتكمل كلام: «تعالى نسمع برنامج في الراديو.. برنامجنا المفضل على وشك البدء»

قعدت جنبها بهدوء عشان نسمع البرنامج، حضنتني جدًا وهي ساكتة، فجأة قالتلي بدون مقدمات: «أنا بحب والدك»

قُلتها وأنا بحضنها أكثر: «عارف يا ماما... عارف»

\*\*\*

كان بياكل عشاء بهدوء كما لو إن مفيش حاجة حصلت، سألتني من غير ما يرفع عينيه من طبقه: «هتكذب تاني؟»

رديت عليه بسرعة: «لا مش هكذب مرة تانية.. المرة اللي فاتت كان خيالي أقوى مني»

ابتسم وهو حاسس بالرضا، شاورلي على والدتي وهو بيقول: «هتقول إيه لماما؟»

بصيت لوالدي وأنا حاسس بالحزن وقُلتها: «آسف يا  
ماما»

حافظ على ابتسامته وهو يقول: «كدا تبقي ولد  
مؤدب.. أتمني تكون اتعلمت الدرس المرة دي»  
«اتعلمته»

بقية العشا تكلم معانا عن حاجات في شغله وعن  
حاجات هنعملها في الأجازة الجاية، كمان طلب من  
والدي تخبز لنا فطيرة الثفاح الشهيرة بتاعتها عشان  
هو بيحبها، بمُجرد ما خلصنا العشا استأذنته إني أرجع  
عُرفتي ووافق.

بمُجرد ما دخلت العُرفة قفلت الباب على نفسي وقربت  
من فتحة التهوية وهمست: «بولي؟»

سمعت صوت بُكاء بدأ، كانت بتعيط بحزن مش  
طبيعي، همست لها مرة ثانية: «بولي.. أنا آسف.. مُمكن  
تسامحيني؟»

ردت بعد ثواني: «ممكن»

«إنتي كويسة؟»

«لا»

بصيت حواليا لثواني قبل ما أقولها بحماس: «أنا لما  
يكون متضايق أو حزين بلعب لعبتي المفضلة»

مسكت السيف اللعبة بتاعي وقربت تاني من فتحة  
التهوية وأنا بسألها: «تحبي تلعب معايا؟»

«ماشي»

«تمام.. أنا هكون الأمير وإنتي هتكوني الأميرة.. إحنا  
الإثنين بنحكم المملكة دي سوا.. بس كل واحد بيحكم  
جزء من المملكة.. إنتي بتحكمي الغلية وأنا هحكم  
بقية المنزل.. إيه رأيك؟»

سمعتها بتبطل عياط وهي بتسأل بعدم تصديق: «أنا  
هكون أم.. أميرة؟»

قُلتها بفرح: «طبعا.. تقدرى تكونى أى حاجة تحببها»

وبقت دى عادتنا السرية، كل يوم بنستنى لَمَّا والدى ووالدى يناموا ونقول الكلمة السرية لبعض عشان نتظمن إن مفيش حد جنبنا، كلمتى السرية كانت إنى بخبط على طرف فتحة التهوية مرتين ورا بعض، لو هي لوحدها بتخبط على طرف فتحة التهوية من عندها مرة واحدة، ساعتها بنعرف إن الدنيا أمان ونقدر نتكلم أو نلعب براحتنا.

بعض الليالي كُنَّا بنحكّم المملكة سوا، وليالي تانية كُنْتُ بحكيلها قصص وحواديت، ليالي غيرها كُنَّا بنتكلم فى كل حاجة، كان أمر لطيف إن يبقالى أخت صغيرة، لكن الموضوع كان أحسن من إنه يستمر.

ساعات كُنْتُ بخبط مرتين على طرف فتحة التهوية، بعدها أسمع صوت صراخ أو خبط وضرب، ساعتها كُنْتُ بنزل لغرفة المعيشة عشان أتأكد من عدم وجود والدى، وفعلا.. كُنْتُ بلاقى والدى قاعدة على الكنبه لوحدها بتسمع الراديو، دايمًا لَمَّا بسمع صوت الخبط

والضرب مكنتش بلاقي والدي، ساعتها كُنت بتأكد إنه  
في الغلية مع بولي، بعدها بولي مبتكلمش كتير.

\*\*\*

في ليلة من الليالي بولي سألتني: «هو الدنيا برا شكلها  
إيه؟»

كُنت نايم على السرير، بصيت ناحية فتحة التهوية  
وأنا حاسس بالحيرة، حاولت أرتب أفكاري وأنا بقولها:  
«هو.. كبير.. يعني أعتقد إنه أكبر من الغلية.. بس  
دلوقتي الأرض مليانة ثلوج عشان راس السنة قرِبت»

«الثلوج دي شكلها إيه؟»

«عمرِك ما شُفتي ثلوج قبل كدا؟»

«لا»

«طيب.. تحبي أوريكي؟»

«لا»

«ليه؟»

«لأن أنا مش مسمو حلي أغادر الغلية»

وقفت على سريري وأنا بسألها بحماس: «وهيحصل إيه لو غادرتي الغلية مرة واحدة وبس.. مُمكن أجي أساعدك وأخرجك.. هاخذك برا تشوفي الثلوج ونرجع تاني بشرعة.. بابا مش هيعرف أي حاجة»

سألتنى بتردد: «هيبقي سر بيننا؟»

كُنت حاسس الحماس في صوتها وهي بتقول: «هخرج برا.. هخرج برا»

ضحكت و أنا بقولها: «هتُخرج برا»

سألتنى بفرحة: «إمتى؟»

«ممكن دلوقتي حال....»

سمعت صوت بابا من ورايا بيسألني بغضب: «إنت بتكلم مين؟»

بصيته ببطء وأنا وجهي بيتحوّل للون الأحمر، بابا مسكني!

حاولت أبرر موقفي بخوف وأنا بقول: «أنا.. أنا مبكلمش حد.. أنا بلعب.. بلعب»

بص لمكان اللعب بتاعتي، في أبعد ركن في الغرفة، بصلي تاني بغضب، سألني تاني بتحدي: «بتلعب مع مين؟»

«مش مع حد.. بلعب لوحدي»

ملامحه بقت قاسية جدًا وهو بيقول ببرود: «كَمَلْ لعبك بس وطي صوتك شوية بعد كدا»

كُنت على وشك أتبول على نفسي من كُتر الخوف، حسيت بارتياح بالغ وهو بيخرج من الغرفة، صدقني.. الحمد لله، انتظرت لدقايق طويلة قبل ما أكلمها مرة تانية: «بولي .. هنستني لحد ما بابا ينام وبعدين نُخرج»

لكن بولي مردتش عليًا، حسيت بالقلق وأنا بسألها:  
«بولي.. لسه عاوزة تخرجي؟»

المرّة دي صوت بابا اللي رد عليًا وهو بيقول: «لا»

صوته كان قاسي ومليان برود وهو بيقول: «مش  
هتخرج»

حطيت إيدي على فمي عشان أمنع شهقة قوية،  
سكتت تمامًا، سمعت بولي بتقول بضعف وألم:  
«أرجوك. انقذني»

لكن أنا الخوف كان شالني، سمعته بيضربها بعنف..  
ضربة ورا ضربة ورا ضربة.. بولي بتستنجد بيًا،  
بتستنجد بأخوها العاجز الجبان، مش قادر أتحرك وأنا  
سامع صوت الضربات، وفضلت واقف مش قادر أتحرك  
لما صوت الضرب توقف والصمت سيطر على كل  
حاجة.

واقف.. في مُنتصف عُرفتي.. إيديًا على فمي.. سامع  
صوت خطواته بيخُرج من الغلية.. خطواته بطيئة



وتقيلة.. لمحته خارج من باب البيت، وشفته واقف في الحديقة الخلفية، يحفر.. فضل طول الليل يحفر!

وفي الصباح وتحت شجرة قديمة لمحت أثر لحفرة مردومة بغير اهتمام، الحفرة دي مكانتش متغطية بثلوج كثيفة زي بقية الحديقة.

فتحة التهوية.. كانت صامتة تمامًا!

\*\*\*

جدي سكت وهو بيشرّب آخر رشفة من الكاس بتاعه، بصيت ناحية فتحة التهوية وأنا حاسس بالخوف، سألته: «أختك كان اسمها بولي؟»

هز راسه بالموافقة وهو بيقول: «زي اسم والدتك»

سألته: «ماما تعرف سبب تسميتها بالإسم دا؟»

«تعرف إن كان ليّا أخت.. بس متعرفش اسمها ولا باقي التفاصيل»

سكتت لثواني وقلبي بيدق بسرعة، سألته: «إيه اللي  
حصل بعد كدا؟»

«مفيش.. مفيش أي حاجة حصلت»

ببطء وفضول سألته تاني: «ليه؟.. ليه كان حابسها  
فوق؟»

سكت لدقيقة عدت كأنها شهر من الصمت قبل ما يزد:  
«كان عندها مُتلازمة داون.. كان مكسوف إنه طبيب  
وبنته مريضة»

«جدو.. أنا آسف»

أنا مش عارف اللي حصل دا كان حقيقي ولا تأثير  
القصة عليا بس مُستعد أقسم لكم إنني سمعت صوت  
من فتحة التهوية يقول: «شُكرًا»

كان صوت طفلة صُغيرة.

وجدني ابتسم وعينيه لمعت برضا تام.

## حدث بالفعل 6 - 2 - الغلية

\*\*\*

## 7- حارس الملكة

كُنت جزء من الجيش الإنجليزي، قضيت سنتين في العراق، سنة في أفغانستان، أهلي كلهم بيكرهوا المهنة والحياة اللي أنا اخترتها، وبصراحة شديدة مقدرش ألومهم.

بس هقولكم على مفاجأة مذهلة، أكثر تجربة مخيفة عشتها في حياتي مكانتش في ولا جولة من جولاتي مع الجيش، بالعكس.. حصلتلي في عاصمة الضباب.. في لندن!

كُنت لسه مخلص السنة الثالثة ليا خارج البلاد، الدولة قررت تكرمني، على ما يبدو إن النجاة لمدة سنة من طالبان وسط الجبال أمر يدعو للتكريم. عرضوا عليا أكون جزء من حُرَّاس الملكة.

مش عارف مدى علمكم بحُرَّاس الملكة لكن في إنجلترا، دا أمر عظيم جدًا. وعلى أد عظمته على أد ما كُنت بكرهه، كُنت مُتمركز بشكل دائم أمام قصر الملكة.

قررنا يكافئوني على خدمتي للبلد في 3 سنين حروب متتالية باني أقف ثابت غير مسموح ليأ بأي حركة ولازم أتحمّل سخافات السّيّاح الصينيين وهما بيحاولوا يضحكوني، كُنت على وشك أرفض لكن والدتي كانت سعيدة وفرحانة بالتكريم دا فمقدرتش أرفضه، واضطريت أتحمّل سخافات السّيّاح الآسيويين، مفيش أدامي حل ثاني غير كدا.

لكن اتضح إن كهوف كابول أكثر أمنًا من المهنة دي!

\*\*\*

خلال مرات قُليّة كانوا بيطلبوا مني أتمركز أمام برج لندن بدل قصر الملكة، وردية الخدمة بتتراوح بين ساعتين و3 ساعات، على حسب عدد الضباط اللي هيمسكوا خدمة في اليوم دا، وخلوني أقولكم إن ورديات الخدمة في برج لندن من أسوأ التجارب اللي مُمكِن حد يمر بيها.

طول الوقت السكرانين بيحاولوا يضحكونا أو يخرجونا عن شعورنا، دا غير سخافات السّيّاح و

مضايقاتهم، كل واحد فيهم يبقي مفكر إنه الوحيد اللي هيقدر يضحكنا، ومع التكرار طوال الوقت الواحد بيكون فعلاً زهق وفقد أعصابه، بس دي وظيفتي ودا جزء من متاعب الوظيفة، عشان كذا كنت بضطر وبأجبر نفسي على التحمل.

لحد يوم معين سنة 2012، اليوم كان بادئ مهل زيه زي أي يوم ثاني، في البداية كان فوج سياحي فرنسي، مجموعة شباب من أصحاب الدم الخفيف قرروا يضايقونا، وبصراحة كانوا من أسوأ الشياح اللي حاولوا يضحكونا. ولسوء حظنا ممنوع علينا التحرك إلا في حالة الإحساس بالخطر، وراهم مجموعة من النساء الروسيات السكرانين وبصراحة كانوا لطاف، حرارة الجو بدأت تزيد و الخوذة بدأت تخلي الأمور أسوأ، فجأة ظهر أدامنا فوج سياحي ضخمة، ماشيين كلهم ورا مرشد سياحي، وبدأوا كلهم يحاولوا كالعادة.. الثكت.. الوجوه المضحكة.. المواقف الكوميديّة، كلهم جاهزين بالكاميرات عشان يصورونا بنضحك، لابسين شورتات وتيشيرتات خفيفة. كلهم نفس الأزياء

والنكت ماعدا واحدة بس، كانت واقفة في الآخر لوحدها. بصالي بدون أي حركة، ست شكلها لطيف وبتتمتع بجمال مقبول، في مُنتصف الأربعينات تقريبًا، شعرها طويل ولونه بني داكن، لكن بشرتها شاحبة جدًا، من زيها وشكلها كُنت قادر أقول إنها مش سائحة، دي إنجليزية، يبدو إنها مُرافقة للفوج السياحي دا.

\*\*\*

بعد ما اقتنعوا إننا مش هنضحك ولا هنتحرك قررنا يكتفوا بمجموعة صور وبدأوا يتحركوا عشان يكملوا جولتهم السياحية، إلا المرأة الشاحبة، فضلت واقفة مكانها بتراقبني بصمت، أنا خلال الشغل هنا شُفت ناس كتير بتحاول تعمل أي حاجة عشان يضحكونا أو يخلونا نتحرك، لكن الست دي كانت مُختلفة.. كانت مُصرّة على دا إصرار غير عادي، فضلت واقفة أدامي لَمُدّة ساعتين، مئات السُيَاح وعشرات الأفواج جُم ومشوا، وهي لسه واقفة بدون حركة زي ما هي، بتبصلي بصمت وبدون أي حركة، الجو كان حر جدًا وأكيد هي كمان حرانة ومتضايقة من الشمس، لكن هي

كانت واقفة بهدوء.. مش باين عليها الحر ولا العرق نهائياً، ملامحها جامدة وجافة تمامًا ودا معناه إنها مش عايضة تضحكني، بعد حوالي نص ساعة، بدأ الجو يهدى والأفواج السياحية تختفي، قربت مني ببطء، خطوات قليلة و بطيئة، حسيت بالملل وأنا بقول في سري: «بدأنا.. دلوقت هتحاول تخليني أضحك»

قربت مني خطوة كمان، وقفت على بُعد خطوتين بس مني، كانت بتبصلي في عيني بطريقة مباشرة، ميلت راسها لليمين ببطء وبعدين للشمال ببطء أكثر، إستراتيجية غريبة عشان تقدر تضحكني!

فجأة أدركت حاجة مهمة، الست دي مش بتهزر ومش بتحاول تضحكني، بدأت تميل بنصف جسمها اللي فوق ناحيتي، سلوكها مش مستقر وحركاتها بطيئة ومُخيفة بشكل كافي، مش بتشيل عينيها من عينيّ أبداً، مبتقربش ولا بتبعد عني، بتميل ناحيتي ببطء مُرعب، وجهها توقف على بُعد مليمترات عن وجهي، شكلها مُخيف ولامحها مُرعبة من القرب دا، بدأت تترعش بقوة، جسمها كله بيتهز ورأسها بتترعش، كانت



زي ما تكون بردانة بشكل مش طبيعي، مُتخيلين  
الموقف؟

وبعدين.. وبعدين عملت حاجة خوفتني فعلاً، أنا عدى  
عليًا مواقف كتير هنا غير طبيعية زي الناس اللي  
بتشتمني أو زي الراجل اللي حاول يضربني قُرَيْب لكن  
اللي هي عملته دا كان أول مرة في حياتي يعدي عليًا،  
فتحت فمها كما لو أنها هتصرخ، لكن بدون أي صوت،  
مفيش صوت، واقفة على بُعد خطوتين.. مايلة  
بجسمها عليًا.. وجهها لازق في وجهي.. راسها مايلة  
ناحية اليمين وفاتحة فمها بتصرخ بدون صوت، سُرعة  
رعشة جسمها بدأت تنهز بسُرعة مُخيفة وغير طبيعية،  
مش هكذب عليكم، فجأة حسيت إني بردان.. جسمي  
بدأ يترعش من البرد، رغم إن اليوم كان حر جدًا،  
اتحركت بسُرعة بعيد عنها، مسموح لنا بعشر خطوات  
كُل يوم وأنا اخترت أبعد العشر خطوات دول بعيد  
عنها.

مشيت بسُرعة لحد العشر خطوات ما خلصوا، وقفت  
مكاني وغمضت عينيًا، كان عندي أمل تختفى بمُجرد

ما أفتَح مرة ثانية، فتحت عينيًا ببطء وفوجئت إنها واقفة أدامي!

مايلة عليًا وفمها مفتوح زي ما تكون بتصرُخ بدون صوت، راسها بتتهز بسرعة غير طبيعية، كنت واقف زي المشلول، مش قادر أتحرّك من مكاني، حاسِس إن الخوف شاللي تمامًا، مش قادر أتصرف، مُمكن أصرُخ.. أعيِّط.. أتحرّك لكن أنا واقف زي المشلول، الخوف سيطر عليًا تمامًا.

أخيرًا تماكنت أعصابي وصرخت بصوت عالي: «وسّع الطريق لحُرّاس الملكة»

مسموحننا نصرُخ بالجُملة دي لَمّا حد من الزوّار يعترض طريقنا، لكن هي متحركتش من مكانها، بالعكس، قربت مني أكثر.

صرخت بصوت أعلى: «وسّع الطريق لحُرّاس الملكة»

وهي زي ما هي، كأنها مش سامعاني، مش قادر، أنا خايف جدًا، خايف بشكل مش طبيعي، رجعت لورا

وصوبت فوهة بندقيتي ناحيتها، دا كان الحل الأخير  
اللي بنلجأ ليه لَمَّا السِّيَّاح بيضايقونا زيادة عن اللزوم.

ساعتها قفلت فمها المفتوح ورجعت تاني مكانها كأنها  
إنسانة طبيعية، وبصراحة أنا خايف لدرجة إني مش  
قادر أقف مكاني، بدأت أتحرك بخطوات عسكرية  
بتوتر وخوف، رجعت لموقعي الأصلي، بمُجرد ما  
استقرت مكاني بصيت عليها بطرف عيني لكنها  
مكانتش موجودة، اتنهدت بإرتياح بالغ، همست  
لنفسي: «إيه الرُّعب دا.. كويس إنها...»

قبل ما أكمل حسيت بهمس من ورايا وصوت بيهمسلي  
في ودني اليمين: «10 .. 9 .. 8 ..»

كانت ورايا!!

همست تاني والمرة دي ودني الشمال: «10 .. 9 .. 8 ..»

جسمي كله بيترعش من الخوف، مش قادر أتمالك  
أعصابي، أنا دلوقت خايف بطريقة مش مُمكن  
تتخيلوها.

بدأت تسرّع همسها بطريقة مُخيفة: «10..9..8..  
10..9..8..10..9..8»

مشت ببطء لحد ما وقفت أدامي مرة ثانية، كملت همس بطريقتها الغريبة، هو عشان أكون أكثر دقة مكانش همس بالشكل اللي تعرفوه، بس ملامحها كانت بتصرّخ، بتصرّخ بجنون لكن اللي سامعه كان صوت همس غريب سريع، كانت حاجة مُخيفة ومش طبيعية، كانت بتهمس الأرقام الغريبة دي مرارًا و تكرارًا.

كُنت على وشك أخل بنظام ورديات الحراسة، مش قادر أتحمّل أكثر من كدا، فيه حاجة مُخيفة أوي في الست دي، مش قادر أستحمّل أكثر من كدا.

حاولت أستجمع شجاعتي، همست لها بصوت بيتكسر من الخوف: «لو سمحتي.. لو سمحتي ابعدني»

فجأة ظهر فوج سياحي ضخم وقرب منا بخطوات سريعة، المرأة المخيفة رجعت لورا، كانت لسه بتبصلي بنظراتها المُرعبة، بتهمسلي: «10..9..8»

سكتت تمامًا، بعدت عني بهدوء، بدأت تذوب وسط الزحام بشكل بطيء، إحساس غريب ومُخيف إن المرأة دي مش طبيعية، لكن الفوج دا.. الفوج السياحي دا أنقذني، عُمري ما كُنت خايف من حد زي ما كُنت خايف منها وعُمري ما كُنت شاكر لحد زي ما كُنت شاكر للفوج السياحي الصيني دا

خلصت الوردية بتاعتي ورجعت للقاعدة بتاعتنا، حكيت اللي حَصَل لاتنين من زملائي، هُمّا كانوا حكولي على تجارب مُخيفة حصلت لهم قبل كدا، بس قالولي إن التجربة دي كانت مُخيفة جدًا أكثر من أي حاجة تانية حصلت ليهم، لما القائد بتاعنا وَصَل قرروا يحكوا له، طلب مني أحكي له كل حاجة حَصَلت بالتفصيل القمل، حكيت له اللي حَصَل، بان عليه الخوف وهو بيسألني بجدية: «استني.. استني.. إنت اتكلمت معاها؟»

مكُنتش فاهم السؤال، حاولت أخليه يفهمني يقصد إيه، سألني تاني ببطء وعلامات الجدية على ملامحه: «صارحني.. اتكلمت مع الست دي و لا لأ؟»

كُنت خايف يحرمني من الأجازة لو قُلتله إني كلمتها  
وخرقت القواعد، اضطريت أكذب: «لا يا فندم..  
مكلمتهاش»

تنهد بارتياح وهو يقول: «الحمد لله.. لو رجعت أو  
شُفتها تاني.. ممنوع منعاً باتاً تتكلم معاها.. فاهم؟»

بص لباقي الضباط وهو يقول: «الكلام دا للكُل..  
فاهمين؟»

علامات القلق والجدية ظهرت على الجميع، كُنت  
متوتر وخايف ومش فاهم، بس بصراحة كُنت مُرهق  
وتعبان، قررت أروح أنام وأنسى الست المجنونة  
المُخيفة دي.

\*\*\*

الأيام اللي بعد كدا، وورديات الحراسة اللي بعد كدا  
مرت بهدوء وملل، مشفتش الست المجنونة دي مرة  
تانية، و بمرور الوقت نسيت الموضوع تمامًا.

ونزلت أجازة وقعدت في البيت مع زوجتي، في يوم من الأيام وفي حدود الساعة 3 بعد مُنتصف الليل، صحيت على صوت خبطة جامدة على الباب ولسبب غير معلوم أول حاجة جت في دماغي هي الست المُخيفة اللي قابلتها من أيام، حسيت بالخوف، بصيت لزوجتي وقُلتها بكسل: «ممكن تقومي تبصي من العين السحرية مين اللي بيخبط؟»

كانت نائمة بعمق كأنها مش سامعة حاجة، كأنها مُغمى عليها، قُمت بخطوات بتترعش وسألت من ورا الباب: «مين؟»

بصيت من العين السحرية، الظلام مسيطر على كل حاجة، سألت بصوت أعلى شوية: «مين؟»

المرّة دي الرد جالي على شكل خبطة أقوى على باب البيت، اتنهدت بخوف وأنا بفتح الباب.

اللي أدام الباب كان آخر حد مُتوقّع إنني أشوفه.

على الباب كانت واقفة زوجتي!



كانت في زيارة لأهلها ووجت من شوية بعد ما أنا وصلت البيت، وقضينا اليوم سوا ونمنا، واقفة أدامي وأنا بترعش من الخوف بجنون، مش فاهم إيه اللي حَصَل، علامات الغضب باينة على وجهها وهي بتقول: «هو أنا لما أتأخر للدرجة دي.. متسألش عليا؟»

كُنت لسه واقف بترعش من الخوف ومش قادر أرد، قالت تاني بعتاب: «طب حتى اتصل بيّا عند أهلي وشوف نزلت ولا لأ؟»

بصراحة مكنتش سامعها، أنا عارف إني مُمكن أكون صاحي من النوم مش مركّز لكن أنا مُتأكد إن زوجتي رجعت من عند أهلها ونايمة في السرير جوا.

بصيت لها بخوف وأنا بقول بتوثر: «استني هنا»

«فيه إيه؟»

«بقولك.. استني.. هنا»

مش عارف إزاي قدرت أمشي لحد الغرفة وأدخلها.



طبعًا إنتم متوقعين إن الموضوع زي أفلام أو قصص  
الرُعب.. هدخل الغُرفة وألاقيها فاضية.. صح؟

يا ريت...

دخلت الغُرفة، الظلام دامس ومسيّطر على كل حاجة،  
بس قادر أسمع صوت تنفُس، صوت تنفُس ثقيل، سامع  
صوت ضربات قلبي، حاسس إنني هيغمي عليًا من كُتر  
الخوف، دوّرت على مفتاح الإضاءة و نوّرت الغُرفة

«5..6..7..5..6..7»

صوت الهمس جاي من رُكن الغُرفة، الركن القُريب مني،  
وهناك شُفتها واقفة، المرأة المُخيفة اللعينة، ضهرها  
للحائط ووجهها ليًا، بتتأملني بنظرات مُرعبة، بدون ما  
أقرر قلت كلمة واحدة بس: «اللعنة»

ردّت عليًا بهدوء: «5..6..7»

قربت مني عدة خطوات ببطء، فمها مفتوح على آخره  
كالعادة، كأنها بتصرُخ بدون أي صوت، كل خطوة

بتقربها مني بتردد معاها الأرقام بهمس: «5..6..7»

مش قادر أتحرك، براقبها وهي بتقرب مني ببطء، إحساس مُرعب.. عُمري ما كُنت خايف زي ما أنا حاسس دلوقتي، بس الخوف المرة دي خوف مُختلف، خوف خام، مش عارف إيه اللي المفروض أخاف منه.. مش عارف المرأة دي إيه؟.. روح شريرة؟.. شبح؟.. شيطان؟

أنا خايف منها، خايف بجد، فكرة إنها قعدت معايا يوم في البيت مُنتحلة شخصية زوجتي ونامت معايا في نفس السرير فكرة مُرعبة، بس السؤال.. ليه ما أذتنيش؟

قربت مني جدًا، مالت عليًا جدًا كعادتها، على بُعد سنتيمترات من وجهي، مفيش أي صوت في الغرفة غير صوت دقات قلبي الخايف، همست: «5..6..7»

فجأة سمعت صوت صرخة مليانة خوف من ورايا: «إيه اللي بيحصل؟»

## صوت زوجتي!!

\*\*\*

بصيت لزوجتي، صرخت فيها بخوف: «اهربي»

جرينا ناحية المطبخ بسرعة، مسكت سكينه تقطيع اللحم الكبيرة في أيدي، زوجتي ماسكة في هدومي بخوف وهي بتبكي، مش قادرة حتى تسأل أي سؤال.

سامع صوت خطواتها، شايف ظلها، خارجة من الغرفة ببطء، بتتحرك في الممر ناحية المطبخ، باصة للسقف وهي ماشية، على فمها ابتسامة شرييرة ساخرة، جسمها بيترعش بسرعة غير طبيعية.

عدت باب المطبخ ومشت لحد باب الشقة، زوجتي كانت سايباه مفتوح، بمجرد ما خرجت جريت ناحية باب الشقة وقفلته، زوجتي لسه في حالة صدمة ومش قادرة تتكلم، كنت خايف تفكرني بخونها، بس هي مفكرتش في كدا، نظرة الرعب والخوف اللي في عينيها بتقول إنها مفكرتش في كدا.

دي كانت أكثر تجربة مخيفة مرّيت بيها في حياتي  
كلها، لو حد فيكم شاف المرأة دي.. بلاش تتكلم معاها.

أبدًا..

\*\*\*

## 8- جاك السكير

أثناء فترة دراستي في الصف الرابع والخامس، كنت متعوداً أقضي ليالي كثير في بيت صديقي توم، خصوصاً عطلات نهاية الأسبوع، توم كان عايش في بيت كبير في واحدة من المزارع المعروفة، كنت بنام في عُرفته هو وأخوه الكبير والتر، وكنا متعودين إحنا الثلاثة نسهر نحكي لبعض قصص رعب مُخيفة.

لكن أكثر قصة مُخيفة كانت قصة حقيقية، هحكيها لكم زي ما والتر حكاها بالظبط.

\*\*\*

زمان.. وتحديدًا سنة 1920، البيت اللي إحنا قاعدين فيه دا كان ملك لأسرة تانية، أقرب جار ليهم كان سكير اسمه جاك، كان عايش في كوخ خشبي حقير وسط الغابة ودايمًا كان هربان من الشرطة و مطارَد، عشان كذا رب الأسرة حذر ابنه وبنته الصغِيرين إنهم مهما حصل ميروحوش ناحية بيت جاك.

الولد الصُّغَيْر كان عايش في نفس الغُرفة اللي إحنا قاعدين فيها دلوقتي حالاً، وفي ليلة من الليالي، صحى من نومه على صوت زجاج بيتكسر، وعشان هُما عايشين قُرَيْب من جاك السكير، الولد كان خايف جداً، قام بـسرعة وقفل باب غُرفته، لصق أذنه في الباب وبدأ يتصنت.

بدأ يسمع صوت خطوات ثقيلة مكتومة ماشية في الممر، الخطوات أثقل من إنها تكون خطوات والده، ورغم إن الباب مقفول والخطوات لسه بعيدة عن الباب إلا إنه كان قادر يشم رائحة الكحول، الخطوات قربت لحد باب الغُرفة، وزى ما يكون عارف إن الولد بيتصنت عليه، خبط على الباب برفق وهو بيقول: «دخلني يا صغير»

كان صوت جاك السكير، الولد مفتحش الباب، وبدافع الخوف صرخ بصوت بيترعش: «لا»

صوت الخطوات بدأ يبعد عن الباب، الخطوات الثقيلة بتتجول في البيت ببطء، فجأة سمع صوت والده

بيصرُخ في جاك، لكن فجأة الصراخ الغاضب تحوّل لصرخات خوف ورعب، ولمُدّة ساعة تقريبًا الولد فضل واقف ورا الباب بيترعش وبيسمع صوت صرخات أبوه بتتردد في البيت كُله، تمنّي لو إن الصرخات المليانة خوف دي تسكّت، لكن لما الصراخ وقف والصمت سيطر على المكان كُله، الولد عرف إن الصمت هو أسوأ حاجة في الموقف دا.

الخطوات البطيئة بدأت تقرب من باب غرفة الولد مرة ثانية، خبط على الباب برفق وهو يقول: «افتح الباب.. تفتح وإلا هتندم»

وللمرة الثانية الولد كان قادر يشم رائحة الكحول رغم الباب الخشبي اللي بينهم، وللمرة الثانية بيصرُخ فيه: «لا»

الخطوات بعدت مرة ثانية، المرة دي كان دور والدته، الصرخات والاستغاثة و البكاء استمروا المرة دي لساعتين، في النهاية الصمت سيطر على المكان كُله مرة ثانية، وكالعادة الخطوات قربت من الباب ثاني،

خبط على الباب برفق وقال: «افتح الباب.. دي فرصتك الأخيرة»

الولد كان خايف، بيترعش من الخوف، بصوت بيترعش قال من بين دموعه: «أر.. أرجوك.. بلاش تؤذي أختي»

جاك كان سكران، كان فخور بنفسه، كان فرحان بأفعاله، ضحك بشخريّة و هو بيقول: «مش هأذيها لو فتحت الباب»

لكن الولد رفض للمرة الثالثة، والمرة دي صرخات أخته وبكائها إستمروا لثلاث ساعات كاملة.

لما الشرطة بدأت التحقيقات بعد يومين من الحادث، وجدوا الأب والأم والأخت مربوطين في سرايرهم بعنف، جاك فتح فتحة بسيطة في بطونهم وبدأ يخرج أحشائهم الداخلية ببطء شديد عشان يعذبهم أطول وقت ممكن..



لقوا الولد لسه في أوضته، كان على وشك يموت من الجوع والعطش، بيعاني من الجفاف، لكنه لسه حي، قافل على نفسه وقاعد في الأوضة دي. كان مُدمر نفسيًا وقضي الباقي من حياته في مصحة بيتعالج، وبيقولوا إنه دايمًا كان باصص للسقف وبيسأل بيأس: «كان المفروض أفتح الباب.. صح؟ كان المفروض أفتح الباب.. صح؟»

جاك السكير اتقبض عليه وأعدّم، الكوخ بتاعه تم هدمه وجثته اتدفنت، لكن روحه الشريرة لسه حرة طليقة، بتزور البيت دا بانتظام، لكن ظهوره دايمًا له علامات، هتشم رائحة الكحول.. هتجس بألم في معدتك وهتسمع صوته بيحاول يخرجك من الغرفة طول الليل.

لكن اوعى .. اوعى تخرج مهما حصل.

\*\*\*

القصة دي رعبتني، رعبتني فوق ما تتخيلوا، وليلتها قفلنا الباب على نفسنا ونمنا والنور مفتوح، في السن

دا خيالك بيبقى واسع وبيصورلك حاجات مُخيفة،  
كُنت خايف وحاسِس إن أي حركة في البيت بتوقّف  
قلبي لكن في النهاية نمت.

صحيت في مُنتصف الليل، شامِم رائحة الكحول،  
سامع خطوات ثقيلة برا، وتخيلوا.. حسيت بألم غريب  
في معدتي!

لما حكيت للأخين ضحكوا وقالوا إنهم شكوا نفس  
الرائحة، حسوا بنفس الألم في معدتهم ودي كانت آخر  
مرة أبات عندهم.

في النهاية انتقلوا لولاية تانية، ومشفتش الأخين من  
يومها لحد النهاردة.

بحكي لكم الحكاية دي عشان اللي حَصَل النهاردة  
الصُبح، دخلت معمل مادة الكيمياء، مادة من المواد  
اللي بحبها في دراستي الجامعية، أثناء ما كُنت بجهز  
لواحدة من التجارب، شमित رائحة أنا عارفها كويس،  
دي رائحة جاك السكير، مش رائحة شبهها، لا.. هي

نفس الرائحة اللي أنا شميتها يومها، هي رائحة جاك  
السكير.

مشميتش الرائحة دي من يوم ما كُنت نايم في بيت  
توم ووالتر، بس فاكرها كويس، مسكت الزجاجاة  
وقريت اسم المادة الكيميائية اللي جواها، كانت مادة  
مُخدرة شهيرة.

ساعتها بس فهمت، فهمت ليه لما شميت المادة دي  
نمت، عرفت سبب الألم اللي حسيته في معدتي،  
وعرفت سبب الألم اللي كُنت بحسه في مؤخرتي  
بعدها.

ساعتها بس فهمت وأدركت.

مفيش حاجة اسمها جاك السكير.

الأخين اخترعوا القصة دي بس عشان يخدروني  
ويغتصبوني!

## 9- ورشة كتابة

بعد ما خلصت كُلية، قبلت وظيفة كمُدريس في قرية صغيرة في وسط ويسكونسين، كُنت مُدرِس لمادة الأدب وبأدي للطلاب حاجة زي ورشة كتابة إبداعية، وقُرب الهالوين قررت أعمل اختبار صغير للطلاب اللي عندي، المنهج بتاعنا كان جزء كبير منه بيناقش الأساطير الحضارية والفلكلور، ودلوقت جه الدور على الطلاب عشان يطبقوا اللي درسوه بشكل عملي.

حجم القصة: من 100 ل 1000 كلمة.

المطلوب: قصة رُعب تخوفني.

وزي ما إنتم متوقعين من طلاب مدرسة ثانوية، أغلب القصص بتتراوح بين المستوي الرديء والمستوي المتوسط، القصة الوحيدة اللي لفتت نظري كانت قصة متوسطة الحجم، مكتوبة بقلم طالب هادي اسمه جيك، القصة اللي كان كاتبها كان حقيقية جدًا لدرجة إنني صدقتها، قصة مُغرقة في الواقعية، كأنه بيحكي

حدث حقيقي مش بس بيؤلف قصة، قريتها وخطبتها  
على جنب.

كنت مُعجب بيها جدًا.

آخر قصة في القصص كانت لطالبة اسمها كيتي، البنت  
دي موهوبة فعلاً، أنا فاكر وأنا بقرا قصتها كنت عامل  
إزاي، ماسك القلم بتوثر، جسمي عرقان عرق بارد،  
حاسس بإحساس غريب بيسيطر على جسمي كله،  
بمجرد ما خلصتها خطبتها جنب قصة جيك وأنا بفكر  
في حاجة واحدة بس

إيه اللي بيحصل!

لحد النهاردة لسه عندي نُسخ من القصتين، ولحد  
النهاردة بسأل نفسي سؤال واحد، أنا ليه مُحفظ  
بالنسخ دي؟

بس اسمحولي أقولكم حاجة، القصتين دول  
مُتشابكين، القصتين حلوين لدرجة مش معقولة،

مُعجب بالقصتين لدرجة إنني مش قادر أمسك نفسي و  
ما أحكيهمش.

هخليكم تقروهم معايا، وهقولكم حَصَل إيه بعد كدا،  
انسوا كل حاجة و استمتعوا معايا بالقصص الجيدة  
دي.

\*\*\*

القصة الخاصة بجليك:

أهلي قررروا يدخلوا جدتي روزي لدار مُسنين، خدوا  
القرار دا بمُجرد ما بدأت تنفصل عن الواقع، هُمّا اللي  
قالولي كدا، أنا شايف إن دا قرار قاسي. لكن هي  
مكانتش متضايقة من القرار دا، مكانش باين إنها  
متضايقة نهائيًا.

أنا فاكر زياراتي ليها، كانت بتكبر في السن، دايمًا  
قاعدة على الكرسي الهزاز بتاعها وباصّة من الشباك،  
برا الشباك مفيش حاجة غير مساحة كبيرة من الحقول  
الخضراء على مرمى البصر، وفي الشتا بتتحول

الحقول دي لسجادة كبيرة من الجليد، بصراحة مش عارف هي بتحب خضرة الربيع أكثر ولا بياض الثلوج، بمقدرش أسألها لأن كلامها قَلِيل جدًا، على طول قاعدة في الوضع دا تسمع الراديو، الراديو اللي شغال دايماً على قناة واحدة بس، ترددتها كان 89.1.

بس القناة دي عُمر ما كان فيها إرسال، على طول صوت شوشرة، وجدتي كانت دايماً بتسمع الشوشرة دي باهتمام، طول اليوم من غير توقّف، كأنها بتسمع حاجة هي الوحيدة اللي فاهماها.

في يوم كُنت بزورها، كُنت آخذ معايا علبة شيكولاتة كهدية، كعادتها كانت قاعدة على كُرسیها الهزاز وبتتهز بهدوء، حاطة السماعات بتاعتها على آذانها، بتأمل الشباك بصمت، المرة دي بثشاهد سجادة الثلوج البيضاء، معرفش عرفت إني موجود و لا لأ، مشيت لحد الترابيزة الصُغيرة وحتيت علبة الشيكولاتة عليها، فجأة اتحركت بسرعة، مسكت إيدي بقوة وهي بتهمس: «هوشششش... اسمع»



قربت مني ببطء وهي بتشاور على السماعه، قربت  
أذني من السماعه بهدوء، بدأت أسمع لكن مكنتش قادر  
أسمع غير صوت شوشرة.

كُنت على وشك أتكلّم لكن هي كتمت فمي بإيدها.

همست باهتمام أكبر: «اسمع كويس»

حاولت.. وحاولت.. لكن كل اللي كُنت سامعه كان  
شوشرة.

قالت بهمس: «قريب هيجوا.. هيجوا عشان  
ياخدوني معاهم»

بدأت أحس بالخوف، خرجت من أوضتها ورّوحت، في  
البيت حكيت لماما و بابا كل حاجة حصلت، كانوا  
شايفين إنه تصرف عادي ومفيش فيه أي حاجة  
غريبة.

لكن أنا فضلت أفكر في الموضوع، في ليلة من الليالي  
مكنتش عارف أنا، قررت أتصل بصديقتي أبي على



اللاسلكي بتاعنا، أبي عايشة في العمارة اللي أدامي، حكيتها اللي حَصَل وفوجئت إنها مكوّنة نظرية عن القناة دي، بتقول إن الموضوع مُتعلق بأسطورة قديمة في البلدة بتاعتنا، وعشان نعرف أكثر عن الأسطورة دي محتاجين حاجتين، راديو قديم.. خزانة بابها جرار، هندي زهرنا للخزانة بعد ما نفتح بابها ونظبط الراديو على قناة 89.1 ، ونسمع بحرص شديد، ولو ركزنا بشكل كافي هنقدر نسمع صوت خافت جدّا، صوت صرخات مكتومة، صوت صرخات عذاب، صوت سلاسل معدنية بتخبّط في بعض، باب الخزانة المفتوح دا عبارة عن دعوة ليهم، غمض عينيك وركز. اوعى تفتّح عينيك أبدًا، ساعتها هيخرج حاجة غير معروفة من الخزانة، هيشدك لداخل الخزانة واللي هيحصل بعد كدا غير معروف.

سألته باهتمام: «عرفتي الكلام دا منين؟»

قالتلي: «سمعت عنه، بس خلي الموضوع سر بيننا، كل ما عدد أقل من الناس عرف عن الموضوع كل ما كان أحسن»

قُلتها: «متقلقيش.. دا سرنا الصُغِير»

والأيام التالية كُنت بفكرّ دايماً في جدتي روزي وفي اللي أبي حكتهولي، ليه جدتي أبي بتعمل الطقس المُخيف دا؟ ليه عاوزاهم يخطفوها لمصير غير معروف؟

وللمرة الثانية قررت أحكي لبابا وماما، قُلتهم إني قلقان على جدتي، لكن هُما مكانوش مُهتمين بكلامي بشكل كافي.

ماما قالتلي: «من يوم ما جدك مات وهي حالتها النفسية سيئة، بتقول دايماً إنها عاوزة تروحله»

كُنت عاوز أعرف أكثر، عشان كدا قررت أجرب أنا، انتظرت مُنتصف الليل، فتحت باب الخزانة بتاعتي وقعدت على سريري وضهري للخزانة، ظبطت الراديو على القناة 89.1 وحتيت السماعات في آذاني، غمضت عينيًا وحاولت أركّز.

قعدت وقت طويل، بحاول أركز في الشوشرة، وكل ما كُنت بركّز أكثر كل ما كُنت بحس إن العالم بيضيق حواليا أكثر، حاسس إحساس غريب، كأني مش لوحدي.

فجأة بدأت أسمع صوت خافت جدًا، صوت صرخات مكتومة، صوت صرخات عذاب، صوت سلاسل معدنية بتخبّط في بعض، ورغم إن الصوت في البداية كان خافت وبعيد لكن مع مرور الوقت كان بيقرّب أكثر. فجأة سمعت صوت يقول بلهجة أمرة: «افتح عينيك»

جسمي كله اتنفض، كُنت متوتر ومشدود جدًا، أبي كانت بتضحك من خلال اللاسلكي بهيستيريا، بصيت حواليا في الغرفة بفرع وتوتر، كُنت لوحدي، بصيت على الشباك وشُفت أبي، بتبتسم وتضحك، قربت اللاسلكي من فمها وقالت: «خُفت مني.. صح؟ مفيش حد في الغرفة غيرك يا جبان»

بصيت على باب الخزانة، كان مفتوح على آخره، صوت الشوشرة خارج من السماعات.

كملت كلامها من خلال اللاسلكي: «كُنت بهزّر معاك»

بس أنا كُنت عارف إن الصوت كان من جوا السماعات  
مش من اللاسلكي..

جدتي ماتت بعد إسبوعين، موتة هادئة أثناء نومها،  
وساعتها حسيت إني مُغفل لأني صدقت موضوع  
الأسطورة دا.

\*\*\*

انتهت قصة جيك، قصته مُمتعة ولطيفة، صحيح  
ناقصها شوية تشويق وإثارة لكن على صعيد الرعب  
هي قصة مُمتازة، فيها أسطورة محلية.. شخصيات  
مُتعددة.. علاقات إنسانية.. نهاية مفتوحة، القصة  
حلوة وأنا كُنت معجب بيها لحد ما قرّيت قصة كيتي.

\*\*\*

القصة الخاصة بكيتي:

خوف.. رعب.. فزع.. محدش هيصدقني.. أبدًا.

أنا قُلتله إني بهزر معاه، بهزر معاه في كل حاجة، قُلتله  
كدا عشان أعرف أنا بالليل.

بس أنا عارفة أنا شُفت إيه، ولد صُغِير، طقوس، الموت،  
الموت بنفسه، موت أسود بقبضة مُميتة، كيان يسيطر  
على ضحيته، بيسحب ضحيته لمخبئه السري والأبدي.

بس أنا كُنت بهزر، بهزر طول الوقت، ودا اللي خلاني  
قادرة أتقبل الموضوع شوية.

كان لازم أعرف.. أعرف أكثر.. رُحت عُرفتها، حسيت  
بالفراغ، كأن حوض كان مليون وفضى، السماعات  
بتاعتها مرمية على الأرض، الشوشرة طالعة منها،  
مفيش حاجة غير الشوشرة.

ضوضاء جاية من الخزانة، صوت تنفس ثقيل، صوت  
خربشة أظافر من جوا الدولاب، مسكت مقبض الباب،  
فيه حاجة جوا.. حاجة مُخيفة.. حاجة مُظلمة، مش  
هقدر أفتح الباب.. مش عاوزة أفتح الباب.. مش  
هسمح للحاجة اللي جوا تخرج.

بعدت عن الباب ببطء، وسمعت صوت، صوت خافت  
بيستغيث.

ساعديني..

صوت الشوشرة بيتردد في الغرفة كلها، بيسيطر على  
كُل حاجة، قفلت باب الغرفة ورايا، مش هسمح للشيء  
دا يُخرج.

مش هحكي لحد.. عُمري ما هحكي لحد.. قصتي مش  
حقيقية.. قصتي محصلتش. صوت الشوشرة مسيطر  
على كُل حاجة.

\*\*\*

خلصت قصة كيتي، دول القصتين، قصتين مُترابطين  
وَمُتداخلين، قصة جيك فيها أسطورة حضارية وقصة  
كيتي فيها مشاعر خوف وفزع، يمكن أنا من كُتر ما  
قريت قصص رعب بدأت أتخيّل حاجات مش  
موجودة، ويمكن أنا ضحية تلاعب من إثنين من

الطالبة الأذكىء؁ بس مهما حَصَل مش هقدر أنكر إن القصص دي شكلها حقيقية جدًا.

بعد الهالوين بأيام طلبت من كيتي تستنى بعد انتهاء الحصة عشان أتكلّم معاها شوية؁ كُنت عاوز أعرف أكثر؁ خصوصًا إنها كانت بتتكلّم بلسان شخصية آبي اللي موجودة في قصة جيڪ؁ واعترفت في القصة إنها زارت العُرفة اللي ماتت فيها جدته؁ طلعت القصة بتاعتها من الدرج وسألتها عن ظروف كتابتها؁ إيه الحاجة اللي ألهمتها للفكرة دي.

ابتسمت بارتباك وهي بتقول: « مش عارفة.. كُنت بجرّب فكرة جديدة.. القصة حلوة؟»

هزيت راسي بالموافقة؁ الفكرة مُمتازة فعلاً؁ قُلتها: جدا

كيتي سألتني باهتمام: «عُمرك سمعت عن القناة  
«89.1؟»



بدأت أحكيها، بس مقدرتش أكمل، تلعثت وارتبكت، ضحكت عليا وقالت: « يا الله.. مستر باتريك.. الموضوع كله كان هزار مش أكثر»

كيتي بدأت تشرحلي إزاي هي وجيك قررروا يتلاعبوا بيّا عن طريق كتابة قصتين مترابطين من وجهتين نظر مختلفتين، الموضوع كله كان بغرض التلاعب بيّا، مقلب الهالوين على حد تعبیرها..

ضحكت وهي بتقول: «ونجحنا في خداعك جدًا يا مستر باتريك»

ابتسمت بارتباك، هعترف إنه كان مقلب كويس، وآه.. نجحوا في خداعي. قُلتها إن أسلوبها مُمتاز وطلبت منها تستمر في الكتابة.

بس كان فيه حاجة مش طبيعية.

كُنت سهران بشرب مع فيتيران، مُدرس قديم معانا في المدرسة، حكيتله عن الموضوع والقصتين بتوع جيك وكيتي، ضحك، وبدأ يفكر في الموضوع شوية قبل ما



يقول: «الموضوع فعلاً غريب.. إنت بتقول إن كيتي قالتك إنها متفقة مع جيك عشان يخدعوك، بس اللي إنت متعرفوش إن كيتي وجيك كانوا أقرب أصدقاء لبعض، لكن فجأة السنة اللي فاتت بعدوا عن بعض.. مبقوش يتكلموا أو حتى يبصوا لبعض، زي ما تكون حاجة كبيرة حصلت بينهم»

وخلال الأسابيع التالية ركزت مع جيك و كيتي، سواء كانوا في حصتي أو في فترات الراحة، مقربوش من بعض.. مبيتكلموش من بعض.. مبصوش على بعض حتى، طلبت من جيك يستناني بعد الحصة عشان أكلمه عن قصته، بدأت كلامي بإنني شكرته على قصته الرائعة، ضحكت وأنا بقوله إن المقلب بتاعهم كان رائع وإنهم نجحوا في خداعي.

جيك ابتسم بإحراج وهو بيقول: «قدرنا نخدعك.. هاهاها.. دي كانت فكرة كيتي»

قالي إن كل دا مش حقيقي، مفيش حاجة إسمها قناة 89.1؛ وجدته مماتتش في دار مُسنين، كل

الشخصيات مش حقيقية ومُجرد خيال تام.

قُلتله إنهم عملوا حاجة مُمتازة وطلبت منه يستمر في الكتابة.

ورغم كدا حاسس إن فيه حاجة ناقصة، إزاي هيتفقوا عليا وعلى خداعي وهُمّا أصلاً مبيتكلموش مع بعض، يمكن هُمّا في علاقة عاطفية وبيتظاهروا إنهم مش أصدقاء عشان يهربوا من نظرات الناس ليهم، فكرة بعيدة خصوصًا إنهم أصغر من إنهم يعملوا كدا.

لكن الموضوع كان مخلي النوم يهرب من عيني، كان أكثر حاجة شاغلة تفكيري مؤخرًا، وجاتلي فكرة ذكية.

عن طريق معرفتي باسم أسرة جيك الأخير، اتصلت بكل دور المسنين وسألت عن روزي، الجدة العجوز، قُلتلهم إنها صديقة لأمي وعاوزة تشوفها، وكل المكالمات كانت ماشية بنفس الطريقة، اللي بيؤد عليا بيستأذن وبيدور في السجلات وفي النهاية يعتذر ويقول إن مفيش عندهم حد بالإسم دا.

دخلت على الإنترنت وبدأت أدور عن أصل أسطورة القناة 89.1، وموصلتس لحاجة، مفيش أي أثر للموضوع.

قرت قصة كيتي مرة ثانية، إحساس بيقولي إنها زارت جدة جيك بجد، الموضوع مش مجرد مقلب، الأمر حقيقي.

في النهاية قررت أجرب بنفسي، قفلت باب غرفتي وشغلت القناة 89.1، فتحت باب الخزانة، غمضت عينيًا وركزت في الشوشرة، بحاول أركز عشان أسمع صوت خافت جدًا، صوت صرخات مكتومة، صوت صرخات عذاب، صوت سلاسل معدنية بتخبط في بعض، ساعات بعتمد إني سامعهم، وساعات الموضوع بيكون مضحك، رغم كذا كنت خايف، خايف كيان شريد يخرج من الخزانة ويخطفني، بتمني دا يحصل رغم إني خايف منه، عاوزه يحصل عشان أثبت لنفسي إن الموضوع حقيقي.

بس محصلش حاجة!

\*\*\*

في يوم شُفت جيك وكيّتي بيتسموا لبعض  
 وببيضحكوا جنب خزانة جيك المدرسية، مشيت  
 ناحيتهم وكيّتي غمزت لي.  
 ساعتها كل شيء انتهى.

إقتنعت خلاص إني كُنت ضحية لمقلب من طلابي،  
 أنهيت البحث عن القناة 89.1، وفي يوم كُنت سهران  
 مع زميلي وحكيت له كل حاجة، قالي إن إصراري على  
 البحث كان سخيف، وكان مُمكن بكل سهولة أعرض  
 نفسي للخطر.

قالي يومها: «شكلك بتحب الأساطير جدًا.. لو مكنتش  
 عارفك كويس.. كُنت فكرتك بتحاول تألف أسطورة  
 إنت كمان.. بُص.. انسى الموضوع كله»

طلعت القصتين من شنطتي وحطيتهم أدامه على  
 البار، مسكهم بحرص، بدأ بقصة جيك، قراها باهتمام  
 وبعدين قالي: «إنت ليه محكيتليش على أبي؟»

حسيت بالغضب، هو مش مركز، آبي هي كيتي، أنا سبق وقلتله، كيتي كانت عاملة فيا مقلب.

سرح شوية و هو بيكلم نفسه: «يا تري... هممممم»

وساعتها حكالي كل حاجة.

من عشر شهور تقريبًا و قبل ما أنا أنتقل للمدينة، تلميذة في الصف الثامن اسمها آبي اختفت بدون أي أثر، كأنها تبخرت في الهواء، كانت في عُرفتها واختفت تمامًا، التحقيقات قالت إنها احتمال تكون هربت، القضية كانت غامضة ومفيهاش أي أدلة، مفيش أي مشتبه بيهم!

بكل بساطة.. آبي اختفت.

قريت قصة كيتي مرة ثانية، قلبي وقف تمامًا من الخوف، طول الوقت كُنت بفترض إنها زارت جدة جيك، لكن.. كُنت مُخطئ!

ممكن تكون كيتي زارت غرفة أبي مش غرفة جدة جيك، أنا عمري ما فكرت في دا.

وساعتها .. كل شيء اختلف تمامًا.

كلمت إدارة المدرسة.. اتصلت بالسلطات.. كلمت الشرطة وحكىتلهم عن الموضوع بالكامل، لكن للأسف مقدرتش أوصل لحاجة، مكانوش مهتمين إن أبي عاشت في البيت اللي أدام جيك، مكانوش مهتمين بقصته وقصة كيتي، الأولاد حسوا بالخوف وقالوا إنها مجرد قصة، قصة خيالية تمامًا، جدة جيك الحقيقية مش في دار مسنين، الأولاد اعتذروا كثير، قالوا إنها قصص خيالية مش أكثر.

جيك قدم اعتذار رسمي للمدرسة لأنه استخدم اسم فتاة مفقودة في قصة خيالية، قال إنه مكانش متخيل إن الموضوع هيوصل لكدا.

وفجأة لقيت نفسي الشريد اللي في القصة، أنا المدرس المخبول اللي دخل طفلين في فوضى عن وحش

خيالي وطفلة مفقودة، المدرسة فصلتني والقريبة  
نبذتني.

كل شيء انتهى.

سبت التدريس تمامًا من يومها.

النهاردة وبعد عشر سنين لسه مُحتفظ بالقصتين  
وبفكر، مُمكن أنا تجاهلت حاجة.. مُمكن أكون  
مبحثتش بشكل كافي.. مُمكن أكون محتاج أكرر  
التجربة مرة كمان.

وَمُمكن فعلاً القصص خيالية..

مش عارف..

بس أنا مُتأكد إن القصص حقيقية وهلاقي حل اللغز دا  
قريب.

ملحوظة: كاتب القصة اختفي تمامًا من عُرفته بدون  
ما يسبب أي أثر، لقوا دولابه مفتوح والراديو بتاعه

مضبوط على القناة 89.1، لكن حتى الآن مفيش دليل  
مادي ملموس إن الأسطورة بتاعة القناة المشوشة  
حقيقية، لكن أنا شخصيًا عارف إنها حقيقية.. ومش  
هجربها!

\*\*\*



## 10 - جسر الإنتحار

اللي هحكىهولكم دا حصل من سنين، قبل ما يقفلوا الجسر ويحطوا الحواجز، لكن أنا فاكر كل حاجة حصلت في اليوم دا، فاكر كل حاجة كأنها حصلت إمبراح، فاكر كل كلمة قالهالي.. فاكر كل كلمة قلتها، كل حاجة محفورة جوا عقلي وذكرياتي، سايبه جوايا تحذير عمري ما نسيته: خليك حريص وتأكد إنت بتسمح لمين يدخل عقلك.

عارفين إيه الحاجة المضحكة؟ إني كنت مفكر نفسي شخص كويس، صحيح أنا مش من النوع اللي ممكن يمد إيداه ويساعد غيره، لكن لما قابلت ماسون وشفته واقف ورا سور الجسر، حسيت إني مضطر أتكلم.

وجهه كان شاحب، بيترعش من البرد والثلج اللي مشهورة بيه تورنتو، شفايفه بتترعش، ماسك سور الجسر بإيديه وهو باصص على النهر، عمري ما عرفت حد انتحر قبل كدا طول عمري، لكن مش محتاج أعرف حد منتجر عشان أعرف إنه واقف هنا عشان

ينتحر، باصص على النهر وهو بيتأمل المسافة الكبيرة  
اللي بينه وبين النهر، قربت منه وحاولت أتكلم بهدوء  
ولطف على أد ما أقدر، سألته: «اسمك إيه يا  
صديقي؟»

من غير ما يبصلي جاوب بهدوء: «ماسون»

كملت كلامي بلطف: «صحيح أنا معرفكش يا ماسون..  
وصحيح أنا أصلاً مش من كندا.. بس هقدر أقولك إنك  
بتفّر بوقت عصيب»

بصلي ببطء، عينيه كانت مليانة سُخرية، تقريبًا في  
مُنتصف العشرينات من عُمره، لابس لبس كويس، مش  
رخيص وردئ ومش غالي، الشخص دا مش مُشرد ولا  
فقير.

سألني بعصبية: «عاوز مني إيه؟.. أنا مش فاضيلك..  
دماغي فيها حاجات كتير أوي»

حاولت أتجاهل سُخريته وإحباطه وأنا بقوله: «أنا  
اسمي إدوارد.. وعارف إنك مش فاضيلي.. وعارف إن

دماغك فيها حاجات كتير أوي.. بس أنا مُمكن  
أسمعك.. إيه رأيك تحكي لي؟»

بص على النهر تاني وهو بيقول بخزن: «أنا متجوز من  
سنة.. ومراتي بتخونني.. كل يوم يرجع من شغلي  
وبشم ريحته.. بشمها على سريري.. بشم ريحة عرقه  
في عُرفتي.. بشم ريحته على جسمها»

كُنت في حالة صدمة، مش لاقى كلام أقوله، الموضوع  
فعلاً صعب ومرهق نفسيًا، بس مش دا بس اللي  
صدمني، اللي صدمني إن الموضوع كان مُشابه  
لموضوع أعرف بشكل شخصي، سألته: «اتكلمت  
معاها؟»

بسرعة رد عليًا: «إنت اتكلمت معاها؟»

حسيت بالدهشة، سألته: «أنا؟.. سألت مين؟»

ابتسم بسخرية وهو بيقول: «زوجتك»

الرياح اشتدت والثلوج نزلت أكثر، جسمي بدأ يترعش من البرد، ماسون كان على وشك يختل توازنه بسبب الرياح، كان هيقع في النهر، تحركت بسرعة ومسكته من هدومه، وعلى الرغم من إنه كان هيقع ويموت إلا إنه مكانش باين عليه الخوف.

سألته بغضب: «تقصد إيه بكلامك دا؟»

تجاهل سؤالي وهو بيكمل كلامه: «أنا كمان عندي مشكلة في الشغل.. هيققلوا راتبي.. عاوزين يخفضوا الرواتب بنسبة 20 % واللي هيعترض هيتنقل لفرع الشركة في المكسيك.. وغالبًا هوافق.. أقلل راتبي شوية أحسن من إني أتفصل»

لا، دي مش ممكن تكون صُدفة، المرة دي أنا مُتأكد إنه بيتكلم على مشكلة شخصية، كل حاجة بيحكياها.. كل مشكلة هو متورط فيها.. دي مشكلتي أنا!

سألته وأنا حاسس بالخوف: «إنت مين؟.. إنت بتتجسس عليا؟»

بصلي وابتسم بسخرية وقال: «إنت اللي جيت و  
تكلت معايا يا إدوارد.. متضايق مني ليه بقي؟»

صرخت فيه: «كُل اللي بتتكلم عنه دا بيحصلي.. دي  
حياتي أنا.. اللي إنت بتشتكي منها دي مشاكلي  
وحياتي»

كأنه بيتسلى بخوفي، قال باستمتاع: «دي حاجة  
غريبة.. بس دي ممكن تكون صُدفة.. صُدفة مُمتعة»

«إيه اللي مُمتع؟»

«إن أنا واقف هنا ببص على نهاية حياتي ومُستقبلي  
المُظلم بسبب مشاكلك.. وإنت واقف ورايا بتتصرف  
كأن الأمور عادية»

حسيت إنني نسيت كُل الكلام، حاولت أركز وأرد عليه:  
«كُل.. كُل حاجة هتبقي تمام.. أكيد هتبقي تمام»

ضحك وهو بيقول: «إنت عارف كويس إن زوجتك  
بتكون في حضن راجل ثاني.. عارف كويس أوي

وبتشوف آثاره على جسمها وعلى سريرك»

«على فكرة إنت مش لطيف»

« لا.. أنا مش لطيف.. بس دي حياتك.. أو بمعنى أصح  
دي حياتنا»

واقف مكاني مش عارف المفروض أقول إيه أو  
أتصرف إزاي، حابِس إنه بيتلاعب بيّا، أنا مش من  
كندا.. أنا من أمريكا وتحديداً من ولاية فلوريدا، أنا هنا  
في مُجرد زيارة أسرية، وفجأة بقابل شخص على  
وشك الانتحار بيدعي إن مشاكله زي مشاكلي، وحياته  
زي حياتي، هل دا مُمكن يكون معقول؟

قال وهو بيضحك بشخرية: «بص على لون شعري يا  
إدوارد.. شعري بني.. بني لون طين الأرض.. بالظبط  
زي لون شعر زوجتي.. هي كمان لون شعرها بني..  
عارف لون شعر ابني الصغِير إيه؟.. شعره أشقر.. أشقر  
يا إدوارد»

«لون الشعر مُمكن ميكونش مُتطابق لأسباب كثير  
أوي»

صرخ فيا بغضب: «فوق بقى يا إدوراد.. فوق شوية..  
بُص حواليك.. إنت مش طفل صُغِير.. إنت راجل بالغ  
عاقل.. مش هتدفن راسك في الرمل زي النعام  
وتتظاهر كأن مفيش حاجة غريبة بتحصل.. زي زمان  
.. لما كُنت بتدفن راسك تحت المخدة وتتظاهر إن  
أهلك مش بيتخانقوا»

«أهلي.. إيه علاقة أهلي باللي بيحصل؟»

«هي دي الطريقة اللي إنت دايمًا بتتعامل بيها مع  
مشاكلك.. من أيام ما كُنت صُغِير»

بعد لحظات تفكير بسيطة قدرت آخذ بالي إن  
المُحادثة شكلها تغيّر تمامًا، المُحادثة بأكملها دلوقتي  
بتدور حواليا، لكن أنا مكنتش في وعيي، أنا كُنت  
مصدوم من الواقعية اللي كانت في كلامه، الموضوع  
كُله كان صادم.



سألني بسخرية: «قولي.. فين زوجتك وأولادك  
دلوقتي؟»

«كارولين مسافرتش معايا عشان ظروف ال...»

«إنت مُدرِك إنك بتقول كلام مش منطقي.. صح؟..  
كارولين عرفت تلاقي حجة عشان تقضي وقت أطول  
مع عشيقها»

قُلتله وأنا بحاول أغيّر الموضوع: «مفيش أدامنا حل..  
لو مقبلناش بتخفيض الراتب هنخسر الوظيفة..  
الموضوع مُنتهي.. في النهاية هنتنقل للمكسيك»

ابتسم بخُبت وهو بيقول: «زمايلك مسميينك إيه يا  
إدوارد؟»

«بيقولوا إني....»

صرخ فيّا بغضب: «انطق.. قول.. قولها يا جبان»

«هو دا اللي بيقلوه عليّا.. بيقولوا عني جبان»



فجأة سمعت كل زمايلي في الشغل بيسخروا مني،  
بيقولوا عليا جبان، مديري بيصلي بشفقة، أهلي  
بيصولي باشمئزاز.

ماسون فتح فمه عشان يتكلم، المرة دي صوته مكانش  
شبه صوتي، المرة دي صوته كان شبه صوت كيث  
مديري وهو يقول: «لسه مش عارف زوجتك بتخونك  
مع مين.. زوجتك بتخونك معايا.. يلا انتحر  
وسيبهالي.. إنت محدش بيحبك ومحدش هيهتم  
بيك»

كلامه كسرني، كلامه حسسني أنا أد إيه مكروه وغير  
مرغوب فيا، وقفت على سور الجسر وأنا بعيط، كل  
حاجة لونها أسود في عينيّا، كنت على وشك أقفز لّما  
فجأة حسيت بحد بيمسك إيدي، بصيت ورايا وشفت  
عينيها، عيون واسعة مليانة أمان، قالتلي بلكنة  
فرنسية: «المفروض متمشيش على سور الجسر»

بدأت أتلفت حواليا زي المجنون بدور على ماسون،  
لكنه كان اختفى بدون ما يسبب أي أثر.

قُلتها بخوف: «كان.. كان فيه راجل تاني هنا!»

قالت بصوت هادئ: «لا.. مفيش هنا غيري أنا وإنت..  
آثار الخطوات على الثلج ليّا أنا وإنت بس»

بصيت على آثار الأقدام، كان عندها حق، نزلت من  
على سور الجسر بحرص، قعدت على الأرض وعيّطت،  
عيّطت زي ما عُمرى ما عيّطت في حياتي، عيّطت  
عشان أنا عارف ومُتأكد إن كل حاجة حصلت كانت  
حقيقية.. أنا مكنتش بتخيّل.

الشُرطية اللي أنقذتني مشت معايا لحد السيارة  
بتاعتها، مكانش عندي جرأة أكلم أي حد أعرفه عشان  
ييجي يأخذني، معنديش جرأة أكلم زوجتي أو  
قرايبي، لما هديت شكرتها ومشيت، ركبت الطائرة  
ورجعت، في المطار كارولين وأولادي مستنيينني،  
صحيح واحد منهم شعره بني زينا والثاني شعره أشقر  
زي جدته، حضنتهم وأنا بتتسم.

الشيطان مُمكن يستغل لحظة شك ويخفي شيء  
بديهي عشان يحقق غايته.

المُشكلة إني لحد دلوقتي بسمع صوت ماسون  
بيهمسلي لَمَّا يكون لوحدي: «جبان.. كُنت أجبن من  
إنك تنتحر»

\*\*\*

## 11- وحش بشري

أرجوكم بلاش تسألوني أنا بشتغل فين.

مش هقولكم على مكان الجامعة، مش هقولكم على اسم المدينة، مش هقولكم حتى على اسم الولاية، الأفضل ليًا وليكم إن كل البيانات تفضل غامضة كدا.

أنا بشتغل فرد أمن في واحدة من الجامعات، طلبة الكلية بيقولوا علينا «شرطة الجامعة». خلال شغلي كفرد أمن شفت حاجات كتير مؤلمة وسيئة، في البداية كنت فاكر إن الشغل في الحرم الجامعي هيكون سهل، هراقب طلبة أغلبهم عبارة عن أطفال مُدللين، لكن الوضع مُختلف، الأمر مُخيف والظروف سيئة، عارفين إيه السبب؟.. إن الوحوش و الأشرار اللي في العالم كله مُختفين وسط باقي الناس و شبههم بالضبط.

«ارسموا وَحش.. و قولولي هو ليه وَحش؟»

جينس لي قالت الجُملة دي، أو بمعنى أصح سألت السؤال دا، سؤال فلسفي جدًّا، إيه اللي يخلي وَحش يبقى وَحش، في السينما والتليفزيون والقصص والروايات الوحوش بتكون مسوخ مشوّهة، لكن في الحقيقة الوحوش مبتقاش كدا، الوحش البشري بيكون شخص عادي جدًّا، مُمكن يكون جارك اللي في البيت اللي جنبك، مُمكن يبقى والدك أو والدتك، مُمكن يكون طالب مُدل في واحدة من الجامعات.

اسمه كان جوشوا سيمونز، دا اسمه الحقيقي، دا الوحيد اللي مش هغيّر اسمه أثناء القصة، هو يستحق إن العالم كُله يعرف اسمه، لكن متحاولوش تدوروا عليه على الإنترنت، الحكومة مانعة أي حاجة تتكتب عنه، مش عشان القضية مُهمة ولا حاجة، عشان نفوذ وفلوس والده قدرت تعمل دا، الفلوس قادرة تعمل أي حاجة.

خلوني أحكيلكم القصة من أولها.

جوشوا سيمونز إنسان عادي زي أي إنسان، شاب فاحش الغنى لدرجة إنه مفكر إن العالم كله مخلوق عشان يرضي رغباته و يخدمه بس، عارفين النوع دا من الناس؟ كنت مفكره مغرور بس، لحد ما البنات بدأت تظهر واحدة ورا واحدة.

كانوا كتير جدًا، يا الله، كانوا كتير جدًا، طالبات مُستجدات.. طالبات قدامي.. طلبة ماجستير.. طلبة دكتوراة، طالبات في الجامعة دي وطالبات من جامعات تانية، كلهم ميعرفوش بعض، لكن بينهم حاجة مُشتركة، حاجة منهم كانت كلامهم عنه، عن جوشوا سيمونز، وبصفتي فرد أمن كان لازم أسمعهم، أسمع قصصهم وحكاياتهم، وكان لازم أحاول أقنعهم إنهم يشهدوا عليه، بدون شهادتهم مش هنقدر نعمل حاجة وهيفضل حُر طليق بدون عقاب.

أعتقد.. مُجرد اعتقاد.. أعتقد إنني مكنتش عاوز أصدق إنه جوشوا، مكنتش عاوز أصدق إنه شخص أعرفه.. مكنتش عاوز أصدق إنه شخص بشوفه كل يوم، مش

عاوز أصدّق إن حسي الأمني خدعني ومقدرش يحدّ  
إنه مجرم وهو معديّ من أدامي كل يوم.

كُنت عاوز أصدّق إن اللي عمل كدا هو شخص غريب،  
حد معرفوش، لكن إنه يكون طالب، طالب في الجامعة  
اللي بحرسها كرجل أمن، ومش أي طالب، جوشوا كان  
طالب مُمتاز، كان قائد فريق كرة القدم في الجامعة.  
كان طالب بيحضر كل حفلات الجامعة وصديق لكل  
الطلبة، فضل عايش حساته بأفضل طريقة مُمكنة من  
غير ما حد فينا يقدر يلمسه، ولوقت طويل جدًا كُنا  
عارفين اللي عمله وبرضه مش قادرين نلمسه!

لحد ما إيمي ظهرت، وعلى عكس جوشوا، إيمي مش  
اسمها الحقيقي، ومش هقولكم اسمها الحقيقي إيه،  
ساعتها كُنت قادر أقدم جوشوا للمحاكمة، قادر أخليه  
تحت طائلة القانون.

إيمي كانت غير باقي البنات، ولما بقولكم كدا بقصد كل  
حرف في الجملة.



إيمي كانت مُختلفة، في أول مرة شُفتها حسيت إن جسمي كله بيترعش وقلبي هيقف من الخوف، حاجة مُخيفة في الطريقة اللي بتتكلم بيها، نظرة عينيها مُرعبة، إيمي خسرت كل حاجة ومبقاش عندها حاجة تبكي عليها، كان والدي دايمًا يقول: «بلاش تحاصر شخص في ركن ضيق.. بلاش تحط شخص في مكان ما وهو خسران كل حاجة ومعدوش حاجة تانية هيخسرها.. عشان ساعتها.. رد فعله مش هيعجبك»

الحاجة المُخيفة اللي فيها مكانتش طريقة تصرفها، كانت نظراتها.. عينيها، بيقلوا إن العيون هي نوافذ الروح، ودا حقيقي جدًا، لكن لما ببص في عينيها بشوف نظرة ميتة.. باردة.. خالية من المشاعر.. وحشية، نظرة بتقول إنها قادرة تدبح أي شخص بدون نقاش أو تردد، لكن الفرق بين إيمي وبين باقي البنات كان إنها كانت مُستعدة للشهادة.

أول جلسة في المحكمة كانت في نوفمبر، الليلة اللي قبل عيد الشكر على طول، إيمي قررت إنها مش هتتراجع، وقفت في المحكمة بثبات وبدأت تحكى



قصتها، معيظتتش.. صوتها متهزّش، مبصتتش حتى لجوشوا رغم إنه كان قاعد على بُعد خطوات في القفص الحديدي، كان بيتسم بشخريّة وكأنه عارف إن محدش هيقدر يقرب منه، حكت القصة بتاعتها كاملة. القاعة كلّها كانت صامتة تمامًا وهُمّ بيسمعوها، وبمجرد ما انتهت قعدت مكانها بهدوء، محامي المُتهم بدأ يسألها شوية أسئلة، بدأت ترد على الأسئلة بهدوء شديد، الحضور كلّه بدأ يهتمهم بكلمات مش مفهومة، لحد ما القاضي أمرهم بالهدوء واحترام المحكمة.

باقي المحاكمة كانت غريبة، الشهود حضروا وللأسف شهدوا لصالحه، كلّهم كانوا أصدقائه وشهدوا إنه كان معاهم وإن إيمي كذّابة، ابتسامته اتسعت بغرور غير طبيعي، كُنت عاوز القاضي يسمحلي إني أقتلهم واحد واحد، من شدة الغضب مش فاكر الأسئلة اللي توجهت ليهم ولا حتى الإجابات اللي جاوبوها، فاكر كويس نظرة خيبة الأمل اللي كانت على وجه إيمي لما القاضي طلب من هيئة المُحلفين ياخدوا قرارهم، دخلوا الغرفة الخاصة بيهم، دعيت ربنا إن هيئة

المُحلفين تاخذ القرار الصحيح، الحقيقة واضحة،  
الشهود كذابين، الولد مُذنب، دي حاجة واضحة جدًا،  
خرجوا من الغرفة وقعدوا مكانهم.

قلبي كان هيقف وُهَمَّا بيستعدوا عشان يقولوا حكمهم.

قالوة إن جوشوا سيمونز مش مُذنب، في اللحظة دي  
عرفت وتأكدت إن فيه ناس كتير فوق القانون، كُنت  
عاوز أقتله.. كُنت عاوز أخنقه.. كُنت عاوز أشيل نظرة  
الغرور وابتسامة الثقة اللي على ملامحه دي، بس  
معملتش كدا، عشان أنا رجل أمن ولازم أحترم القانون  
غصب عني، حتى لو أنا شايف إن اللي بيحصل غير  
قانوني، فكرت كتير، حاولت أعمل حاجات كتير لكن  
في النهاية وصلت لنتيجة واحدة، مفيش حاجة هقدر  
أعملها.

فضلت لَمُدَّة إسبوعين مُقتنع إن مفيش بإيدي حاجة  
أعملها، لحد ما المُكالمة اللي جت من إسبوعين.

لقوا جوشوا سيمونز في كابينة قديمة مهجورة من 3 ساعات تقريبًا، كان لسه حي وقادرين ينقذوه، أعتقد إن إيمي كانت عاوزاهم ينقذوه، كانت حريصة وهي بتأذيه عشان متقتلوش، كانت عايزاه حي، كانت عاوزاه حاسس باللي عملته فيه، كانت عاوزاه يعيش بالندوب والجروح دي عشان يفضل فاكرها.

وطبعًا كان فيه جلسة محاكمة تانية، لكن كانت مختلفة تمامًا عن المحاكمة الأولى، المرة دي كانت جريمة محدش عايز يعترف إنها جريمة، والمُتهمة اللي محدش عاوز يقتنع إنها مُتهمة.

وللمرة الثانية بتبدأ إيمي حكايتها بمُنتهي البرود وكأنها بتتكلم عن حالة الطقس، بتحكي كأنها حد تاني خالص غير اللي ارتكب الجريمة، أو يمكن تكون مش مُتهمة ومش فارق معاها حاجة، ودي بالنسبة لي حاجة مُخيفة جدًا، فقدان الشعور بالذنب دا أمر مُخيف، فقدان الشعور بالإنسانية أمر مُرعب.

بدأت تشرح اللي حَصَل، إزاي قربت منه أثناء الحفلة، غازلته، إزاي نجحت في إنها تلفت نظره، إزاي حطت له مُخدر في الشراب بتاعه، إزاي قدرت تسيطر عليه وتقنعه وهو تحت تأثير المُخدر إنه يمشي وراها لحد الكابينة دي عشان يمارس معاها الجنس، وجوشوا مكانش هيسيب فرصة زي دي تضيع من إيده.

سندته ومشوا في عربيتها، وصلوا لحد الكابينة المملوكة لأسرتها، مكانش قادر يفتح عينيه، بس كان عارف.. كان عارف إن حاجة مُخيفة هتحصل له، مكانش عنده القوة ولا القدرة إنه يقاومها، قال بصوت خافت: «هتعملي فيا إيه؟»

ساعتها إيبي بصت له في عينيه وبابتسامة ساخرة قالت له: «صدقني.. مش هعمل فيك إلا اللي إنت تستحقه بس»

دخلته الكابينة وربطته بسلسلة ضخمة مصدية في ترابيزة ضخمة، كل طرف من أطرافه مربوط في رجل

من رجلين الترابيزة، وقعدت جنبه تنتظره لحد ما يفوق.

لما فاق فضل يعييط ويترجاها زي الأطفال، كان بيحاول يستجديها ويستعطفها، لكن هي مكانش عندها أي استعداد للمساومة، مكانش فيه أي حاجة هيقلوها هتخليها ترجع عن قرارها، مش هتتنازل عن هدفها، مش هترجع عن خطتها، وهتنفذها مهما كلفها الأمر.

لما شاف السكينة الخوف خلاه يسكت، بدأ يهمس بنبرة خائفة، لكن هي كانت اتعلمت حاجة واحدة، مفيش حاجة في الدنيا هتجيب حقها غيرها، لو عاوزه تنتقم وتجيب حقها لازم هي اللي تجيبه لنفسها.

لما مالقاش أمل منها بدأ يصرخ ويحاول يستنجد لكن الكابينة في مكان مهجور وبعيد.

بدأت تشرح هي عملت إيه: «الجلد كان سهل في سلخه، كأي بسلخ حيوان بري، صوت صرخاته كان

بيمدني بطاقة ورغبة أكبر في تحقيق انتقامي»

الأوتار كانت أصعب شوية لكنها كانت مُمتعة، قطعها كان شيق وكانت تجربة جديدة، كمان تكسير عُقل صوابع إيديه كان مُمتع.

مكانتش بتعمل كُله ورا بعضه، لَمَّا كان بيفقد وعيه أو بيدخل في حالة صدمة كانت بتاخذ راحة وتستنأه لحد ما يفوق ويكون مُدركٍ للي هي بتعمله، لَمَّا كان بيصرخ كانت بتتوقف عشان تستمتع بألمه وصراخه قبل ما تكمل تاني.

سألته لو كان يحب إنها تكمل ولا لا؟ كان بيترجاها عشان تبطل لكنها على أي حال كانت هتكمل، شرحت بالتفصيل إزاي استخدمت السكينة وبعدها إزاي قدرت تستخدم الشاكوش، كل دا وهي محافظة على وعيه وعلى حياته، لَمَّا حست إن غضبها انتهى خرجت من الكابينة واتصلت بالصحفيين، مقالتش ليهم هيلاقوا إيه لكن قالت لهم ياخدوا كاميراتهم معاهم لو عاوزين

يحققوا سبق صحفي، وبكل هدوء راحت قسم الشرطة  
والدماء مالية هدمها وهناك سلمت نفسها.

ضحكت بألم وهي بتقول: «الوغد مكانش فاكرني...  
مكانش فاكر اسمي... مكانش فاكر أنا مين»

لما قالت كدا إحساس الغضب كان أقوى مني، إزاي حد  
ممكن يكون بالوقاحة دي، اغتصبها ومش فاكر اسمها  
حتى!

هيئة المُحلفين طلبوا يجتمعوا وبعد ساعة خرجوا  
بقرارهم، إيمي بريئة لأنها مجنونة، كُنت على وشك  
أضحك بانتصار لكني شُفت عينيها، النظرة اللي في  
عينيها اللي قالتلي إنها خسرت كل حاجة، خدوها من  
المحكمة للمكان اللي هتفقد فيه حربتها وهتفقد فيه  
وعياها وسلامها النفسي بسبب الأدوية اللي هتاخذها  
هناك.

لكن لما عينيّا جت في عينيها... ابتسمت بخُزن.



أحيانًا بتسائل عن عدد البنات اللي خافت تتكلم، عن عدد البنات اللي خافت تحكي.

ساعات بفكر في عدد البنات اللي إيمني جابت حقهم، عدد البنات اللي إيمني أنقذتهم من مصير كان جاي على أيديه.

ليه المظلوم بيسكت ويرضى يشوف حقه بيضيع أدام عينيه.

مش عارف.. مش عارف.

يمكن تصرف إيمني تصرف وحشي ومش مقبول لكن الوحش في القصة دي هو جوشوا سيمونز بنسبة 100%

يا ترى عايش في وسطنا كام وحش مُتخفي في هيئة بشر؟

ويا ترى كام واحد منكم ساكت على حقه وخايف يتكلم؟



حدث بالفعل 11 - 2 - وحش بشري

\*\*\*

## 12 - الطفل الملعون

بمجرد ما والدتي ولدتني وشافت إني ولد، عيّطت،  
والدي دفن راسه بين إيديه وعيّط هو كمان، قال من  
بين دموعه: «يا ريت أقدر أموته دلوقتي وأنقذ الأسرة  
دي من العذاب.. إحنا ملعونين.. إحنا ملعونين»

أخويا الكبير قال للخمسة الباقيين إن ماما خلفت ولد،  
وإن قدري كان إني أكون (ستريجوي مورت) من أول  
يوم اتولدت فيه.

في رومانيا، فيه أسطورة حضرية بتقول إن الطفل  
السابع لأي أسرة لو كان نفس جنس الست إخوات اللي  
قبله، هيعيش حياة طبيعية لكن هيموت في سن  
صغير، بعد موته هيعود للحياة تاني، هيقوم من قبره  
ويرجع لأسرته عشان يعيش وسطهم، هيعيش معاهم  
كأن مفيش حاجة حصلت، لكن كل لحظة بتعدي من  
حياته بتستنزف لحظة حياة من حياة أهله، بيضعف  
فرصهم في البقاء، ويموتوا واحد ورا واحد أدام عينيه،  
الأسطورة دي إسمها أسطورة (ستريجوي مورت)

أهلي سموني لوسيف، لكن من ورايا كان الكل يقول عليا الطفل الملعون، محدش منهم أذاني جسدًا طول حياتي، محدش منهم حتى أذاني نفسيًا، كانوا بيحافظوا على مسافة بيني وبينهم، نادرًا لو حد منهم كلمني، أهلي كانوا طيبين معايا، لكن دايمًا قلقانين مني، ساعات بحسهم خايفين لكن أغلب الوقت ببيان عليهم القلق، والدي كان دايمًا بيسألني على دراستي ووالدتي كانت بتتهم بنظافتي الشخصية، والدتي كمان كانت بتسهر جنبي وتتهم بيًا طول الوقت خصوصًا الأوقات اللي كنت ببقى مريض فيها، درجة حرارتي كانت عالية، بترعش وبأتقيًا، والدتي كانت قاعدة جنبي وبتسرح شعري بإيديها، والدي دخل الغرفة وسألها عني، قالتله بنبرة لها مغزى: «سُخن لدرجة مش طبيعية.. خليك مُستعد»

بقية الليلة كان والدي قاعد جنبي، بيقرالي قصص من كتاب بحبه، كل ساعة بيشفوف درجة حرارتي ويقيس نبضات قلبي، فاكر شحوب بشرته، فاكر النظرة اللي في عينيه وضوء الشموع مُنعكس على ملامحه، فاكر

خشونة إيدِه وهو بيشوف درجة حرارة جبيني، فاكر ريحة أنفاسه المليانة تبغ، فاكر كرسيه اللي كان بيتهز وهو قاعد عليه من الخوف، وفاكر ماما لما دخلت الغرفة بتعيط وبتقول إن أخويا سورين مات من الحمى رغم إنه كان سليم جدًا.

\*\*\*

لما كبرت، دخلت المدرسة وبقيت اجتماعي شوية، كنت بذاكر كويس عشان عايز أبقى دكتور، لأن البلدة الصغيرة اللي أنا عايش فيها مفيهاش دكاترة، لو أنا ملعون زي ما هُما بيقولوا عليا وهؤذي الناس بعد ما أموت. فأنا هبقي دكتور وأنقذ حياتهم كلهم وأنا حي، لما قلت كدا لأهلي كانوا فخورين بيّا جدًا، كلموا إخواني الكبار، الاتنين بيشتغلوا في مصنع كبير على حدود البلدة، وإخواني وافقوا، هيدخروا جزء من مرتبهم بجوار مرتب والدي عشان يقدرُوا يدخلوني كلية الطب، كانوا فخورين إني بحاول أقاوم اللعنة وأكون مُفيد للبشرية، لكن أنا عارف و مُتأكد إنهم بيقولوا كدا من ورا قلوبهم، في نفس الأسبوع أخويا

نادورو مات وهو بيحاول يفض مُشاجرة بين اتنين  
سكرانيين في البار اللي بيشتغل فيه.

\*\*\*

المُدرسين خدوا بالهم من اجتهادي في الدراسة، قالوا  
لأهلي: «لوسيف طالب متفوّق.. عبقري.. بيذاكر  
دروسه وبيسأل في كل حاجة لحد ما يفهمها.. لَمَّا  
يتخرج لازم يسافر إنجلترا ويدرس هناك في منحة  
دراسية... إحنا دبرنا كل حاجة وفيه أسرة هناك مُهتمة  
بانها تتكفل بكل حاجة»

كُنت بطير من الفرحة، لكن أهلي بكل لُطف رفضوا  
العرض المُغري دا، طلبوا مني أخرج من العُرفة عشان  
والدي عاوز يتكلم مع المُدرس بتاعي على انفراد،  
خرجت وقفت برا، مكنتش سامع صوتهم كويس وهَمَّا  
بيتكلموا، لَمَّا خرجوا المُدرس بتاعي قالي: «لوسيف..  
إنت طفل عبقري.. أنا اتفقت مع والدك إن الطبيب  
المحلي بتاع البلدة اللي جنبنا هيدريك عشان تبقي  
دكتور.. أنا مُتأكد إنك عبقري وهتقدر تتعلم بسرعة»

كُنت غضبان ومتضايق، أهلي حضنوني واعتذرولي، حاولوا يبرروا موقفهم بجمل كثير يبداؤها ومن شدة الإرتباك مش بيعرفوا يكملوها، في النهاية والدي حضني وقال: «الفلوس اللي حوشناها هشتريك بيها آلة موسيقية وهعلمك إزاي تعزف عليها»

\*\*\*

أخويا ديميتري كان رجل أعمال ناجح، كان في زيارة في بودابيست، يقابل أهل خطيبته، وهو راجع كان لازم يعدي من خلال جبل كارباثيان، من سوء حظه حصل انهيار أرضي وحوصر تحته، فضل في عداد المفقودين لمدة أيام طويلة، في النهاية لقوا جثته، مات من الجوع، في الجنازة والدي ووالدتي كانوا منهارين من البكاء.

لما كان عندي 18 سنة، كُنت بقيت شاب وسيم ومثقف، الطبيب المحلي كان اسمه إسكندر أنجلوسكي، كان بيدربني ويعلمني كل حاجة، أهلي كانوا فخورين بيًا وكانوا دايمًا يقولوا بهزار إن لما

بيجي ميعاد موتي وتحوّلي ل (ستريجوي مورت) هيكون العائلة كلها ماتت ومش هلاقي حد ألعنه، والدي كان دايمًا يضحك وهو بيسعل بقوة، سألته ماله، كان بيطمني وهو بيتسم بآلم، طلبت منه يسمحلي أعماله أشعة سينية، ولما نتيجتها طلعت. دكتور إسكندر حضني وقال بحُزن: «أنا آسف.. بس مفيش حاجة بإيدينا نقدر نعملها»

وفي أقل من شهر والدي كان مات، سرطان رئة.

\*\*\*

عشنا في حُزن شديد بعد وفاة والدي، ساعتها إخواني بعدوا عني مرة تانية، والدتي كانت بتقعد لساعات طويلة أدام الشباك بتعيط بحُزن، بقيت طبيب مُساعد لدكتور إسكندر، بدأ يدريني بشكل أفضل، بدأت أروح استشارات وكشوف بدونه لَمَّا بيكون مشغول، في يوم كُنَّا قاعدين في مكتبه، التليفون رن، رد وبعد لحظات وهو بيسمع الطرف الآخر وشه كان شاحب جدًا، قال



بصوت بيترعش: «لوسيف.. حصل حاجة طارئة ولازم نتحرك فورًا.. ناس كتير مُصابين.. لازم نتحرك فورًا»

ركبنا عربيته وتحركنا فورًا، ساعتها عرفت فورًا مكان الكارثة اللي حصلت، إحنا رايعين المصنع اللي إخواني الكُبار شغالين فيه، لَمَّا وصلنا جريت ناحية صاحب المصنع، كان ماسك فوطة مليانة دم وبيحاول يكتم جرح في جبهته، سألته بخوف: «إخواني فين؟»

قال وهو مشغول بجرحه: «كانوا على خط الإنتاج.. مش عارف هَمَّا فين دلوقتي»

شاور بصابعه ناحية مكان خط الإنتاج، جريت بسرعة ناحية المكان اللي هو شاور عليه، بدأت أرفع الأنقاض بإيديّ زي المجنون، صوابعي بدأت تتجرح والدم بدأ يسيل من صوابعي وأنا بحفّر زي المجنون، برمي قطع الحجارة وقطع الحديد في الهواء بدون تركيز، مبطلتش حفر غير لَمَّا شُفت إيد أخويا سيزر من بين الأنقاض، بدأت أشده من إيده وأنا ببعد الثراب والحجارة عنه، سمعته بيأن بألم، وللحظة كان عندي أمل إنني أنقذه،



شديته لحد ما خرج من تحت الأنقاض وشفت وجهه،  
 كان شاحب لدرجة الموت، بس كان بيتحرك و بيتألم،  
 كان حي، عيطة من الفرحة وأنا بحضنه، عيط من  
 شدة الألم، كنت بدعي وبصلي لربنا، لكنه الأوان كان  
 فات، غمض عينيه ومات بين أيديا، أخويا الأكبر  
 ديكييل لم يتم العثور عليه، سيزر اتدفن في مقبرة  
 العائلة وديكييل اتدفن صورياً لأننا ملقيناش جثته.

أخويا الوحيد اللي فاضل على قيد الحياة ليفي، جالي  
 بعد الجنازة وكلمني بلهجة رسمية جداً وقال:  
 «لوسيف.. أنا هكتفي بهذا القدر.. أنا شفت كتير من  
 أهلي بيموتوا أدام عيني وأنا مش قادر أعمل حاجة..  
 همشي وأسيب العذاب دا كله ورايا.. أنا حجزت قارب  
 رايح أمريكا خلاص.. مش هرجع هنا تاني.. خليك إنت  
 هنا.. خُد بالك من ماما.. إنت (ستريجوي مورت) و  
 لازم تفضل هنا لحد ما تموت.. لو مكنتش مت قبل كدا  
 ودلوقتي كلنا بنموت بسببك.. خليك هنا وسيبني  
 أهرب.. خليك هنا لحد ما ماما تموت»

مزعلتش منه، تفهمت موقفه وسلمت عليه، يومها بالليل ليفي ودعني وراح يركب القطار اللي هيوصله لحد بلغاريا، ومن هناك هيركب السفينة اللي هتوصله لأمریکا، بعد شهر وصلني خطاب بيقول إن السفينة غرقت قبل ما توصل لأمریکا، للأسف.. محدش من رُكّاب السفينة نجا.

\*\*\*

فضلت أتعلّم الطب من دكتور إسكندر لحد ما قالي إني قادر أشتغل لوحدي بدون ما هو يكون معايا، والدتي في الوقت دا كانت صحتها تدهورت جدًّا. كُنت عايش معاها وبخدمها بكل قوتي، في ليلة صحيت من النوم عليها وهي بتهمسلي: «لوسيف.. ابني.. حبيبي»

قربت منها، كملت كلامها: «كُنا متخلفين طول السنين دي.. كُنا ضحية للخُرافة والأساطير.. كُنا خايفين من عودتك بعد الموت لدرجة إننا مقدرناش نعيش حياتنا.. شوف.. إحنا أدامك بنموت واحد ورا واحد وإنّت عايش بشكل صحي.. لوسيف إنّت مش ملعون..

إحنا اللي ملعونين بغبائنا وسذاجتنا.. لوسيف.. أرجوك  
سامحننا.. اغفر لنا غبائنا»

خلصت كلامها وماتت، مسكت إيديها وعيَّطت كثير  
أوي، وقفت في جنازتها وتأملتها وهي جوا التابوت،  
همست لها وأنا بقفل التابوت: «مسامحك يا أمي..  
مسامحك»

\*\*\*

في الصيف التالي جالي تليفون من دكتور إسكندر  
وقالي إن في حالة ولادة متعسرة في قرية مجاورة،  
محتاج مُساعدتي عشان يقدر يولدها، جريت على  
العنوان اللي قاله وبدأنا في الولادة القيصرية.

الجنين خرج، جسمه بارد ومبيتحركش، دكتور إسكندر  
خطفه من إيدي وبدأ يدلك صدره، كانت بنت، فضل  
يضغط على صدرها ويدلكه، كان بيردد صلاة خافتة و  
بيدعي وهو بيدلك صدرها، بمُجرد ما خلص الصلاة  
اللي بيردها بدأت البنت تتحرك، ابتسم وهو بيقول:

«البنّت هتكون بخير.. تعرف.. دا بالضبط نفس اللي حصل في ولادتك»

سألته بفضول: «إنت الدكتور اللي ولدني؟»

ابتسم وهو بيقول: «يومها بعد ما خرجت من بطن والدتك لقيت الحبل السري ملفوف على رقبتك وإنت كنت مخنوق ومش بتتنفس.. بدأت أدلك صدرك وأنا بصلي وبدعي.. ها.. قولي.. تحب تروح للأسرة وتبشرهم إنهم جابوا بنت جميلة؟»

شلت البنّت وخرجت للصالة، الأب كان قاعد على الكرسي وباصصلي بقلق، جنبه قاعد ست بنات صُغيرين، قُلتله: «مبروك جالك بنت»

قال بخوف: «إحنا ملعونين.. إحنا ملعونين»

\*\*\*

شكر خاص:

أولاً: للصديق اللي أثبت إن الصديق الوفي مش  
أسطورة ولا خيال

للصديق الخدوم الرائع اللي عمره ما تأخر عني.

محمد علي علي ... شكرًا.

ثانيًا: الجميلة المبهجة اللي دايماً بتفكر إزاي تسعد  
اللي حواليتها

الجدعة اللي باعتبارها من المكاسب اللي إن شاء الله  
هتدوم

لارا فايز ... شكرًا.

ثالثًا: الإثنين اللي بيتعبوا ويشقوا عشان يقدموا  
محتوي مُختلف ومُميّز وما إستسلموش لتيار التفاهة  
والجري ورا اللايكس و الشير

محمد عبد المحسن ... محمود توفيق ... شكرًا.

رابعًا : مكاسب السنة كالعادة

هدير نادي.. سعاد مصطفى.. هبة حسين .. مني  
عفيفي.. أسماء فاروق.. محمد متولي .. محمد أمير..  
أحمد زكي.. محمود صلاح .. مني درويش .. طارق  
وافي .. أحمد يونس.. محمد عبد الوهاب.. ميران  
طارق... آية علي.. شكرًا يا مبهجين..



noon\_publishing@yahoo.com

01127772007 -0235860372